

北京圖書館 編

北京圖書館藏珍本
年譜叢刊



第120册

DUXIU.COM

北京圖書館出版社




□ 北京圖書館 編

北京圖書館藏珍本

年譜叢刊

北京圖書館出版社

第 120 冊




第一二〇冊目錄

楊蓉裳先生年譜	一
二十一世會稽鏡西公年譜	九一
世承佐領明安年譜	一七七
翻譯生員翻譯官教習福祝隆阿年譜	一八三
竹崗鴻爪錄	一八九
仁菴自記年譜	二四三
凌次仲先生年譜	二九九
憚子居著作年表	四三三
楊園歲紀	四六九
韓桂齡先生自訂年譜	四七三

楊蓉萼先生水像





無錫金匱縣宦望志傳

楊芳燦字蓉裳乾隆四十二年拔貢

廷試第一令伏羌值回民田五滋事合數萬人圍伏羌城中回民
雜處芳燦獲內應數人誅之登陴固守五晝夜援兵至圍乃
解論功擢靈州牧旋入貲爲戶部員外郎芳燦故工詩及駢
體文與常州洪亮吉孫星衍齊名官京師聲望益重充會典
館總纂丁母憂歸主關中講席旋修四川通志卒於蜀季弟
英燦字蘿裳令四川安縣建倉以備凶荒調成都官民爭地
積久不決英燦折之訟始平擢松潘直隸同知撫蠻夷有法
紀著通省番夷備考卒於官仲弟揆別有傳

皇清誥授奉直大夫戶部廣東司員外郎充 會典館總纂修官

蓉裳楊公傳

陳文述 雲伯

君名芳燦字蓉裳一字才叔江南金匱人以拔萃科試高等選甘肅伏羌令擢靈州牧入京爲戶部員外郎以母憂歸卒於蜀君天姿英敏年甫冠所爲詩文已爲藝林所重與弟荔裳有二楊之目及官伏羌卽值田五之變田五者回民之譎驚者也聚石峯堡以復新教惑眾謀作亂未期而事洩遂由海城攻靖遠破通渭戕都統參將於高廟山合數萬人攻伏羌伏羌當秦隴之衝城中回民雜處君外輯軍民內杜間諜獲馬中驥等數人誅之其長者君拊循激勸咸願助君堅守居民以回也疑之君曉以大義民與回遂

和擘畫甫定而賊大至君隨機宜設方略應之與下同甘苦當矢石之衝者四晝夜援兵至圍始解賊不得越伏羌而東乃退守石堡會大將軍阿公制府福公統禁旅至秦蜀兵亦先後雲集築長圍以攻遂破石堡是役也非君以死守扼其衝必蔓延四出不可驟定論者比之睢陽玉壁焉事平論功擢靈州牧時荔裳已由中書舍人從大將軍福公征廓爾喀與君遇於靈州逾年軍事平荔裳以觀察擢甘肅藩司君例應引避不樂在外任乃入貲爲戶部員外君故工駢體文及官京朝多暇日所爲文益宏整典重京師有大著作必假君手君有請必應文不加點日常數千言輦下數才人者君爲舉首後生寒畯多被容接士論翕然歸之纂修會典

克舉其職會荔裳卒於蜀太夫人繼逝君乃南歸君之歸也貧無以自給則西之秦主講關中書院者數年繼又之蜀客蜀者又數年修四川全省通志會季弟蘿裳令安縣遂至安邑以嘉慶乙亥冬卒於安縣年六十三君與人平易無疾言遽色而外和內介生平未嘗有失德文人之敦行者莫君若矣所著有真率齋藁芙蓉山館詩詞文全集若干卷行於世餘所著未刻者多藏於家子二夔生官薊州牧麟生以嗣從兄掄後房山縣丞女三一適同里秦承需天津同知一適閩縣龔瑞穀睢甯通判一適餘姚張嗣居四川劍州牧

陳文述曰予之識君也在辛酉春以計偕留京師先後與君過從

者五年君怡聲緩步使人浮氣皆斂而身居圍城乃忠義奮發卻敵全城爲國家保障洵賢者不可測矣君弟荔裳以書生從軍絕域勒銘二萬里外及官蜀適白蓮教不靖與軍事相終始所著桐花吟館詩與兄媲美季弟蘿裳亦有文名長於倚聲論文人者推君與諸弟其不易及哉

誥授奉直大夫戶部廣東司員外郎楊公墓表 姚椿

公諱芳燦字才叔江蘇金匱人自其少時警敏劬學爲詩文若夙成者年二十以選拔貢生特用知縣公爲諸生久有聲譽始入都公卿人人爭欲識之先是辛卯歲試江甯俛得復失學使者以爲大恨及是則書尼其行鄉人亦多言宜改就教職者大理寺卿王公昶獨曰擇官而仕古人所非縣令百里所寄任亦匪輕要在賢者努力爲之耳遂就吏部選籤掣得甘肅至則補伏羌縣甘肅外毗新疆二萬餘里諸大臣絡繹出入地瘠而事叢大吏以下相與回邪匿冒 國帑飭馱私欲公至不肯附和亦不爲嶄嶄之行凡所諮畫悉濟於公然其後猶以虧空事被累乾隆四十六年四月

安定回民馬明心倡立新教布政司誘而執之其黨蘇四十三等
遂反事平論伏羌民馬得建等十六家斂銀以圖訟論如逆公曰
得建等事在未反前與從逆有間宜末減免者百餘人其後二年
四月逆回田五闕於石峯堡公先事籌備賊得不擾賊掠固原靖
遠安定諸縣城中馬稱驥等約爲內應其黨映龍首發之城被圍
五日援兵不至公內殲外捍夙夜勤勩亦會總督兵適至遂誅稱
驥賊遁去方圍城時公談笑鎮定從容賦百韻詩寄按察使王公
王公報曰吾料君必能辦賊今果然矣王公卽向勸公就縣令者
也大將軍旣平賊賊黨誣映龍先約五日後獻城會兵至不果乃
訊於靜甯公與偕往謁大將軍曰首發內變者映龍也如約降何

肯舉發且獻城必於五日後者云俟守者力盡耳伏羌向不治兵民夫輩皆烏合賊至卽獻城耳何必五日大將軍意解曰映龍故得建子也且令能保之耶曰非獨令伏羌同城守者皆願保之且映龍幸得建事不緣坐時時感泣此固所以報也遂出之獄公他日謂人曰明陳子龍招降許都而不能免其死嘗以爲恨然都固叛逆者映龍助予守城首發內應而枉誣以死何以對隴西人士乎論功擢靈州知州其後公弟揆來爲甘肅布政使公當迴避乃用新例入爲戶部員外分發廣東司行走爲 會典館纂修官公卿多知公者而公延攬才士微藝必錄爲詩文援筆立就人人滿所欲以去公性淳篤孝友忠信爲縣令時人有求者未嘗顯斥笑

謝之而已子弟輩或譏彈它人詩文輒愀然曰彼能讀書好爲詩文所以樂就我也奈何薄之耶人或負之他日待其人如初在甘創厲文學首拔周爲漢陸芝田於眾中生平慕李商隱謂有四同三異而爲漢稱公以爲過於商隱者三事知公者以爲知言公以入蜀修通志卒於安縣年六十三其世子姓俱存埋幽之文故弗著著其生平志事云

楊蓉裳先生年譜

世系名字詳家譜

鸞溪府君 顧太夫人

家乘紀實中

謹按公家譜載系出關西自華陰遷居常

州府城再遷府屬之無錫縣家乘燬於火自八世祖以上世次無可考曾祖聲毓公諱宗濂邑庠生祖端操公諱孝元邑庠生父鸞溪公諱鴻觀太學生均以公仲弟揆任四川布政使贈如其官

乾隆十八年癸酉十二月十八日未時生於無錫縣天授鄉幸臯

里北門下塘祖宅

宅有雙梧樹枝葉扶疎為 世父笠湖公手植者余生之前一

夕 顧太夫人夢見有五色雀翔集雙樹間以告 端操公及

大母倪太夫人至未時余生 端操公曰此唐崔信明之祥

也此兒長成當有文名惟雀形既小爵位不甚顯耳

十二月為嘉平月

端操公名
之曰嘉郎

余生七月即能言

端操公愛之指楹帖字令識一

過即記因手書唐人詩句作椀大字徧黏書屋壁晨夕指而教

之存之堂集中句云嬉戲皆詩書文字滿牆壁也

存之堂
端操公集名

謹按存之堂集兵燹後已無存惟其中之銜恤
草七絕壹百首刻家譜中其他諸作不多見矣

乾隆十九年甲戌二歲

是年 端操公以通鑑及二十一史事為四言名曰史略授余

讀自製小序亦四言云涑水資治紫陽綱目原原本本曷可不

讀全書俱在此姑引端年行稍長記取縱觀子記我錄我錄子

記手口相追老弱一氣云云序凡三百餘言惜不能全憶矣

乾隆二十年乙亥三歲

端操公授以四子書歲暮讀至子路自書唐人律詩絕句教之
讀一徧輒能記

乾隆二十一年丙子四歲

是年讀四子書竟每日讀四子書畢後授以唐人古詩長篇如
石鼓歌琵琶行長恨歌北征三別三吏諸篇俱能成誦三年中

古唐詩背誦精熟者計有八百餘篇矣

余時讀經書須十餘徧

不過三兩徧即牢記不忘四歲時端操公教之作字能作壁
窠大書並設沙盤習之觀者以為奇自長成至今字畫極拙劣
可笑此理殊不可解也 九月長妹生

乾隆二十二年丁丑五歲

讀詩經至小雅 端操公患淋證入秋疾漸劇未能督課

鸞

溪公亦以侍奉湯藥不遑兼顧荒廢日多至十二月 端操公
疾革謂 鸞溪公曰嘉郎廢學久矣我死後爾如不能親教務
延名師課之因口占詩云階前忘灌溉蘭芷化爲茅矧是芽初
茁如何便憚勞 鸞溪公涕泣不能仰視芳燦扶床立亦泣不
止也十二月初二日 端操公卒

乾隆二十三年戊寅六歲

是年余多病尪瘠殊甚 鸞溪公居憂在家授徒 倪太夫人
憐余弱不令就塾惟命 顧太夫人取 端操公所授詩書隨
時溫習十二月出痘疹甚劇瀕死者屢矣 倪太夫人同 鸞
溪公 顧太夫人哀籲痘神百方醫療僅乃獲生而神思憤亂

經月猶不甚省人事也

乾隆二十四年己卯七歲

是年痘疹滿百日尙未離牀褥余本弱於行步四歲能循牆行
扶掖並須人五歲始能離人移步至是足弱無力不能履地兩
手亦拘攣飲食均 顧太夫人哺飼冬月始下牀而神識昏瞶
示以六歲前所讀之書漫不省記也

乾隆二十五年庚辰八歲

鸞溪公在家授徒正月弟揆生余入塾偕諸童讀書唐詩史略
尙能記十之五六四子書詩經則盡遺忘矣 鸞溪公令仍從
學庸讀起每日不過五六行非五六十徧不能背誦八月中添

至八九行 鸞溪公憂之謂 顧太夫人曰嘉郎痘後竟換一

人矣奈何是年 鸞溪公應江甯鄉試薦而未售九月十八日

倪太夫人卒十一月次妹生 庶母盛孺人出

乾隆二十六年辛巳九歲

鸞溪公疊遭大故家日益落授徒不足以給薪水時舅氏雙溪

先生為瀘溪令因橐筆往依之得與漱浦令陶公 金諧 定交延

主盧峰書院余從鄰塾華先生 名格 邑諸生受學是年讀四子

書詩經卒業 陶公號適齋江西南城人名進士也著述甚富今其孫選拔貢生名本忠者曾從余遊亦負雋才

乾隆二十七年壬午十歲

從鄰塾顧先生名 錦章 邑諸生授書經時學徒皆習專經所謂

本經也 鸞溪公在楚南道遠音信間隔家貧甚 太夫人紡
織自給北里老屋數椽僅蔽風雨日暮挾書歸 太夫人篝燈
夜織余就燈讀至夜分始寢以為常

乾隆二十八年癸未十一歲

余外祖母黃太宜人自瀘溪歸見芳燦絕憐愛之 太夫人時
攜之歸甯舅氏諤齋先生工詩文癖嗜吟詠教余為詩初作近
體時得佳句後漸能作歌行三四百言諤齋先生喜謂太夫人
曰嘉甥下筆不凡吾妹有子矣是年仍從顧先生受經讀小戴

禮左氏傳竟

族叔祖清華先生名德冲憐余幼慧時相招攜是
夏隨諤齋舅氏集其園亭荷花盛開池中繹繹有

光網取之則小蝦族祖命作夜
明蝦賦極為贊賞今存文鈔中

乾隆二十九年甲申十二歲

外兄顧立方

敏恆

自楚南歸時雙溪舅氏已調任桑植令遣外

兄歸侍黃太宜人也外兄長余五歲性沈靜工詩古文辭與余
一見如舊相識談詩論文疊疊不倦黃太宜人命余與外兄俱
從諤齋先生習舉子業閒作詩歌筆力馳騁相上下舅氏每曰
阿士阿咸皆異才也

乾隆三十年乙酉十三歲

應童子試邑令青田韓公

諱錫胙

器之有神童之目是年雙溪

舅氏卒於官舅母黃太孺人挈諸外弟扶櫬歸 鸞溪公亦相
隨歸里

乾隆三十一年丙戌十四歲

應提學試不售仍從諤齋先生受業宿於外氏三月三妹生盛

出人

乾隆三十二年丁亥十五歲

讀書外氏與外兄弟立方學和名敦愉斐瞻名敬恂傳爰名敬

憲及黃正暘晨朱振基岳青同習舉業並習經解史論詞賦杜

門累月不出親戚有慶弔事皆不往人皆以為專愚也余讀書之外如

書畫圍碁等雜藝一無所解又懶於酬接立方兄弟亦然故同有專愚之目

乾隆三十三年戊子十六歲

世父笠湖公為四川邛州牧 鸞溪公於正月赴川省視余仍

讀書外氏六月三弟英燦生

乾隆三十四年己丑十七歲

邑中有文望者帖齋秦公

朝鈞

半谷鄒公

方鏐

吳黼仙先生

峻

暇日過從談藝詩歌唱和忘年齒之相懸也

鸞溪公自邛州

歸

乾隆三十五年庚寅十八歲

以詩文寄蜀中

笠湖公大喜作書寄

鸞溪公有吾家千里

之譽響泉舅氏

諱光旭

時任四川觀察見余詩寄三絕句云少

年誰似馬雲翀

吾鄉文肅公之孫

碧海長鯨噴日紅只有吾家天石老

龍門相對撫絲桐一曲桃花一往深人間難得有知音辟疆園

後雙溪去惆悵聊爲擁鼻吟甥如其舅更何疑歎絕無梁殿裏
詩小坐錦江天妙閣半酣吟到月斜時溧陽彭賁園先生光斗
年七十餘兄余詩寄詞二闕云錦瑟新詞寶劍篇文人俠骨
美人禪翩翩白袷正華年名重肯如泉第二才雄雅擅賦盈千
阿誰載酒草亭邊我愛梁溪水竹清松風月浪鬪泉聲竭來卅
載夢猶縈頭白漫希陶菊隱眼明初見庾蘭成翦燈吟罷若爲
情浣溪紗調也

乾隆三十六年辛卯十九歲

補博士弟子員學使爲長白景公福余與立方分試無錫金匱
兩縣試文出謬齋舅氏暨諸老輩謂二人必皆第一發案果然

秋應江甯鄉試昭文令常公

諱養蒙

甘肅靈州人得余文力薦

之主司大主考爲彭文勤公以余首藝欠精實落之是年世
父笠湖公運川木入都道經江甯爲延譽於袁隨園師余因以
詩卷爲贄師爲署其卷尾曰昔元微之年十九作秋夕清都詩
當時稱爲才子作者亦年十九而能搖筆萬言獵取百家其才
直在元相之上所謂生有自來者也吾愛之重之因與立方同
受業焉余幼時作詩喜學三謝及青蓮未免句摹字倣師謂曰
昔王朗欲學華子魚惟其似之太過所以去之愈遠吾輩讀書
時要與古人合落筆時要與古人離也余於是始悟作詩法作
文喜任沈徐庾師每曰立方學八家之文蓉裳學六朝之文吾

門得此可稱雙絕其賞愛如此庚寅秋 鸞溪公偕詰園諱潮

漆 舅氏赴直隸南宮縣至是冬抱疾歸醫者以為鼓症勢極危

篤忽遇異僧投以方劑而愈僧號映洲余贈以詩存初藁中

乾隆三十七年壬辰二十歲

侍鸞溪公於里門同里劉杲溪先生諱寅賓延主其家授諸孫

經即今國子生嗣富孝廉嗣紹也相得懽甚並得交其長君重

彝汝器次君古三汝暮俱以博學高才有聞於時課徒之暇以

文藝相切劘是年詩文頗進夏應歲試於澄江學使為彭文勤

公取余古學第一文亦列一等復試古學題為刺鐘無聲賦公

讀竟擊節曰繁音切響蘭成之遺非近今所有也因延入書室

三下丁官年譜

七

示以近著澹化閣帖賦萬福慶成頌從容問曰爾文藝頗佳何
以秋試未中余以實對公瞿然曰黜落汝者我也意惋悵者久
之在澄江與邵星城辰煥儲玉琴潤書孫淵如星衍呂映薇星垣
定交是冬徐宜人來歸

乾隆三十八年癸巳二十一歲

館劉氏脩脯所入僅供饔飧 鸞溪公舊症雖愈而精神未復
夏秋間疾復作藥餌之費 太夫人典鬻應之秋赴澄江應科
試古學經解時文俱第一賦題為調水符中有云候吏歸來鬻
瀉干杯之水先生睡穩夢酣一榻之煙又榻來分法海之波到
日啟琳宮之鑱仗魚節之雙雙洩鮫珠之顆顆等句文勤公深

為激賞知顧之重倍於曩年矣

復試賦題為神女不過灌壇令諸賦俱為同學攜去篋中並無

存稿約略記之志知己之感

九月黃仲則

景仁

洪稚存

亮吉

趙味辛

懷玉

訪定交而去十月

鸞溪公病甚醫藥祈禱百方不效於二十

三日子時溘逝時家無隔宿儲含殮棺衾凡附身之具賴族戚

維持僅不失禮哀慟慘剝靦顏苟活無以為人矣

族叔祖清華公族叔箕如

先生琴表伯王雲峰先生崕皆敦古道仗助多方並無德色今俱先後逝世眷念舊恩無日能忘也

乾隆三十九年甲午二十二歲

居憂仍館劉氏杲溪先生相待益厚

嗣緒

昆季文筆穎秀異常

俱嶄然見頭角矣秋試人歸隨園師以書慰問情款綢悉且云五十無車不能越疆而弔尤抱不安也文勤公學使任滿九月

以書相招至澄江話別至日留衙齋云此時試事已畢無嫌疑矣問余家事甚悉曰已婚否余答以已婚弟兄幾人余答以三人問二弟年若干歲余答以十五歲曰習文藝否余以文筆清穎尙堪造就對公曰爾亟回家偕之來並偕顧生來因出朱提二十金相贈余初未識公意也回錫偕外兄立方及二弟至使署公一見曰風采秀重令器也因謂二弟曰余將面試汝因命題爲南容三復白圭詩題爲蘭有秀兮菊有芳令余與立方就別館曰無擾文思抵暮文成公閱之甚喜設酒果延三人入座謂立方曰吾倩汝爲媒吾先兄有孤女就撫於吾今某文頗佳可期遠到吾願與之締姻余起以家世寒微遜謝公艷然曰吾

知汝家貧寸絲爲定足矣但汝弟須隨余往京邸讀書庶有成
就未識太夫人意肯否次日歸告太夫人曰學使愛才如此豈
可拂其意又謂揆曰婚姻功名汝終身大事吾雖不忍離汝亦
不能阻汝也遂擇吉行聘十月文勤公先入都余送至江干公
曰爾弟於明春偕吾眷屬來京爾服闋後當應選拔試吾已面
囑金圃矣時接任爲謝金圃師但得選拔後不願爾作知縣耳是年從兄
掄捷京兆試十二月長女德芸生

乾隆四十年乙未二十三歲

館劉氏二弟於正月杪隨文勤公眷屬入都泊舟蓉湖余拜見
師母趙太夫人慈祥藹吉厚福人也弟兄言別涕泣沾襟歸後

惘惘如有所失秋初赴金陵立方爲余攝館事謁隨園師小住

綠淨軒

書室名

園中兩月因與何南園

士永

陳古漁

毅

蔡芷衫

元春

方子雲

正澍

李瘦人

熒

丁星墅

珠

定交詩句唱酬極一時

之盛並謁江安觀察錢南浦先生

名金殿

訂於明春至署授其

子詩古文辭臘月除服

乾隆四十一年丙申二十四歲

春初南浦先生丁本生父艱回籍卽延余至嘉善其長公子

清

履

次公子

清豫

皆資質穎秀時授舉業者爲呂香圃孝廉人亦

溫雅余授以詩古文辭昆季皆能領解嘉善古魏塘地人風清

美書舍數楹下臨官河榆柳蕭疏饒有勝致月明夜靜猶聞欸

乃聲錢裴山楷太常時年僅弱冠南浦先生族孫也家秀水距魏塘不百里時相過從與余爲文字莫逆交是年得詩最多臘月歸長妹適外氏

乾隆四十二年丁酉二十五歲

春赴澄江應科試古學經解及文俱第一古學題燕睇賦春雨賦經解四巡考旋考選拔舉主謝金圃師以余充賦試竣仍赴南浦先生之招時先生治喪一年服闋寓江甯赴京謁選得江西南韶觀察夏五月挈家去余住隨園以待秋試時與南園子雲古漁諸君結詩文社隨園師第其甲乙秋試者接踵至黃左田鉞吳竹橋蔚光俱入社秋試被落謁文勤公於杭州時公以

主試旋奉視學之命遂留余在署閱試文因得與黃藥林駢定

交二弟應京兆試報罷回家臘月來杭署借歸度歲

乾隆四十三年戊戌二十六歲

春初將入都應

廷試文勤公與之書贈以資斧書云新正惟福門多祉若

朝考上第連入仕途則非所願頌也正月十六日偕從兄掄北上

三月朔抵京大廷尉王述菴先生在蜀中見余詩文激賞之至

是相見懽甚留住寓齋數日適江西楊桐舫懋珩進士充四庫

館總校延余校勘書籍遂移寓揚州會館與黃仲則汪端光施

雪帆晉俞少雲鵬翀同寓張萼樓述菴先生宅趙渭川希熿韋

友山 佩金 亦時相過從詩詞唱和或隸事屬對翦燈煮茗每至

夜分不倦也五月

廷試余字畫拙劣不望入等而

欽命詩題爲詩書敦宿好余第四聯云雅嗜應同菊移情不獨琴

主試程文恭公 景伊 錢蔣石先生 載 以爲佳句列入進

呈卷內

欽取一等第三名舊制選拔貢生入一二等者

欽派王大臣挑驗引

見以知縣教職用是科始有以七品小京官分部者蓋異數也 嗣後

以爲 定制 余挑取引

見奉

旨以知縣用時吾鄉在都諸公均以爲應具呈乞改教職述菴先生曰不然擇官而仕古人所非且命中應作縣令卽中進士入翰林亦不能免也余遂謁吏部掣籤分發甘肅是年從兄掄成進士歸班銓選余在部請憑七月買舟偕歸八月初間抵家得文勤公書云青袍北去墨綬南歸衣繡之行足爲健美但以燕許大筆句稽朱墨不能無悵快耳發函捧書感愧次骨春仲二弟赴南昌就婚先一月挈婦歸家十月次妹適張氏臘月葬先大夫鸞溪公於嶧峒灣之祖塋事竣偕二弟謁文勤公於淞署余時跼蹐幾無地自容公慰之曰人生遇合命也知縣任亦匪

輕努力爲之可耳留署數日歲事已逼垂涕而別

乾隆四十四年己亥二十七歲

正月啟程赴甘肅二月抵關中時畢弇山先生爲陝西巡撫修

刺晉謁並以詩文爲贄大相賞譽留住十餘日與嚴冬友侍讀

長明

張瘦銅中翰填集終南仙館爲詩酒之會拈毫擊鉢不知

身之在風塵也四月二十七日至蘭州七月署西和縣事遣家

人回錫迎接 太夫人安輿及眷屬赴甘是年得隨園師札云

足下宏筆麗藻驚才絕艷出自僕門作賀如此聆音識曲之

乾隆四十五年庚子二十八歲

同宗純皇帝五巡江淞弟揆進獻詩冊江甯

行在召試

欽取一等第四名

恩賜舉人內閣中書 太夫人欣慰逾常四月自錫起程赴甘徐

宜人偕弟妹輩隨侍妹壻顧學和偕行關河險阻慈躬無恙時

余署慶陽府環縣事 太夫人於六月抵署九月題補鞏昌府

伏羌縣遂奉 太夫人安輿並挈眷口赴任

乾隆四十六年辛丑二十九歲

在伏羌四月河州循化逆回蘇四十三爭教事起蘭州知府楊

公士璣往諭之遇害遂攻陷河州戕害官兵勢甚猖獗先是安

定逆回馬明心者倡立新教回民稱爲罕職罕職者華言聖人

也從其教者甚衆至是與老教構釁遂起事布政使王公廷贊

先誘馬明心而執之逆回等以索教主爲名進攻蘭州省城王公縛馬明心戮之城上逆回憤恨悉力攻圍王公率兵民晝夜抵禦城幾陷者數矣賴英勇阿公嘉勇福公先後率兵至屢戰皆捷賊退保龍尾山環攻百餘日始就殲滅當馬明心與老教構釁時伏羌民有馬得建等十六家斂銀爲訟費事平後獄詞連及臬使福公甯馳駟來縣執馬得建等二十餘人嚴加鞫訊俱稱餽銀歸教屬實謀逆實不知也時二十餘人家屬不下數百人徧城皆哭聲勢洶洶余哀祈量從末減具稟旋得制府暨英勇公檄云馬得建等餽送銀兩在蘇四十三未起事之前究

與從逆者有間罪止其身免其緣坐於是臬使止將馬得建等
解省論如法闔城帖然而馬得建等之子姪如馬映龍馬宏元
等頗識道理諒余不得已之苦衷感念不置逆回甫平而有折
捐冒賑之案事具爰書茲不詳述而道府以下伏法者不下百
人余以頑愚僅從薄譴余以折捐不及十名奉旨革職留任八年無過方准開復深感

皇上天恩 祖宗福佑而目擊情形心膽俱裂矣是年六月長子

承憲生九月長妹壻顧學和卒於官舍 太夫人甚痛之余作

誄辭

乾隆四十七年壬寅三十歲

在伏羌時冒賑獄竟制府隴西公清釐各屬倉庫六月中本府

張公燮以余虧短倉糧一萬六百石聞功令方嚴事且不測合

家惶懼而制府批牘尾云伏羌縣虧短倉糧一萬餘石楊令接

自前任係向來積習固無足怪但倉貯豈可虛懸應勒令賠補

着道府督同委員採買勒限於歲底具報通完余之接伏羌也

前任尤令永清虧短倉貯實有八千餘石尤令已遣戍項歸無

着八年軍需墊用不准報銷之款亦有一千餘石隴西公不待

籲求即能洞鑿公向有嚴刻名余不知何以得此於公也是冬

年穀大熟民情踴躍候補令黃公家駒來縣採買余典質丐貸

得七千金而萬石倉糧已有盈無絀矣會稽陶公午莊廷珍來

署定交有唱和詩存卷中午莊辛卯舉人為篁邨先生名元藻

長子博學工詩文以大挑來甘借補

古

肅州州同
卒於任

乾隆四十八年癸卯三十一歲

在伏羌修朱圉書院漢平襄侯姜公祠與書院接近年久傾圮

因修葺之為立碑記

碑文存文鈔中後二弟揆題其楹曰九伐出奇兵斗膽常寒司馬膽三分膽重奇寸

心不負卧龍
心人傳誦之

十月修縣城充武闈同考官

乾隆四十九年甲辰三十二歲

在伏羌自辛丑年蘇四十三作逆雖旋即蕩平而逆回之習新

教者芽孽其間陰圖報復伏羌訛言日起石鼓鳴

邑西南天門山有石鼓相

傳鳴則
兵起

民家豕生象

正月南城民家豕生象甫生即屠之來獻鼻甚長皮蒼黑色居然象也

余心

竊憂之上年已修築縣城二月請大加減糶以備庫貯

後嘉勇公據以

入奏奉

旨俞允令他州

縣仿行之詳石峯堡紀畧中

及至四月而田五起事伏羌向

未設兵余聞警卽召募鄉勇修守禦具設立堆卡每日所費不下數百緡或曰賊勢尙遠如此糜費其如虧空何余曰虧空事發所斫者惟某一頭耳較之一城生靈全家性命孰輕孰重耶未幾而賊掠固原攻靖遠擾安定勢漸猖獗而城中馬稱驥等約爲內應五月十四日馬映龍馬宏元等以逆謀首告十七日偵知通渭城已陷又獲賊營姦細丁再鶴訊知與馬稱驥等通信云大眾明日卽至屬其接應因召集民壯鄉勇於十八日辰刻擒捕馬稱驥等持械拒捕當時格殺者四人餘皆就縛正飛稟請兵並聲明擒獲內應而賊已大至郭外民居焚燒殆徧火

光燭天時城上民役已有四千餘人伏羌舊有獵戶鳥鎗不在禁例余已調得三十餘名每發必中中輒洞胸達腋賊甚畏之惟惜其少耳余懷印佩劍率同馬映龍馬宏元白中煒武其舉魏輔君上城督禦馬映龍等各守一門余同馬宏元守北門爲賊匪出沒最要處也賊百方攻圍鎗箭雨集城上亦矢石交下斃其首從百餘人相持五晝夜而援兵不至二十二日午刻登城樓見有騎步自南而來穰穰無數至二十餘里外頓兵不進是夜賊攻圍益急眾心驚疑以爲賊黨續至也余以爲隊伍整肅必係官兵雖好言撫慰而心亦憂懼欲往偵探而難其人因念獄中有積匪李五者其人可使也遣役脫其械呼之來謂曰

官兵已至第未知領兵者爲何人爾能於二十里舖探一實信
卽免爾行竊之罪並拔爾爲頭役卽以印稟付之李五欣然縋
城而下時天尙黎黑至日出時李五回亟挽之上見其胸懸銀
牌心竊喜詢之曰領兵者總督大人也投稟卽喚入帳中問城
未破否爾本官在城上否卽命賞銀牌付文書令速回城云今
日卽與賊接仗矣傳諭爾本官小心守禦毋以官兵已至稍有
疏忽探懷出文書果制府印信也內批稟一銀牌十面所批卽
係十八日擒拿內應及請兵之稟曰危城困守烽火連天不意
書生當此重任抒丹保赤實堪嘉尙所有馬稱驥等持械抗拒
其爲賊匪無疑卽於城內正法不必解送大營致滋疏悞馬映

龍白中煒等協力守禦實屬知義之人先給與銀牌該令並給袍套以示獎勵不日當賞之以武弁劊付也余卽以銀牌分給馬映龍等以批稟傳示四城歡聲如雷卽令典史葛崇仁將獄中內應各犯斬訖以木匣封貯首級以備查驗午刻官兵與賊接仗互有傷損二十三日復接仗殺賊五百餘人賊匪膽落是夜不復攻城先是賊眾屯於天門山連營如積雪每夜下攻城寂無燈火是夜忽列炬數千侵晨遁矣二十四日制府至城下余縋城出見慰問之餘相視隕涕問需兵否余曰大營正當勦賊之時豈能多分兵力得烏鎗兵五十名弓箭手五十名協同壯勇固守足矣馬映龍等亦出見制府慰諭久之賞給千總把

總劄付有差命涼州朱都閫率兵百名入城分守四門是日賊走秦安制府亦卽拔營前進是日余始回署叩見 太夫人舉家感泣謂邀 神明 祖宗之佑幸獲再生也嗣後搜捕餘匪查被難傷亡之戶殊少暇日賊眾據石峰堡隴西公以通渭失守事逮問英勇阿公督師進勦嘉勇福公爲陝甘制府七月初五日石峯堡蕞事伏羌始撤守城兵民朱都閫辭去先是捕得賊首張文慶之子張太解送靜甯大營張太以舉發內應憾馬映龍甚因稱圍伏羌時馬映龍與伊父通信約五日後獻城因官軍速至未果當奉飛檄逮馬映龍至靜甯質訊余慰之曰誣詞耳無慮也此行吾與爾偕至靜甯求見英勇公公曰助爾守

城者回民馬映龍耶其人詐也五日後卽獻城矣余曰首舉發
內應者馬映龍也彼果欲獻城將約爲死黨何肯舉發且獻城
必於五日後者俟守者力盡也伏羌向不設一兵某又係書生
民夫皆烏合之眾賊至卽獻耳何必五日英勇公意解又曰彼
馬得建之子也其父以新教伏法其子安肯助汝余曰彼固感
天恩及公恩也公矍然曰吾有何恩余曰四十六年馬得建之案
當吏議已照叛逆律具牘公以其餽送馬明心銀兩在蘇四十
三未起事之前與從逆者有間入 奏免其緣坐馬映龍與某
言及時時感涕欲得一當以報公且雪其父新教之耻耳公曰
其人來否余曰已交靜甯州收禁待訊矣公曰爾願保之乎余

曰非惟某願保之伏羌同守城者均願保之時白中燁魏輔君
俱在靜甯卽具保狀公喜曰我固疑張太之誣陷也立命出之
獄與余偕歸事後余常謂人曰昔陳卧子先生招降許公子而
不能免其死常以爲恨然許都固身爲叛逆者也馬映龍助余
守城首發內應而以誣枉死余如坐視不救何面目見隴西人
士乎是秋從兄拱以時疾卒於官舍冬 太夫人抱病甚危得
良醫而愈歲暮城外時有訛火緣兵亂之後人心未定故也

余作伏羌紀事詩王述菴師序之同作者陶午莊家簣山之灑事已入紀事詩註中及石峯堡紀畧者茲不詳載

乾隆五十年乙巳三十三歲

甲辰七月軍務告竣余以守城功經制府福嘉勇公保

奏奉

旨送部引

見伏羌受代有日矣二弟在京邸聞伏羌被圍驚悸成疾事平後遣家人至署問太夫人起居太夫人亦念之不置欲往京邸看視徐宜人父母僑居沛南亦欲順道歸甯遂於正月十二日挈幼弱輩自伏羌啟程以爲余卽入都引

見後或得遷擢卽偕至任所也不意余爲蜚語所中謂余冒銷軍餉擁厚貲是以眷屬先行矣制府於是百端齟齬所報軍需如守城民夫等十八案無不苛駁甚至以濫應七千金劾奏勒令追賠幸

聖明洞鑒

硃批知道了不必深求急辦欽此得分限八年完繳三月 戊

刻西城樓火時本府遇公

昌

在縣相戒勿妄動城樓居高不致

延燒民家遣役約束回漢民人不必往救恐夤夜或生他變也
余隨遇公堅坐待之至四更火始熄次日上城檢視餘燼見女
墻有利刃一朶口皮繩長五丈許垂在城外皮繩守城時所用
物因令幹役密捕得奸民王錫余隨遇公訊之云伊與革役王
宗田俱掠得回民婦女余斷歸其夫伊與王宗田俱被柳責因
懷怨恨同謀於城樓縱火俟一城人亂卽戕官殺掠且誣罪於
回民之復反也急捕王宗田已遁去遇公將王錫具文解省余

遣役四出捕緝旬月絕無蹤迹四月北鄉里長報崖下有屍余

往驗面目已腐吏役曰此王宗田也因申請本府並拘伊家屬

細驗衣履及足底斑痣其妻云王宗田平時嘗言脚底有痣必大貴相符即申請臺

府王錫伏法案始結而制府嫌終不釋不令交卸環縣汪令名

琳琳被劾復以余曾任環縣令分賠虧項署中搜索一空自入官

以來困頓煩冤無逾此年者而太夫人入都資斧之外未攜

一錢二弟京官本貧一載支持亦已典質殆盡逋負不少是冬

始委候補令沈公名維基字香琳接署余於臘月十九日卸伏羌事是年

次女德嫻生於沛甯寓舍

乾隆五十一年丙午三十四歲

正月赴蘭州時已卸事而虧累已多署任不能結報時述菴師
爲西安廉使因遣人往陝西告貸咸甯令莊虛菴浙臨潼令蔣
玉子驕昌皆舊交也俱分俸相助得二千餘金在蘭州假貸又
得二千餘金交沈公歸欸得結報請咨時已五月杪矣復捩擋
私累於七月中旬啟程北上出省垣時篋中止餘數十金耳至
西安述菴師因河南伊陽民變赴陝州防堵賴諸同好伙助九
月至汴梁謁中丞畢弇山師留住節署時洪稚存錢獻之坊徐
友竹堅方子雲俱在署王秋塍復以縣丞攝鄆陵篆亦時至省
吳竹嶼先生泰來主大梁講席排日爲文酒之會而余心怍怍
不知京邸近作何狀月杪中丞贈以五百金爲輿馬之費十月

初旬自汴北行是歲天氣早寒冰雪塞道過孟縣見張氏妹復

小住五日偕妹婿

名湜字澄子

同行至良鄉二弟來迎詢京寓光景

窘甚知徐宜人已挈幼弱來京家鄉親友以余有遷擢之信接踵而至寓中食指浩繁而炊火往往斷絕問三弟何以不來曰兩人同一衣余出三弟卽卧牀不能起也到寓叩見太夫人悲喜交集橐中尙攜二百餘金稍爲部署已投咨文未及引見而嘉勇公亦由甘肅入

觀余迎至涿州於行館晉謁曰爾尙未引

見耶非秋颿

謂舟山師

書來余不知爾之貧窘一至於此也余誤聽人

言矣因問家事甚悉公嗟歎久之曰令弟中翰某余久聞其名

蓋弇山師亦爲延譽故耳十一月引

見奉

旨仍回甘肅以知州題補嘉勇公贈以三百金令卽奉 太夫人

回甘余至邸第謁謝慰諭甚至次日二弟於直廬見公傾襟共

語謂他日功名必然遠大京居清窘何不乞假赴甘臘月十九

日三弟偕張妹婿奉 太夫人安輿先行至孟縣度歲余偕二

弟於小除夕出都眷屬仍留京邸

是年顧立方孫淵如徐朗齋原名嵩改名鏐慶舉於鄉

在汴梁接隨園師書云接手緘并伏羌紀事詩當亭烈士讚老

夫讀之喜而不寐昔鄧遜齋師嘗云吾門下有一文一武武爲

阿廣庭中堂文卽某也所謂文武尙係二人今蓉裳以一身兼

之猗歟盛哉。

乾隆五十二年丁未三十五歲

正月至汴梁偕二弟謁弇山師於節署時淵如來汴元夜高譙

妙選佳吟演沈桐威起鳳才人福新劇本竹嶼先生稚存獻之

子雲諸君俱在座詩篇酬和極一時之盛弇山師選刻吳會英

才集二月稚存淵如北上應禮部試余偕二弟亦別弇山師西

行至孟縣小住旬日奉 太夫人啟程四月抵甘境三妹壻嵇

蓉圃名承裕署會甯尉 太夫人在會甯暫住徐宜人亦出都

至會甯署初十日偕二弟赴蘭二弟爲嘉勇公延入幕府余回

伏羌卽題補靈州 太夫人率徐宜人兒女輩於六月來署署

任沈公患瘵疾七月歿於寓余爲經紀其喪所虧公項二千餘金爲擔認彌補令其族弟良玉護其喪歸八月次子承惠生是年臺灣林爽文作逆

上命嘉勇公督師進勦二弟於九月來十四日 太夫人壽辰稱

觴上壽十月奉准題補靈州部覆二弟赴方伯福公甯之招同

詣省垣十一月初十日抵靈州任事 太夫人同眷屬於二十

六日到署顧立方成進士孫淵如以第二人及第

乾隆五十三年戊申三十六歲

在靈州四月奎文書院落成前任廣公名玉創有基址余踵修

之有詩云後來卻占談經地始事無忘種樹人兼製碑文勒石

三
年譜

三

書院中二弟入制府勒公幕

今川督威勤公

九月三弟回錫就婚二弟

自蘭州來署靈署西偏書室數楹歲久傾圮余修葺之植紫荆

十數株二弟顏之曰荆圃是年始編唱和集訪薦卷師常公逝

世久矣家貧甚長子

名錦三子名

鈞皆業儒余州試拔錦第一

鈞第三次年皆遊泮令入書院中肄業時周給之

乾隆五十四年己酉三十七歲

在靈州五月三弟偕弟婦吳孺人至署一堂侍奉妯娌敦睦慈

顏大悅十月二弟回京秦壻

承需

來署就婚

乾隆五十五年庚戌三十八歲

在靈州箕谷叔到署主講奎文書院六月長女出嫁

以署東偏公館為青

廬秦壻備儀從親迎如家鄉禮滿月回署七月二弟補授內閣中書旋入軍機處行走纂修

萬壽盛典

乾隆五十六年辛亥三十九歲

在靈州三月三女德華生箕谷叔南歸延蘭州秦曉峰太史名

維嶽

主奎文講席是年廓爾喀侵擾衛藏

上命大將軍福嘉勇公督師進勦取道由甘肅湟中入後藏界公奏請軍機人員隨行二弟預焉十一月接邸報並二弟書余即束裝馳赴蘭州在道奉制府檄令稽查西甯一帶臺站於安定途次謁見嘉勇公偕二弟同至省垣大將軍駐師五日即拔營

前進時隆冬寒冱崑崙以西層冰阻塞道路險絕余送至西甯
之丹噶爾執手欵歔而別

乾隆五十七年壬子四十歲

在靈州三月三弟入都應京兆試並為二弟照料家事五月遣
家人余忠壯役石中立由川進藏八月抵帕朗古大營見二弟
時廓爾喀酋長畏懼乞降大將軍據情入

奏班師有日矣二弟以軍功陞授內閣侍讀

賞戴花翎十月余充武闈同考官

外兄顧立方卒於蘇州教授任
余為位哭之慟時斐瞻傳爰皆

歿矣為輯其昆
季遺藁得十卷

乾隆五十八年癸丑四十一歲

在靈州五月大將軍嘉勇公自廓爾喀班師七月回京二弟奏對稱

旨卽補內閣侍讀未及旬日

簡放四川川北道三弟回錫接長妹赴川北署二弟於十二月抵任

乾隆五十九年甲寅四十二歲

在靈州是年 太夫人六十壽家鄉俗例凡遇五十至百歲正壽俱於元旦稱觴因 太夫人是年欲赴川北任於元旦預慶靈州士民均製錦稱祝慈顏甚喜三月三弟至署奉 太夫人安輿赴蜀以天氣漸暑俟秋涼時就道諏吉於七月二十六日

太夫人自署起程三弟暨吳孺人隨侍偕行八月初二日至

同心城靈州所屬離城已五百里涕泣拜別

乾隆六十年乙卯四十三歲

在靈州是年湖南乾州苗匪石柳鄧等構逆二弟隨和制府軍

營前赴苗疆福嘉勇公亦自滇黔至合兵進勦湖北教匪滋事

陷當陽縣秦曉峯太史入都延涼州郭雪莊進士主講席雪莊博學工詩凡書院諸生每月課文二次時官閒無事

余借雪莊及侯生士驤周生為漢陸生芝田兒子夔生逢諸生課期即至書院分題作詩俱編入唱和集中是年隨園師入旬

壽辰書來示以自壽詩十章余如數和之寄江甯

嘉慶元年丙辰四十四歲

在靈州二弟以軍功陞授四川按察使達州教匪滋事破東鄉

縣陝西西鄉紫陽等縣教匪亦句結起事制府宜公縣率兵進
勦平涼令嵇承裕隨營赴陝

嘉慶二年丁巳四十五歲

在靈州歲饑州屬同心城有搶奪之案里長張皇具報云鋪市
俱閉合署驚疑余曰此饑民耳無慮也卽單車馳往慰撫之卽
具稟請借口糧一面卽開倉散給並設立粥廠將搶奪爲首者
械示數人民情帖然時省中已有所聞大府遣人密訪得余稟
乃安是年苗疆軍務告竣二弟奉

旨加布政使銜食二品俸旋授甘肅布政使而達州教匪勢益猖
獗總統宜公 奏留二弟在川總理糧餉秦壻承需以州同銜

投効入川十月軍機處傳

旨飭查古長城遺址大府檄余同教授張君

汝驥

分途查勘徧經

固原花馬池甯州平番諸處繪圖貼說進

呈余因作長城考

嘉慶三年戊午四十六歲

在靈州三月 奏署平涼府知府卽赴省城於六月初六日抵郡任事秦壻以投効未准自蜀回甘徐宜人挈兒女輩於九月來郡先是嵇容圃妹壻署平涼縣事旋赴軍營三妹在平涼僦屋居住余以本任眷屬在署大令徐君寅爲余租賃民舍與三妹連牆而居闢一小門以通往來骨肉歡聚每日惟聞笑語聲

也冬杪容圃自達州軍營歸是年聞隨園師訃在
隱龍寺爲位而哭

嘉慶四年己未四十七歲

正月初三日

高宗純皇帝升遐

皇上親政二弟在軍營奉

旨着回甘肅本任余於春初卸平涼府事卽委署甯夏水利同知
四月二弟到平涼在寓留住七日時余尚在甯夏也遵迴避例
於二十七日交篆起程記余己亥年四月二十七日到蘭州今
於己未年四月二十七日卸事二十年月日相符若有定數焉
五月抵省見二弟於藩署記湟中別後又八易寒暑其間經歷

危險備嘗辛苦握手淚濟濟不能止藩署有揖峯書屋丁未戊申間二弟入福方伯幕時所居也彈指十年客竟爲主改署爲桐華吟館東徧有射圃歲久荒蕪二弟修葺之顏曰藝香圃中有見山亭憶鷗小艇花木蕭疎頗饒佳致暇時觴詠於此靖遠令黃藥林先生二弟受業師也亦以例應引避卸事來署周生爲漢陸生芝田偕兒子夔生在署讀書甘藩事簡午後二弟紉衫樓履偕至藝香圃談詩鬪茗爲樂九月菊花盛開日有詩酒之會小春雪後一鐙相對吟詩至夜分不寐是冬編唱和集成付梓余兄弟均作序言韋友山洪稚存先後遣戍出關二弟贈之衣裘余至河橋送之臘月奉

旨調任四川卽卸篆啟程除夕至平涼度歲雖滿堂燈燭兒女青

紅而別緒匆匆倍難為懷矣是年八月次女德嫻許字蘭州太守龔海峯先生之子瑞穀海峯名

景瀚福建閩縣人

嘉慶五年庚申四十八歲

正月初四日二弟生辰余為設燕平涼僚屬來均來稱祝初五

日啟程赴川余送至白水駟接制軍檄時制府為松筠公云教匪竄擾

鞏秦階一帶合二弟率兵前往堵勦卽日仍回平涼調固原各

標兵於初八日統兵赴秦州駐軍伏羌寄余詩云當陽山勢鬱

崔巍莽莽風沙望眼開誰信書生十年後懸軍親領萬人來阿

兄昔歲捍孤城萬眾登陴一膽并今日嚴城聽鼓角賢侯條約

尚分明白眉兄弟本超羣爭傍旌門問使君手捧壺漿還下淚

陣雲深處憶慈雲謂馬映龍馬宏元兄弟也三月遣承憲南歸

就婚德清沈氏其婦翁名朝宗號葦塘曾為甘肅秦安知縣仇爽有吏才余之執友也今任南河山安同知

四月賊匪竄回川境二弟即赴川藩任五月余赴省請咨北上

由平涼挈眷屬至青門關中久旱天氣酷暑不能前進因僦屋

暫居方伯台公名台斐英阿甘肅舊交也贈以路費於七月二十五日起程

安陽趙渭川希璜留住數日錢生清履適署湯陰令亦來謁晤

翦燈話舊恍恍如夢九月至保定省城時秦壻署經歷事眷屬

在寓小住余入都十月掣籤得戶部廣東司行走徐宜人於

十一月來京寓居官菜園上街京華親舊馬秋藥光祿履泰盛

甫山典籍

情大

張船山檢討

問陶

汪劍潭助教

端光

趙舍人

懷

玉

及諸同鄉在京者時相過從劍潭令子竹海

名全泰

竹素名

全德

俱負奇才余贈以詞訂紀羣之交吳穀人庶子

錫麒

法時

帆學士式善

李舍人鼎元

亦過訪定交

嘉慶六年辛酉四十九歲

在京師與穀人時帆諸公為詩文會一月一集或於崇效寺或

於陶然亭或於詩龕及諸君寓齋每集論文角藝為竟日之樂

六月朔京師大雨如注三日夜不止桑乾河竟成巨浸都城外

及近畿州縣民居漂沒淹斃者不可數計

聖心焦勞遣官四出拯溺振災

躬詣三壇祈禱七月天始霽六月中雨時作時止無終日晴霽者每

見有片雲起雨即盆傾而下城中官民房屋傾塌大半余居湫

溢時有覆壓之患牀牀屋漏苦不可言張船山檢討紀雨詩云

屍橫林影外屋走浪花中蓋紀實也余和之詩存集中是年秋

試因貢院積水號舍傾頽改期於九月舉行京師老輩銷寒銷

夏向有雅集余與陳石士庶常用光玉方比部希祖姚春木公

子椿周生為漢為延秋會穀人時帆諸公皆與焉以迓新涼且

喜霽也石土工詩古文今官編修友誼肫篤與余為忘形交玉

方其從姪湛深經學篤行君子也春木余同歲生今四

川方伯一如先生長子負異才工詩古文辭
九月吳穀人先生乞養回浙余有長律送之存集中十一月大

司農朱石君先生舉余爲會典館纂修十二月兼陝西司坐辦
司事

嘉慶七年壬戌五十歲

在京師二月移寓虎坊橋二十日會典館開

在內東華門
國史館之右

二十

四日龔堉入贅五月莫韻亭侍郎

瞻慕

李滄雲京兆

葵

暨墨莊

船山諸同好共五十餘人以余與法梧門學士賀虛齋侍御

賢

志 祁鶴臯郎中

韻士

謝薌泉儀部

振定

俱五十初度合觴於正

乙祠雅歌引觴談讌竟日薌泉有自壽詩余和之存集中滄雲

墨莊作五君詠六月移寓魏染胡同蓮趺大兄

掄

來京謁選留

住寓齋閣別二十餘年其話離悰悲喜交集兄著有春草軒詩

詞集余為編校作序七月兄因選期尚早買舟回錫是月相國
長白慶公富陽董公暨各總裁 奏以學士汪公滋曉及余為
會典館總纂修官因具呈請代

奏於賢良門謝

恩自是余偕汪公到館辰入申出以為常按月進書校勘事繁不

能兼顧部事辭陝西司坐辦

汪公號薰亭今官內閣學士禮部侍郎時已六十餘精神如四十許

人聰強敏達於朝章國典尤所諳悉
與余為丁酉同年待余誼極敦篤

九月沈葦塘以河工投劾

入都引

見留住寓齋十月承憲壻請來署十一月龔海峯以蘭州守來京

引

見痰疾暴發卒於邸舍余哭之哀

海峯深於經術詩古文氣力雄厚得韓歐宗法在川陝軍營屢

著勞績其堅壁清野議尤為卓識余題其喪次云君曾堅壁出奇謀小試經綸終未竟千秋志業我恨名山孤夙約縱完婚嫁更誰同五岳遨遊未竟千秋云以其說經諸書尚未卒業故也

嘉慶八年癸亥五十一歲

在京師晨起詣館日昃始回是秋總裁以進呈書冊日多 奏

添總纂修官二員一為禮部員外郎銳齋汪公

德鉞

一為內閣

中書雲素葉公

繼雯

二公俱博聞多識著作宏富勘書之暇各

以所業相質余雖舛陋得咫聞多矣是月袁蘭邨

通

自江甯來

京隨園師長君也孫淵如劉松嵐

大觀

繼至余約諸同好於陶

然亭雅集至者二十餘人各有詩蘭邨侷雋才詩詞工雅余

深幸吾師後起有人勝於歐陽叔弼蘇叔黨也自是過從甚密

九月彭文勤公卒於邸第余哭之慟傷知己之不再也是冬偕

蘭邨暨謝菴吏部枚程春廬駕部同文吳蘭園大令自本陳雲

伯孝廉文述邵蘭風上舍廣銓為詞社分題按譜月凡三集謝

菴之子廷烺暨夔兒亦與焉臘月謝菴患時疾卒此會遂罷其

微波詞余為作序廷烺刻以行世蘭邨編燕市聯吟集成除夕

偕蔡浣霞儀部鑿揚程春廬陳雲伯戴春溪孝廉鼎恒為祭詩

之會是年王述菴師刻湖海詩傳成郵寄來都

嘉慶九年甲子五十二歲

在京師二月袁蘭邨南歸五月姪慧甥顧筠自四川藩署來應

京兆試得二弟書知痰飲舊疾是年增劇右手風痺不能握管

弟向與余信雖軍務倥偬必手書是年忽倩人代寫紙尾或親書數行模糊不能成字

時余心竊憂之既

又念甥姪能遠來應試弟自量精力尙可支持服藥調治可望痊愈也六月朔日甥姪赴監考到回寓凶問忽至驚慟摧剥不知所爲又念堂上高年遭此慘變不知何以爲懷萬感交縈寸腸欲裂卽爲位於壽佛寺率孤姪慧暨兒女外甥輩成服如禮京華親友俱來弔唁有相對嗚咽失聲者陳笠颿觀察預輓聯云可惜斯人未竟其用一時朋舊皆哭之哀紀實也法時帆馬秋藥陳雲伯諸君皆有輓詩均極哀愴制府

奏到

聖心軫念隨征勞績著照軍營病故例

賜卹

贈太常寺卿廕一子知縣

諭賜祭葬余詣館涕泣告歸總裁以會典將次告成不准乞假十月孤姪慧偕甥顧筠南歸時已接川信知九月下旬三弟奉

太夫人及眷屬扶二弟靈櫬沂川江南下二弟歿後因故鄉無一椽可庇陝西方葆岩中丞爲買宅於江甯之常府街姪慧等先回江甯守候余移寓保安寺街

嘉慶十年乙丑五十三歲

在京師三月遣

兒子

承憲回江甯省覲

太夫人四月進呈書

冊內錯寫

世宗憲皇帝廟號總纂汪

德鉞

纂修楊

樹基

校對邊

廷英

均奉

旨革職各總裁俱革職留任又奉

諭館書不可草率當悉心編纂每月進十五冊程春廬

同文

補總

纂修官余偕汪公供職如故閏六月移寓兵馬司前街蘊山三

兄偕江西先方伯來京相聚七日為序其雙梧桐館詩集秦小

峴先生以淞江方伯入覲改官京卿相見甚懽互以詩文相質

證七月大兄來京謁選十一月選得浙江台州府天台縣大兄

無子余以次子承惠繼兄後世父笠湖公係大宗不可缺家

孫也

有告文詳家譜中

臘月十九日在小峴寓齋為蘇文忠公壽讌同

人並集各有詩二十三日承憲自江甯回京大兄挈承惠於二十四日南歸赴任是年十月二弟靈櫬回錫以山向未利厝嶧峒灣 祖塋之側

嘉慶十一年丙寅五十四歲

在京師自二弟歿後京寓窘甚饔飧或至不給逋負盈千衣裘俱付質庫典琴書數券齒日汲汲不暇又念 太夫人年高不能侍養心輒驚悸不甯每日入館修書意緒煩亂恐有脫悞時深惴惴同人咸怪余舉止之失常也六月得三弟書知 太夫人五月初忽然嘔吐脾胃作痛病勢甚劇余益憂懼每聞人大言疾步則蹶氣震怖心趯趯不能止七月二十一日復得書云

太夫人病稍間能進糜飲醫藥調治可冀就痊余憂疑不釋
決計告歸將架上所貯太平御覽文苑英華冊府元龜十三經
廿一史諸書質於查小山比部有圻得三百金爲舟車費諸逋
未能償令夔兒暨眷口暫留邸寓俟太夫人病體康復仍來

京也次日得瀚中承惠來信蓮跌大兄以六月朔日病歿省寓

身後積逋纍纍旅櫬未能旋里於張相公廟爲位而哭驚怛欲絕嗣後心

事益加煩懣而合家均欲南歸矣八月料理逋負尙無端緒九

月初五日凶訃忽至太夫人已於八月初四日棄養呼搶哀

號肝心摧裂三日設靈成服在都親友均來弔唁賴汪薰亭秦

小峴錢裴山陳石士陶琴垞章鴻暨諸同好厚加賻贈於十月

十二日挈眷出都京師初八日大雪雪後途路艱阻難行二十

餘日始達兗州而盤費已罄幸陳笠颿觀察助以百金觀察親至城外

陪慰情誼拳拳並遣役護送真古道交也始得前進行至中山店復遇大雪車膠馬

蹶每日只行四五十里而苦不可言矣冬月初旬至臺兒庄買

舟南下運河水涸糧艘阻塞泊舟岸側二十餘日至冬月杪尾

糧艘而進每日亦只行四五十里臘月初至清江浦沈葦塘陳

雲伯陳司馬梅岑名熙隨園同門生時為蕭碭同知均來舟唁慰各有賻助葦

塘留住數日舟抵揚州鹽政額公伊墨卿太守秉綬趙味辛司

馬時以主講俱在揚州來唁余渡江由陸路至江甯匍匐入門哀號欲絕

一棺在堂音容莫覩痛哉三弟大妹暨外甥輩聞余至一時奔

集滿側承惠亦自錫來甯匝月矣相持慟哭不能仰視時已逼
歲暮繆帷鐙黯慈靈杳然與弟妹相對述老人病時事無日不
涕泗橫流也是年二弟

諭塋成於十二日安葬余到時諸姪皆在錫次日五姪慧六姪承

慈歸大姪

承懋

以塋前立碑種樹各工未竣留錫度歲

嘉慶十二年丁卯五十五歲

正月偕三弟暨

承惠

回錫十七日辰刻抵家眷屬住先世父笠

湖公營橋舊宅計余離家已二十九年矣先至北里舊居雙梧
樹久摧折平無存門徑亦稍改此屋余赴甘肅後蘊山三兄居
焉三兄時客江右其寡媳暨姪女出拜俱不相識至營橋宅見

二嫂暨吳氏姊容鬢俱改相視驚疑四五日內親友陸續來視
余惟外兄邵柏亭昆季年七十餘矣見面尙能認識其餘則問
名始知耳見周氏顧氏兩姑母 先大夫鸞溪公胞姊也俱年
逾八十白髮垂垂細詢舊事嗚咽隕涕二月朔偕三弟大姪

懋承憲承惠兩兒至擘峒灣

祖塋 先大夫墓松楸鬱然堂廡如故瞻拜馬鬣伏地悲慟是日
請地師周視兆域言今歲山向大利擇於臘月十九日巳時爲
太夫人奉安窀穸次日至馬鞍塢繡嶂街

祖塋又次日至二弟楊溪

諭塋距擘峒灣祖塋四里許平壠縱廣可二十畝前臨大河坊表

穹崇墓前翁仲羊虎森列氣象宏敞洵吉壤也

天恩高厚九原銜感矣惟念當日與弟倡和有卜宅蓉湖繞綠楊之

句又詞云屋住東西山大小此時心早向當初諾何此言未踐

先我而歸黃土也為之一慟弟又有句云吳儂生愛沿溪住只買平田不買山地名楊溪竟成詩

矣識三月伊墨卿趙味辛過訪四月偕三弟回江甯拜隨園師墓

蘭邨邀至隨園記少時遊歷之處山水亭榭依然而哲人其萎

人事變遷感愴無已幸蘭邨酷嗜風雅克振家聲吾師所云園

林有主水雲安也五月至維揚訪阮芸臺中丞時居憂在家並墨卿

太守因晤儲玉琴韋友山樂蓮裳孝廉蓮裳名鈞工詩文余識之於京邸茲復晤於邢

上與吳白庵名照南城人陶適齋先生弟子也江鄭堂名藩江都人湛深經術博學多聞定交

月杪仍回江甯姚春木偕其弟建木名樾亦少年雋才也自蜀來甯秋試

延余至五松園淵如觀察舊居春木借寓其數晨夕商略文藝試畢春木回

松江姪承懋兄弟於八月二十六日北上謝

恩謁選余移寓常府街宅三弟於八月初旬赴錫料理 太夫人

靈櫬旋里諸事九月十二日回江甯

公手定年譜止於是年九月以後八年敬依行述補編一齋謹識

是年十月奉顧太夫人靈柩回錫安奉惠山家祠旋赴杭州清
平階中丞聘主衢州講席十二月返錫十七日奉顧太夫人柩
至嶧峒灣啟鸞溪公之兆合焉

嘉慶十三年戊辰五十六歲

二月赴衢州主講正誼書院三月芸臺中丞蒞浙延主詁經精
舍時洪稚存先生亦來杭州招邀同住與吳穀人陳桂堂郭頻
伽宋小茗及積堂趙雱門諸君往來甚密時梁山舟先生年已
八十有六矣偶至湖上輒來相訪與公談論亶亶忘倦旋得方
葆巖中丞書延主關中書院六月回錫東裝八月至汴梁見清
平階中丞錢裴山方伯時陳石士先生典試中州撒棘相見銜

三才集
杯促膝彷彿春明聚首之樂焉十月到關中書院

嘉慶十四年己巳五十七歲

主講關中書院諸生來肄業者二百餘人

嘉慶十五年庚午五十八歲

主講關中書院是科秋試諸生中式二十二人一時稱盛時外
祖蘿裳公攝篆江油作書請公爲蜀中之遊十二月抵江油度
歲

嘉慶十六年辛未五十九歲

正月赴成都謁見制府常明公方有堂方伯瞿秩山觀察曹霞
城太守傾襟延接禮意有加嚴篔簹亭觀察公同年也亦自川東

道任所來省與公剪燭談心感念今昔二月復還關中嗣值有
堂方伯自五臺迎

駕回川過陝晤公訂重修四川通志之約九月遣弁來迎十月抵
成都時李松雲譚鐵簫兩先生在志局總理皆公舊好也是年
八月外祖補授安縣知縣

嘉慶十七年壬申六十歲

正月在成都大府延請分纂諸君如譚靜山編修王東山明經
汪寫阮大令嚴麗生孝廉及公甥顧筠皆在局公與晨夕共事
編纂之暇談詩論文頗得友朋之樂三月中大府諸公修少陵
草堂落成構詩史堂三楹祀少陵於其中公請以渭南陸放翁

配饗諸公是之並作記勒石祠壁暇日與諸公觴酌相邀或偕
二三知己椽鞋桐帽嘯詠其間忘天涯之羈旅也十二月十八
日公六十生辰諸公欲爲公壽公辭先期赴安縣諸公俱遣使
齎書儀來賀雄文鉅筆照耀屏障外祖爲公開筵讌慶合署甚
歡

嘉慶十八年癸酉六十一歲

正月還成都與在局諸公商榷志乘凡山川古蹟風土人物訂
舊志之謬誤者不下數千百條與松雲鐵簫先生議論相往復
咸服公學之博而識之正也二月患石淋症勢極危篤公眷屬
俱不在側親友見公病勢重皆相顧失色外祖聞信來省省視

勤服藥餌凡三閱月始就痊。月公次子子山舅氏聞信自甘肅來川侍養十二月仍赴安寧度歲。嘉慶十九年甲戌六十二歲。

二月還成都時錦江書院講席虛左名大府爲諸生擇師而難其人以公文行兼優具書弊聘請兼主講席是年秋公長子伯夔舅氏自京師來子山舅氏自甘省接眷來川公租寓安置次媳率子女羈角出拜公含飴色喜羈旅中有家庭之樂矣十二月公舊症復發痛楚殊甚漢州牧劉公長更深明醫理投以藥劑病勢漸退。

嘉慶二十年乙亥六十三歲

在成都新正漸能強飯步履如平時讀書日凡數冊伯夔舅氏等在側以舊症甫痊勸公息心靜養公曰吾自樂此非爾曹所知也翻閱如故夏秋之間志局事繁益以書院課卷堆積盈案公隨手批閱頃刻立盡畧無倦色十月中志書將次告竣公以作客久意欲南旋而制府常公暨陳方伯望坡曹廉訪霞城奇觀察瑤圃屈意相留公不忍拂其意遂仍受聘十一月書院解館公以久未至安欲往一視而外祖亦遣人來迎月杪抵署十二月初二日卽病病中猶強起拂拭几席構思作文數篇謂外祖曰吾生平無諾責雖文章亦然也又口授長子作省中諸公書條理井井神明不衰至二十一日亥時忽自起坐曰去矣去

矣反席少頃溘然而逝公少時嘗夢至一處樓臺縹緲見金書
少微垣三字有峩冠者三人迎謂曰三十六年君卽來矣公賦
金縷曲詞有三十六年塵劫盡句詞刻集中不謂顛倒讀之爲
六十三年之讖也

光緒五年己卯孟夏月曾孫婿上饒盧紹緒謹梓



二十一世會稽鏡西公年譜

大清乾隆十九年甲戌七月三十日未時公生為一歲

公母倪生公於八士橋商宅尚書第後院公父雲泉公承公祖春山公之命名曰

振祖取振振繩繩之意取乳名曰大後字端書自號鏡西居士又稱壺中老人時公

祖遊於外公祖母駱在堂公父在家塾從俞北窗師攻學於怡齋樓公從伯祖母張

公伯祖春江公暨配商公從叔祖春洲公暨配趙公從伯月槎公暨配趙均同居無恙公

八姑小姑亦皆在室

乾隆二十年乙亥公二歲

是年公祖遊幕於外公父肄業戢山書院及府試取山陰第一以祖籍餘姚為山會所
訐未預道考十一月二十八日公長妹生

乾隆二十一年丙子公三歲

是年公祖遊幕於外公父肄業戢山書院

乾隆二十二年丁丑公四歲

是年公祖遊幕於外公父肄業戢山書院七月初九日公次妹生

乾隆二十三年戊寅公五歲

是年公祖遊幕於外公父肄業戰山書院公伯科試取入餘姚縣學

乾隆二十四年己卯公六歲

是年公祖遊幕於外公父從李虹舟師讀書餘姚龍泉山及科試取入餘姚縣學九月十八日公次弟生名曰繩祖

乾隆二十五年庚辰公七歲

是年公祖遊幕於外公父攻學在里及秋偕公伯至杭州鄉試公父卷薦而不售

乾隆二十六年辛巳公八歲

是年公從伯受讀按公從伯讀書見於自記而未載上學之期今以古人以歲入小學為斷公祖在山東崔方伯幕中公父攻

學在里正月十六日公三妹生七月初一日公從叔祖遊幕山東卒於郟城公祖遣人

歸柩里門十二月公八姑適后馬周宸木先生

乾隆二十七年壬午公九歲

是年公從^伯受讀公祖在山東潘署公父攻學在里四月十八日隨遷於上望坊大

慶橋白衙衙新宅乃公祖償典於任處泉太守者五月朔日公伯祖生女為公子

三姑五月初三日公祖母卒旬餘公祖自山東旋里閏五月初七日公祖卒於家

半月之期雙親並喪公父肝腸寸裂自謂罪通於天公伯祖以舉人奉文截取
至抗請咨七月二十八日卒於旅邸

乾隆二十八年癸未公子歲

是年公從讀伯受公父以家計感迫至蘇州從鄭璞園先生於臬署講求刑名極意攬擷

先生提攜教誨親愛備至四月二十四日公伯生子名曰培祖後字香書十月公父就錢相人
廉訪分理刑名之聘吳門度歲未歸

乾隆二十九年甲申公子十一歲

是年公從伯授讀公父在蘇臬幕公母嘗口授公唐宋近體詩稍有領悟會偶吟
三絕白公母指示改易喜不自勝

乾隆三十年乙酉公十二歲

是年公從伯受讀公父在蘇臬幕秋公父公伯至杭同應鄉試公伯卷薦不售
場後公父回蘇朱訪^廉因案被議公父留署度歲經理其事

乾隆三十一年丙戌公十三歲

是年公從伯受讀公父在蘇臬幕正月接就楊山齋廉訪之聘四月二十四日公

次弟瘍五月二十一日公次妹瘍公母病甚後具畢備幸而獲痊六月初四日公伯卒於家公自記有曰予幼患疾癰隨伯讀書憐予病不督課程百計覓方醫癰漸消丙戌夏間家病疫予亦纏及伯移榻中堂伴予理湯藥徹夜不眠是時庭前草長數尺東首樓下聞鬼嘯淒慘之狀不堪言况一夕聞有人叩堂扉予母子獲痊伯即染疾竟不起臨沒呼予言曰家事有汝父在我可放心時曾祖母伯祖母妯祖母俱在堂伯母年未三十伯之抱恨九泉為何如耶雖人生壽命有數然是年之病起於予家以薄俗而論有惟恐避之不遠者伯乃伴予焦勞以致傳染且更無料理湯藥如伯之盡心者遠令齋志以沒嗚呼予尚忍言哉八月公父歸里葬公祖父母於謝墅官山墓厝公伯於官山墓另地事定赴館歲暮復

言旋十二月十六日公從妣祖母卒十七日公小姑適白楊朱藝苑先生長林二十五日公曾伯祖母卒為營棲鳧葬地并結壽藏大事層見迭出盡力經理公伯臨終放心一語其平日兄弟相信之深及愛之篤為人世所不易得

乾隆三十二年丁亥公十四歲

是年公讀書西城能仁寺春公父復至蘇州二月就元和周泊莊明府之館九月十二日公仲弟生名曰昌祖後字寶書歲除密雪纒紛公與表兄莫上苑侍公母盼公父歸承諭吟詩詩成公父適臨閱詩色喜

乾隆三十三年戊子公十五歲

是年公讀書能仁寺正月公父錄示琵琶行長恨歌賜昭明詩讀本點句講示
會稽三賦乃_國至元和幕周明_府旋升海州牧公父偕往八月公外祖倪數峰先
生為封樹謝墅墳塋十二月周刺史因案望誤卸任十二月二十四日公三妹孀
公父海州度歲未歸

乾隆三十四年己丑公十六歲

是年公父預延魯揚_菴先生良佐於家塾讀書學文歷六載戚友同硯四

硯四人春公父自海州旋里省視謝墅墳塋四月復就金匱福佑亭明

府之館歲暮歸里

乾隆三十五年庚寅公十七歲

是年公從魯先生學春間公父至金匱幕八月二十三日公三弟生名曰惠祖
後字疇書號可樓十二月公父歸里葬公曾伯祖母伯祖父從叔祖父母
於棲鳧張家山公伯祖母壽壙在焉

乾隆三十六年辛卯公十八歲

是年公從魯先生學春公父至金匱幕三月福明府告病却任公父歸

里七月補歲考二次八月至杭鄉試未售場後至蘇就胡雲坡廉訪之館
乾隆三十七年壬辰公十九歲

是年公從魯先生學公父仍蘇臬幕九月二十六日公娶於陳氏為
諸暨楓橋陳京武先生之女公祖母姊妹行之女孫也生乾隆十七年壬
申五月二十五日丑時公父先期歸里經理焉

乾隆三十八年癸巳公二十歲

是年公從魯先生學公父仍蘇臬幕嘗以書誡公畧云讀書惟十六歲

以上至二十五歲最為喫緊汝姿質平常身體瘦弱二十以前蹉跎過去今已成入亟須
振起精神銳志向上四書本經是根本務要讀得爛熟經文現重於書文亦須悉心
講究詩學陶情適性為士人所不可少者溫故知新久之出筆自然流利所謂文入妙
來無過熟也古人云讀書三到眼到口到心到此缺一不可者也故凡讀書於未讀之先
收其放心然後開卷務將眼心一齊注在書中方為有益書法為出馬鎗詩文做好
字又寫好連詩文亦增色矣至於進退應對自有一種道理雖不可失於浮游亦不可
任意簡畧公自十四五與公表兄丁面封莫上苑篤情豪性無日不相聚吟咏賞樂三人
詩二百六十餘篇題曰西園三子後編後致遺失十月二十七日公伯祖母卒十二月二十七日公
長子生公父名曰廷良後字新田

乾隆三十九年甲午公二十一歲

是年公從魯先生學公父仍蘇臬幕夏間作堂廳後堂額堂院原有雙桂
蓋數百年舊物綠陰對峙黃雪一庭公父西胡雲坡先生季堂書聯桂堂
字摹勒懸之秋間胡公內升刑部侍郎公父接就龍鶴柴廉訪之聘中間
陸厚菴中丞囑胡公訂明歲之局龍廉使固留未允事遂已公父稱胡公才
德兼備宏獎人倫主賓浹洽為生平第一知己送別無錫有別淚半生惟此日
歡顏重庇屬何時之贈歲暮公父歸里找房價初典價九百加修理五十
今憑平確齋先生議找四百五十作為一千四百之數又歸併屋後小屋四間

另給五十加以稅契過割中人書帕等雜費除原典價外幾七百余自遷越城至是始一定住址也

乾隆四十年乙未公二十二歲

是年公從魯先生學春公父至蘇臬幕旋患風濕骨節痛不可忍三月旋里調理八月復至蘇幕九月公院試失利十月初四日公女生公父取名曰心是月公與莫上苑先後至蘇侍公父習刑章歲暮公歸里

乾隆四十一年丙申公二十三歲

是年春公仍赴蘇侍父四月越城大水道路水深三二尺半月始退龍廉使丁
艱五月公侍父歸里公患重瘡公父患瘡瘍旋愈七月公父應孔振斗廉訪之
聘復至蘇幕公瘡未已未侍往七月二十六日家中陡遇龍風頃刻屏扃榻摧
瓦飛垣壞庭桂拔老榦入空中散落里許外冬盡公瘡就痊歲暮公父
歸里

乾隆四十二年丁酉公二十四歲

是年正月公侍公父回餘姚拜先塋勘立上林湖王家菴祖塋界址糾
正游源寺衙口祖塋侵地報官立案垂示時邵二雲太史晉涵有續選姚

江逸詩之舉公父錄寄^公真^公春江公春山公詩若干首貽書備選旋相隨^諸至
幕公父三四年前卽有咯血之症茲復大發立秋霜降尤甚遂辭館攜公歸
里百計調治多服葢劑十月初四日葬公伯祖母於棲鳧張家山前結之壙
氣與蟻公父心實喜慰

乾隆四十三年戊戌公二十五歲

是年正月公父起坐如常燈節後令^公從周宸木先生^至和署觀摩州縣業牘
詎公父病勢日重三月諭公歸見公父飲食頓減語音漸低日夜侍側值府試諭令
入場強應屢覆皆前列令誦試草頗色喜日昧學使按臨未至四月初五日申時

公父棄世前期家人更替守夜公父自知不起惟以公十三姑未擇配為
未了事棄世前一日諭公曰汝惠弟姿質尚好可陶成讀書住屋後進
十二間撥與培姪更無別語痛哉痛哉公際此重喪繁費勢不能居
守家園秋間公離家至元和仍依周丈將至蘇州感賦壯歲何因惡故
鄉臨歧別淚忽成行思親兩載同為客歎我孤身又束裝書卷不堪重檢
點人情未必即炎涼秋風秋雨休相逼往事回頭易斷腸八月二十五日公次
子生名曰廷璋後字玉田歲暮歸里

乾隆四十四年己亥公二十六歲

是年春公離家仍至元和依周丈未幾龍廉使召公入臬署辦事
數月五月至上海縣幕友吳厚菴先生款公於署齋旋就王明府學
廉公司刑名之聘時莫上苑先生館上海道署病危公親送之歸沒
於石門舟次公抵家患痢疾秋盡復至蘇與公表弟倪琢其同賦閒
居倪患血症甚重專人送之歸公亦無所遇歲暮歸里

乾隆四十五年庚子公二十七歲

是年春公在家且誨弟輩旋延陳思庭先生課家塾清明後至餘姚拜
先塋五月周淡也先生即宸木丈召公至寶山縣署七月令代陽湖縣徐

明府館事公十三姑字吳下名幕蕭山單竹軒先生渠是時即我家
成禮公母周旋殷至單有信稱謝綦切十月徐明府卸陽湖事公接
就無錫俞西崖明府之聘十一月抵署下榻聽梧軒主人頗雅好相處
幾十載倪琢其先生卒於家聞信感賦有倪三一身烏可死上有八十之
祖父下有二十之妻房嗚呼倪三之祖我之外夫父眼昏手顫餘年苦之句
歲暮歸里

乾隆四十六年辛丑公二十八歲

是年正月初八日公三子生名曰廷奎後字煥田陳思庭仍課家塾公

離家
至無錫幕四月五日阜民臺作注云先大人諱日詩曰墮淚荒臺上

回驚在客邊對花還四月失時恬已三年身世悲心壯雲山望眼穿家

書今夕發叮囑卜牛眠邑之許氏藏書甚富於其書目中見先榜栳山

人集亟向借觀亦非刻本即錄出計古今體一百七十一首不分卷數適

吾姚張君羅山合邵二雲太史素所錄存及振綺堂藏本校刻其古體篇

什與所得許氏本相等七言近體自重峰寺祈雨二律後多增二十八首是稱

完善因即依次補錄冬間歸里葬公父於謝墅官山輿經理初畢臘底復

渡江適俞明府兼署江陰公偕往除日受篆主賓舟中渡度歲

乾隆四十七年壬寅公二十九歲

是年春公在無錫江陰陳思庭仍課家塾秋俞明府調任丹陽公偕至丹聞公外祖病劇念公母憂愁惆悵有甯無重見日將近八旬人不知諸弟在何以慰衰親之句既而公忽患瘧疾纏繞五十日紫牘滿几楨櫛永夜歲暮歸里

乾隆四十八年癸卯公三十歲

是年陳思庭仍課家塾春間俞明府署南匯公渡江至匯夏俞明府回任丹陽公偕歸舊館三十初度詩人生弱冠已非少三十年華真草草時當年父老父客姑

蘇寄語諄事搜討期得名慰晚途功名不易拋書早相從幕下奉宸昏二十

方過年正好一自孤身歎東裝飄零七載形枯槁覓將升斗絲長貧接得平安如
異寶慈親念子不還家今日思親心緒恍依人碌禮節疎自識生辰起清曉堂前
雙燭亦輝煌我卽向天默為禱百年母子同清健布衣敬體食求飽眼前萬事
總等閒一念不闕殊瞭口何時得歸卽歸去嫁衣代作甯爭巧鑑湖八百秋正涼扁
舟兩岸多紅蓼聞陳思庭秋捷寄詩以賀既而思庭北上舟過丹陽贈詩話別
選錄唐詩寄心女詩句掌中一女吟愛吟詩教誦全憑祖母師歲暮未歸有送
友回紹詩句憑君為傳信二月賦歸來

乾隆四十九年甲辰公三十九歲

是年二月公歸里未幾離家至丹陽作壺中老人吟瓦水壺一枝伯祖解元
公文閣中盛水器青白相間中坐一老人貌蒼瘦鬚髮如生余自幼善病祖母常
呼曰壺中老人因即自號吟畧曰壺中之老本非我幼時常覺老態侵遂令一物闖
形似呼作老人慈思深期汝多壽兼遠方憂汝多病甘苦辛撫摩鞠育精力瘁
時光轉眼二十三四春往日追憶舊時語祖母入夢恍見顏依然索飯門東立夢回雙
淚流朱唇而今不聞呼我壺中老我今自謂非無因水壺水壺化烏有形容憔悴莫
與親嗚呼形容憔悴莫與親我今自謂非無因

乾隆五十年乙巳公三十二歲

是年春公仍館丹陽七月有事歸里有七夕抵家詩閱兩弟近藝進境有中
年失怙心猶痛弱弟能文念稍寬慰得慈親笑語家風長此耐貧寒之
詠家中頗有藏書早起繙閱至暮率不出戶有千卷書當千畝田安排如
陌復如阡相看已愧收成薄用力還思子弟賢之向九月離家至丹陽歲暮
歸里為仲弟娶於后馬周氏宸木先生之女本舊戚也

乾隆五十一年丙午公三十三歲

是年春俞明府調任上海縣公離家至上海館公妻弟陳鳳林從弟香書
公皆隨往幕中內子寄題小照詩十年浪跡度韶華卿念他鄉我念家兩地

共圓千里幽懷好伴一庭花多兒未免因兒累百歲總期逐歲加幸有幾竿蒼
翠竹平安長報莫咨嗟披圖已減舊丰姿寄我題詩感夙時繡陌送車花欲
語曉窓催讀鳥偏知貧能忍耐徒飄泊畫縱清幽奈別離是處石欄勤拂拭古梅
開放把雙危聞母病旋里抵家詩鄉近情多怯門臨步轉遲卻看諸弟笑已
報老親知奉養虧前日團圓正此時昨宵愁欲絕漫作夢中疑老母病劇適
俞明府回丹陽任致書相促七月初五日公母卒哀迫營斂痛哭離家至丹是秋
公外祖沒公為外祖倪數奉先生所鍾愛時相唱和每有賜貽逢長夏輒迎
未延綠齋避暑者俾公母得侍起居先生詩酒之暇喜鈔古書嘗手錄白虎
通風俗通以俾藏晚歲多故吟咏自遣彌留時猶誦黃梁熟後夢初醒之句

公感傷甚切彙錄先生詩稿以藏之歲暮歸里歸舟十絕有同是扁舟返故鄉
羨君笑語慰高堂白雪望盡斜陽木江頭我斷腸之詠注語遇錢五亦塘
回里省親云云

乾隆五十二年丁未公三十四歲

是年春公離家至丹陽公仲弟從弟隨往於摒擋幕務之暇與兩弟校訂先緒
峯公詩集付梓完竣因恭集高祖高曾伯叔祖至先大人四代詩彙錄成冊快以
為人苟讀書不得志其抑鬱無聊之思必託諸吟咏迨夫賣志以沒身後所留
僅此如歌如泣之章為子若孫者又復沈淪不偶未能亟為播揚可悲也已設

後無肖子風雅絕微將前人手澤之遺留徒供鼠啣或散諸他氏不數十年有
莫知其誰何者悲更何如耶七月五日先慈週期二弟含淚成詩予亦悲和
云夢中時復接音容醒後吞聲只捫胸家計可憐虧奉養客途依舊苦
彌縫幾篇喪禮何曾讀一載鄉書不忍封并冥荒齋同弱弟泉臺無路哭
雲重歲暮公攜兩弟歸里改魯揚菴先生所題之東武山房為枋栳精舍
繪枋峯公像供奉之

乾隆五十五年^三戊申公三十五歲

是年春公離家至丹陽公仲弟堂弟仍從至十月初一日公四子生名之

曰廷雲後字芳田得第四子詩句又得添丁信居然第四見我愧桑弧志生希
骨相奇多且還自笑已近抱孫時二弟實書因病先歸堂弟香書客常熟公
三弟娶於潘祜塢莫氏燕州先生繼瀛之女本舊戚也歸舟詩有歲事紛且集
親迎草且完東萊傳博議切莫任偷閒之句歸時與紫大蕙圃同舟吟咏

乾隆五十四年己酉公三十六歲

是年春公離家至丹陽公仲弟從至寒食前後公溥病初公得榜棹山人詩集於
無錫許氏是春寄請父執胡雲坡大司寇題序胡公序及雲泉公夙擅經濟助予
不逮詩賦自豪將以山人之詩才榮世而摧柯毀壁知音不再纏綿惋惜悵恨不已

採訂越諺漫題卷首

有評

崇儉樸不比習荒淫之向暮春偕俞明府有事

鎮江舟行謁都天廟登清風嶺歸帆登金山皆記以詩秋俞明府丁內艱去

官張成兩律不堪重記舊時光初到雲陽事渺茫詩卷從頭如許積交情耐久

若相忘共憐才大偏艱遇得救官貧却少方寸載主人分手去看雲獨自計行

藏浪跡知非自在身得逢賢主便情親酒客盡量輸三斗話到投機似一人

涼意初來使蕭瑟麻衣乍見共酸辛練塘留得棠陰在父老難禁滴淚頻

署任倪明府時慶延公仍在丹陽旣而丹徒張禮園明府見招公改館丹徒

三弟疇書舉第一子取名五鳳譜名廷理後未成丁而殤歲暮歸里公仲弟

亦歸家養病是秋患咯血之症

乾隆五十五年庚戌公三十七歲

是年春公離家至丹徒公長子隨侍俄應鎮江太守和騰額潛齋先生之聘政館府署九月遣大兒良回里完姻寄示內子詩禮在何嫌見面遲一家待我放
梅時姻娶於諸暨士族婁鳳來之女連日接家信二弟生一女三弟舉第二男取名
雙鳳諧名廷祿後字錫田十二月十六日生歲暮公歸里

乾隆五十五年^六庚戌辛亥公三十八歲

是年春公離家至鎮江潛齋先生調守安徽廬州府遯公俱行由京口放舟至

廬消暑吟客館何曾有別離
兩三聯榻鎮相宜
香遞紅蓮未別浦
景添白鷺滿高枝
注云署中古樹數稜白鷺約百數棲息其上
江浙間無此景也
內子四十生辰寄示詩持家典盡舊時妝
新製衣衫自採桑
鄭重寄詩無限意
延年先覓解
慈方七月自題漫稿三集
其畧曰余十四五時從師讀書暇卽以我母口授唐宋近體詩教諸弟
曾得白云納涼午後同臨帖待月階前教誦詩又聯桂家聲雖未振
三株畫意更相宜
蓋寄亭公有三株圖合照予兄弟三人同懷足樂
偶然得句亦至情感發也詩不易言無學問以發樞機
不失之淺則失之俗
予自顧何如敢言詩哉
第一生境遇有喜有悲
一日起居有勞有逸
况以作客之身聽雨齋頭思歸枕上可無一二句寫其志趣固不

必計其失之淺與失之俗也予今年三十八矣憶曩時侍母盼父雪飛滿院忽聞
敲門聲急趨出牽衣而入何等歡欣料此生斷不復有其事幸賴舊句藉
可記憶先母親予壽相謂壽可七十此言若驗鏡西漫稿正不止十集已也
客曰君可謂豪於詩矣得意句可舉一二予予曰胸無點墨真如洗詩似
行雲總不粘此即余之詩也涉世豈容隨世轉愛人總不受人憐此即余之
性情也三弟疇書適在座余轉思待月教詩時初不料落寞相依同滯千餘
里外因謂曰可堪虛度年華速負累同懷共旅燈何如讀書燈下生成
團也為之惘々客亦不答窓外秋氣正深梧桐葉戰風雨驟至客懷如此何
以消遣於皖城晤餘姚族兄梧岡得岑氏遺珍一卷自宋秘書公至前明先

世諸公各詩若干首收拾斷簡殘篇頗具苦心因按其行輩有遺事所及知者各綴數語名之曰岑氏一家詩喜得長孫取名阿如詩不解謀生自愧予絕無谷口舊田廬年來收得書千卷要付諸兒又阿如如之譜名景修字永甫九月二十七日生接二弟信知養疾蘿菴詩句且如常日住銷去舊沈疴遣三弟疇書旋里詩白聊為整行裝分手情無限隨時勤檢點我已歎浮生詠石詩注石為先伯月槎公所鑿峰巒洞穴池梁俱備亦傳家之鬱林石也歲暮未歸有餽歲^詩剋歲除日偶成寄內諸詩

乾隆五十七年壬子公年三十九歲

是年春公在廬館二月二十九日公仲弟卒於家公哭以十二絕句以公次子
廷璋為之後承徐大柏菴繪鑑湖泛舟圖四作長古以致之有歸舟林夕裏
浮江渚疎々五月桐花雨多君知我欲歸心繪圖權作南湖主諸句寄三弟詩
流盡長江恨不平得歸何日泛舟輕世情淡去耽吟詠家運衰時失弟兄方
枕聊支尋短夢殘燈獨對怕秋聲相期與雁來江北慰我年來骨肉情寄
示良兒詩語言難盡尺書中江水滔々只向東頭識艱難先世業猶留淡泊一
家既生兒得力全憑長教弟成人不愧翁更囑西偏勤灑掃梅花香裡泛歸
蓬五齡幼子入塾讀書漫成六絕句寄示心女口授之詩中點綴半屬髫年
親歷境地不嫌淺俚也十月初三日公從弟生長子名之曰起譜名廷琪後字

鹿田歲暮歸里巢縣道中遇丁三敬奉有意外相逢又歲邊之句

乾隆五十八年癸丑公四十歲

是年春公離家至廬館贈香書弟詩慰爾慈親望生兒解笑時雪

窓曾畫荻績襦足含飴難得家庭順休嫌歸省遲筆耕當祿養羨然

阿兄知第二孫生取名小如詩客邸匆々歲月新放懷忘是幕中賓拂窓翠竹春

風暖第二孫添正四旬小如新田次子譜名景儀字達甫二月二十二日生七夕定遠道

中鳳陽道上抵鳳陽郡城與主人潛齋先生下榻試院皆有詩春間公三弟在家

營葬母柩於謝墅官山暮秋間至廬客中弟病夜坐詩四野秋聲起慈聽塞

雁過風波驚後險兄弟往時多屢卜憑仙語無眠失夢婆定應卽清健笑語樂如
何弟病初愈詩愛對檀藥竹平安歲月過雁鴻將信去笑語慰懷多負土嗟
予季衝風怨孟婆注云弟病因營先慈葬事積勞并路感風寒所致客居今勿
藥有喜竟如何十月編次公曾祖寄亭公自述增以寄公生平遊歷諸詩文
及已所得聞諸事實以恭互考訂之同公父雲泉公自訂生平心跡題為二
代行畧後歲丁穀峯先生圻撰為序言俯仰悲感同西州再過之痛歲暮
未歸有雜吟詩曰鶴料無多預借籌那能容易說歸休此身似付秦城質
愁看烏雅未白頭注云時有預隔年傭值之事

乾隆五十九年甲寅公四十一歲

是年春公在廬館重題岑氏一家詩末云計丁未至甲寅八年仲弟昌祖下世已二十四月雁行中斷手澤尚新摘其遺詩入卷末不禁淚泫泫下四月離廬郡赴白門自題家園安樂圖註云乾隆五十九年甲寅由廬州至江甯郡署下榻籐香書屋至次年別去就館丹陽計在白下載餘惟以鈔錄勝國及本朝諸老傳畧為事頗疎吟咏六朝金粉與我無緣嘉州集亦於是時從友人借得全唐詩錄出奉為家珍擬付梓而力未逮以待將來按潛齋太守與公契好見之吟咏後十年升淮揚道此際應是調任江甯首郡然籐香辭意冷淡似邀公俱來而當道佐政有人款公別館而

揚榷餘事者今則無能詳考矣

乾隆六十年乙卯公四十二歲

是年春公在江甯郡署七夕就館丹陽主於盧春圃明府署齋為予七載前
舊游有句云未買水雲歸路舫且尋安樂往時富相看竹木清陰滿一笑何
人手植多

嘉慶元年丙辰公四十三歲

是年春公在丹陽館次公三子娶於山陰士族宋氏歲暮歸里

嘉慶二年丁巳公四十四歲

是年春公離家至丹陽館次公長子隨侍題秋林讀書圖有偶題圖
行樂寄閒情總向書中了此生之白嘆窮口號嫁衣代作成何事辛俸
居然百萬錢注云每歲館脩以銀易錢計得千貫寄與老妻籌畫苦
典衣未贖尚年年廿年前賜一羊裘注云隨父在臬署蒙給羔皮及鼠
接袍一襲迄今二十四年曾兩易綢面藉以見容此日相看禔尚留改飾天
寒珍重著趨時不敢過蘇州宋二松崖沒於吳門與丁三兄之柩同寄蕭
寺為料理撤回有頻年親故感凋零一片雲帆送歸去之句歲暮父子歸

嘉慶三年戊午公四十五歲

是年春作家庭歡聚圖將公女繪入計共廿一人女將遠嫁公題曰云怕是離
身更近身二月初五日公次子舉第一子名曰長生譜名景健字安甫公
旋離家至丹陽秋公女遠嫁東浦士人住京沈翼亭公長子伴送舟過丹
陽離緒良苦計良兒心女可抵北京盼信不至張成兩律話別江干淚眼紅
憐割愛竟匆三千里外思兒女十二時中怕兩風遠嫁不隨鄉俗例寄書
須託往來鴻向平了願牽懷甚孤館殘燈四壁蟲家庭聚首本未難膝下
相依日看念汝無聊尋短夢憶子偏向住長安雲山已歷前途遠風雪初

經北地寒記得丹青同寫照他年重待樂園樂感懷詩廿年隨處卽為家
靜足安身只避諱暮雨閒愁尋客夢曉窓清課瓶花累多儉約終無補
俗薄真誠未敢誇畢竟行藏兩無定眼前冷淡作生涯歲暮歸里

嘉慶四年己未公四十六歲

是年春公離家至丹陽五月初八日後宅從弟舉第二子名之曰本譜名廷璿
後字漁田六月公解館歸里渡江詩一聲高唱大江東兀峙金焦指顧中頭白長
年還破浪板紅官舫慣乘風魚龍穩睡知無底鶴鶴高飛任在空我亦膽粗
討思壯要吟豪句繼諸公六月二十二日抵家安閒自適閉門整書課孫剖瓜團

飲皆喜而成詠七月三十日為公生辰家屬輩一向持齋延僧祈壽不復阻止時桂
花不開吟成長古既而公父子復出門列內詩半生離別奈卿何二十餘年一刹那
今日送兒還送我不知淚滴為誰多至武林率良兒登吳山過藥皇廟謁先十
一世祖守黑公像蓋昔以儒醫名省垣後人德之位設第_二謚曰惠淨惜無家
傳方書可考聊賦五古一首未幾公就常州安厚齋太守之館案牘之餘
營小室讀書有閒得攤書樂狂無傲世歌數弓容膝地莫更計如何之詠
九月十八日公三弟三子生譜名廷霖後字兩田賦家園十六詠曰聯桂堂曰延
綠齋曰好奇樓曰栲栳精舍曰古香室曰如舫曰近圃軒曰夢花書屋曰有竹園
曰碧霽亭曰八座廊曰十二間房曰靈椿井曰招鶴橋曰福字窓日月閣皆有小序

歲暮未歸里

嘉慶五年庚申公^四十七歲

是年春公在常州館次歲暮將歸詩漫說家門喜勝常注云接家信
三兒迎娶期近促予旋里婚嫁漸完雙鬢禿湖山無恙一身忙主人忽解組
公遂歸里後宅從伯母茹苦撫孤延祀是年從弟拜於里族告諸有司請准
旌表節孝

嘉慶六年辛酉公^八十四歲

是年暮春公離家至蘇州待聘寓竹堂寺西院七月三十日香書弟攜酒資過寺為作生日詩末聯相期同根老如我三弟兄有注時三弟出長洲署齋同席是可樓公已學成得館香書公亦適在蘇謀食也既而公就金山鄭澈亭明府之聘有題明府騎牛圖詩十一月十一日公長子生三子名曰大五十譜名景傑字仁甫歲暮歸里

嘉慶七年壬戌公四十九歲

是年春公離家至金山寄示諸兒詩句門戶艱難思後輩書香接續溯前朝在家須代離家想前事終為後事師庭樹秋風吹祖幹井梧春雨長孫枝時公

小病三兒至署詩病後無聊甚常思骨肉親還鄉何歲月伴我度晨昏誰
繼縹湘業都為飄泊身相看增感慨差慰語言真九月初十日公次子生
第二子名曰金譜名景佃字立甫斜日半窗觀書至暮詩廢卷心無著
終朝寂足音客須尋古伴老更憺分陰樹影參差見爐香蘊藉深不知家裏
內可肯坐更沈歲暮歸里抵家詩風雪朝晝掩門客歸便覺轉春溫撲衣
一笑梅花裏試聽啼聲第五孫

嘉慶八年癸亥公五十歲

是年春公離家至金山遣悶詩有客邊無計破愁城惜春自覺垂老之句時

公三兒隨侍將赴都作詩示之有我尚作客忙出門汝誰使讀書又未成徒抱四方志感好遠見格此去亦云試況我念汝姊一日時十二相見道里情願足慰予思
泛々慎交遊功名忌妄冀長江五月涼一帆風快利諸句五十生辰將屆浪跡拓湖
官署追懷舊事得詩十六章信口無擇亦小鳥寒蟲自鳴其春秋耳寄三弟
家居詩句知買南湖一葉舟漢陂兄弟幾時遊家多桂樹同思隱客近鯉鄉
獨感秋弔里中諸先哲詩并序畧稱先哲云亡表揚無人各係小傳聊成一
詩首倪恒園先生次商築民先生次家青巖先生次史石帆先生次趙友鶴先
生次商墨亭先生次丁鶴泉先生次魯惕菴先生九月初一日公三弟生四子
譜名廷珏後字藍田歲暮公歸里

嘉慶九年甲子公五十一歲

是年春公離家至金山讀姚江逸詩前後集得七絕二十六首曰高菊圃曰先
栲栳山人曰宋庸菴曰趙德純楊宗彝曰趙古則陳惟成曰陸良弼曰張懋登曰倪
小軒曰胡仁夫曰孫李泉曰黃醒泉曰楊秘園曰黃半山曰譚公子曰翁古民曰馬畫初曰
俞嵩菴曰史晉生程于岡曰陳湘殷柳津思齋兄弟曰管襄指曰邵頤齋曰姜武孫
曰陸秋岸曰朱若邪金若水大兒客華亭信來知家鄉未值昂貴無賴搶劫官
不能禁感嘒賦詩夢扶先母庭前觀月醒後嗚咽成吟患瘡自五月後已三次舉發
寄香書疇書兩弟詩句一面無緣慰寂寥秋來雙鬢比前凋梅花香泛歸篷近

莫負殷勤寄信招，整輯祖父所遺家書感賦。有規模，總覺前人好習尚難期。
後起賢瓊屑，俗言都有味。光明心地此中傳，我已就衰。諸子弟可將珍重列書
屏之誦。歲暮還家為期不遠，走筆寫意詩句離家忽。將一年繞屋有水門有
田梅花開放殘臘邊，稚孫見我情歡然。掃室正裏爐中煙，叩門客至談林泉。
杯盤草草開酒筵，醉餘賦詩莫浪傳。我欲將詩換酒錢。

嘉慶十年乙丑公五十二歲

是年春公離復就丹陽靈明府之館，四抵雲陽官署詩曰：坐月披風足嘯
歌，一生踪跡此間多。相逢大半蒼顏叟，二十年前會曲阿。六月接都中商表

弟信令女春間病亡而奎兒恐傷予心不卽寄知哭以詩第六首云舊跡年來
我再尋練塘一帶白雲深泉臺可認還鄉路生世難拋割愛心風雨靈旛何
處寄雪霜殘髮一時候記曾哭弟詩成後老淚乾枯直到今僕人自家鄉未
接內子書感賦婚嫁今完最小兒歸期早約菊花時頻年喜氣蓬門集
卻新增哭女詩接家信雲兒婚事粗畢寄示內子詩半百年華豈暮遲未未安樂
待他時寄書訴盡支持苦畢竟無人似我知歸舟夢還湖上詩題注云十二月四
日來裝公四兒於是年十月娶士族江卓人長女次年生子不育江亦卒

嘉慶十一年丙寅公五十三歲

是年春公離家至丹陽客齋春日閒興詩春風吹暖絲離家野樹空庭綠
漸遮啼鳥愛聽簷際立絲絲滿地落何花三弟赴永嘉幕遠寄一詩十年辛
苦共謀生魚雁頻通百里程別我忽驚春老去看山初向浙東行人求遇合全非
易家仗支持任未輕華蓋煙霞孤嶼月得閒寫景慰生平十一月十九日後宅
從弟生第三子譜名廷光後字厚田盡臘將歸感賦旅館偏宜興味清歸
園小住費經營種梅又負今年約斷酒仍憐薄病生注云近歲患腸紅之症
近盼音書思幼子注云三兒在都下少信遠來風雪見彌甥注云沈外孫增保纔
八齡由山東來依攜與同歸囊中有物終何補怕是還家累未輕

嘉慶十二年丁卯公四十五十四歲

是年公四兒續娶於鈕秀峰表伯之次女公賦閒居家累宿通桃花時
節過吳門謁名宿留單竹軒姑倩款留三月為覓枝棲將有楚南之行而公
妻病牀暫返忍別五月二十九日復渡江由武林放舟常山入弋陽過滿天星灘
江行最險抵豫章登滕王閣過宜春袁州上蘆溪灘將過山而楚使適來知
東閣多賢主人不遑見遂返舟阻風中秋日方抵貴溪而自貴至玉山數百
里間秋雨水發送狂波駭浪而上輕舟寄命竹兜過常玉山發桐廬富陽始無
風波及堰隄挾船飛棹得歸越山十一月十四日公配陳太孺人病卒公哭以九絕句
詩存見四首一生憐我涉風波每到臨歧喚奈何還汝千行萬行淚不知抵得送行

多舊事從頭記憶紛一廡家祭斷腸文倩人讀與靈前聽都說淒涼不忍聞廿
年家計獨經營弱質原知病易成何苦生前貪早死剩余隻影若為情迷道
還家意外逢秋風忽逼嚴冬抱頭不必留多日尚有兒歸路萬重注云三
兒在都中館上告假省親於七日服成抵舍移柩停聯桂西屋絕句忍將孤觀
送荒邛寥廓無人大暮愁一樹碧梧數行竹舊曾行窶且淹留期三弟歸
詩寒冷落歲云暮歸與弟尚進門庭清到雪家事亂如絲老逼添新淚愁
多繫遠思西風連日發應是挂帆時

嘉慶十三年戊辰公五十五歲

是年春公在家公三見假期將滿定五月初自赴都公先期赴蘇過節有
率示絕句旋復館於丹陽有四抵雲陽詩七月十五日公大房舉第四子譜名
景佑字啟甫公萬於伉儷悼亡歲將一周思念不已屢見篇什有詩云死別無
再親飄忽風中塵去年此時節病中見細君不謂棄予去偏遇徹骨貧草上理
後事受吊無多賓生前未展眉日夕勞米薪死後留故物一悲釵裙博得撫棺慟
我哭不聞一棺尚在殯夢見依舊人語言苦相慰醒即剝隻身舊情耿難忘短夢
亦足珍客途長苦守誓不重結婚偕老違素願安得還欣十一月十九日公四房生
長子譜名景伊字尹甫時公已得八孫矣歲暮未歸里有小住又經年詩句

嘉慶十四年己巳公五十六歲

是年春公在丹陽將去雲陽題秋聲館有半生遇合本無準此地羈留第幾
回怕是愁秋聲愁裏聽綠陰先設送行盃之句七月朔日抵家和三弟四十
初度詩旅燈分影鎮相憐游倦同歸故國天未老秋光當八月屢開家宴
是今年坐推壓席慚居長飲愛傳花意取圓此夕都教沈醉好不須勸
我早安眠長至日感懷詩與僧作伴歲時加旅况難支自掩遮風雪不知人
在客湖山都待我還家居傳無主休彈鋏好事多違慣聽鴉探得梅花香信
到竹堂重飲佛前茶是公居家未久復出遊吳下也鄭八逸之贈姚江詩存
一冊得見先曾伯祖青巖公曾祖寄亭公伯祖春江公詩皆先子在目錄呈部

二雲太史得邀選入有詩寄三弟大兄同容武林寄示四兄廷雲詩年少持家可耐貧不復念我此間身客邊茶飯年邊酒意裏林泉夢裏人塾課囑勤諸弟姪風光待轉一冬春自知脚力還輕健正在尋梅索笑頻歲暮未歸里

嘉慶十五年庚午公五十七歲

是年春公在蘇州移寓泗洲寺戲題漫稿七集後詩句三十六年詩三千數百首

注云拙詩自二十歲存稿至去冬止共得此數將赴雲間題壁詩句來自交冬過

夏初磬聲留客悟如如抵華亭署齋詩此遊豈直為鱸魚亦不愁他鶴笑予到

日白簾花謝後綠陰一架足攤書雲間即江府華亭為附郭自邑詳鶴笑意當

是為友人庖代者放舟赴婺郡月夜嚴灘有涼夜中秋近張帆過釣臺之句婺
郡金華府也主於吳棟華太守郡齊即事詩有齊非寶晉鬱蒼寒博得
年來片席安又曰誰上高樓繼朗吟注云八詠詩即在郡署之右正堂見夢園句買山
生死營同穴抱影孤單度幾秋十一月十三日公大房生第五子譜名景倫字常
甫歲暮公未歸里

嘉慶十~~五~~^六年辛未公五十八歲

是年春公在金華館中夏五月以榜姥山人詩集屬吳太守題序為駢文
一篇十二月二十七日公四房生第二子譜名景倣字善甫歲暮公歸里婺州臨別

絕句扣角高歌無點愁
紫煙青嶂日騎牛
我未空慕瓊田近草
依人別婺州

嘉慶十七年壬申公五十九歲

是年春公在家公三弟為溫處道韓芸舫觀察入幕之賓公大見先已隨林
習業至是請公遊東甌東甌者温州古名公四見讀書期下一矜屢試不售亦令改
讀律法五月公攜之舟行上嚴灘遊石門洞過謝池登大觀亭韓觀察薦公於
温州首邑永嘉縣李海帆明府館中梅雨潭詩句長疑飄灑三時雨別有陰寒
六月天孤嶼詩句如此江山文相淚無邊風月謝公詩縣舊志云晉立郡城生齒日
煩王右軍導以文教謝康樂維之乃知向方自是家務為學至宋遂稱小都魯

謝池桃花詩
既東作客便為家
氣候宜人信足誇
嘉慶壬申冬十月謝公池上
看桃花與客談
金華舊遊詩
白秋月芙蓉兩溪水
春風楊柳七姑祠
歲暮公未歸里

嘉慶十八年癸酉公六十歲

是年春公在永嘉館中七月公四兒回家赴餘姚祭埽
老祖塋并修祖堂公六十自壽詩知非自壽賦
連篇歲月空忙又十年奪我同心不借老依人生計尚如前
慈添白髮頻窺鏡苦覓丹砂未遇仙
差喜東嘉山水窟弟兄兩代日周旋
又有白曰抱到曾孫原過分贖回息券足收場
綠天鶴守深宵月白雪梅營半畝莊注

云近為亡室營葬事於謝墅鍾山寺側多植梅花按公長次孫之年公可抱曾孫
支譜不見當是生數月而不育也九月公四見未侍館次十一月二十八日公三弟配
室莫卒歲暮公未歸里

嘉慶十九年甲戌公六十一歲

是年春公在永嘉館中二月公三弟移幕本省臬署公四見隨并赴館晚登
大觀亭詩有遠濤難辨海淡月欲移山之句中秋日主人招赴飛霞洞宴飲
三弟在韓廉訪署中近知應陳中丞聘將赴左不及晤別悵成一律近無一月
音書至歷下催行恨馬蹄棗芳春庭爭俯仰雁聲雲路隔東西可堪垂老

還言別終擬投閒得共棲從此謝池珍重過肯教詩夢付迷離隸等白下注云棠
棣花色最嬌艷而上承下覆有親愛之意故以喻兄弟接三弟信知攜四兒廷
雲暫回里門隨陳中丞赴任詩飛鴻剛信到舐犢又情深老景憐長道秋風
滿故林艱難門戶計遲暮弟兄心歷下亭邊路從茲費夢尋十一月陳太孺人出
殯謝野十二月公解館將由括蒼婺州返里括蒼處州古名婺即金華過謁吳太守
留飲過嚴州舟行送風臘八日過七里瀧蕭山舟中詩蕭然山送夜航開燈火重
衾擁一堆霜白影中搖櫓過月明聲裏靠塘來近知邨屋寒雞喚響到橋門
短夢回已是故鄉還極目龍山初日客心催遂回里門自此不復遠遊是年公仲弟
配室周請准旌表

嘉慶二十年乙亥公六十二歲

是年春居家公同學章恒一璐幕遊河南滑縣教匪起事遭難入昭忠祠
賦詩弔之公四見在山東得館於肥城縣公有子四房大房分舉二房出繼
三房不及顧家惟四房遠博館穀寄供頤養庭桂發花欣然成詠約畧計
千支白下注云白衙衙前明白母所居徐文長集中有白母傳相傳桂樹為白母
所植四月觀黃梅白注云夏初發花五六枝實從來所未有爭稱葛稚川白下注
云余日生花底趙十二省園周五香雪輩來俱稱仙境八月負新涼白下注云陸
放翁詩行盡天涯年八十至今未遇一枝看蓋放翁一生未見桂花亦奇事也丹綠

聞成文白下注云東西二株開不同時又各分一二三次發花香可至九月抄十一月十四日公九姪雨田生長子譜名景信字敦甫歲暮吟桑榆逼暮景所喜倦還家一齒浮將落雙瞳近更花詩魔幾時醒酒債不多賒另設門常閉從無塵語諱

嘉慶二十一年丙子公六十三歲

是年春公居家兩公四兒仍就肥城館雨中惜牡丹詩句三月坐消榆莢雨一庭飛送屑香塵東君豈竟無情思畧借晴和拂拭新五月公六姪三姪孫皆赴山東從公四兒習事七月初九日周節母終讀漁洋山人汎大明湖詩有懷三弟容陳大中丞幕中詩白安得濟南遊曠覽水清泚迢々數千里念我

同懷子不知戟門開好音可盈耳得句附南鴻勝寄一端綺按可樓公在節
署約三年旋入柏臺依楊容峰梁菴林諸名公十餘年秋審平允中外稱之

嘉慶二十二年丁丑公六十四歲

是年春公居家公四兒仍館肥城五月十九日公九姪兩田生次子譜名景佐字賢
甫卧遊雁^蕩序久客東甌不獲游雁蕩缺事也曾於廣山誌中倩工仿繪諸圖
時上展玩茲分詠以作卧遊不識與宗炳風懷何似秋閒公四兒移館泰安
縣喜王二星泉移居後對門詩白舊日西窓跡最親半生潦倒各隨人得
歸尚苦城鄉隔卜築今為魚鳥鄰老去有身須愛惜詩齒髮不如故難

得清健身付與天獨厚龍鍾儕輩人苟竟失愛惜何以固本真

嘉慶二十三年戊寅公六十五歲

是年春公居家公四兒仍在泰安縣二月二十四日後宅趙節母終題泊

鷗園序畧郡城八山惟東武最幽卧龍偃然擁其背戟山障其肩環

山皆水傍水皆人居予家在山下而五六舊雨并新雨數人環居近山一

二里間天緣湊泊聚首無間杜詩梁燕去來水鷗親近我輩得毋類水

鷗之相親相近乎胡大靈齋繪圖以贈予烏可無詩地不盡種桃人不必避

世機心息即閒趣生小山桂樹往注逢人都作圖中一點鷗也同志耽吟還希和

我六月公四兒回館肥城七月二十六日後宅從弟大房誕長孫譜名景傳字寬
甫歲暮公四兒倩友庖代館事回家省公飲分歲酒公有詩曰一別奴上耳其
如我老何風霜歸意切骨月慰書多家用不求足年光且穩過案頭花笑
語相伴醉顏酡

嘉慶二十四年己卯公六十六歲

是年春公居家公四兒在侍歲首雪深閉戶賦卧遊五嶽諸名山詩清明借香
書弟棲鳧邨掃墓四月公四兒辭赴山東肥城館後宅漁田姪隨往讀律長
夏閉門和暨陽王元章詩集雜興二十首藉消炎夏暑計三弟將歸詩此目

念吾弟到家和若春
匆_上幾年別款_上一家人暑氣歸途遠涼風近日新
可憐汝媿在斷不笑蘇秦
八月三十日公四房生三子譜名景价字介甫接三弟
信知為温廉訪挽留不復旋里泊鷗吟社宴集_詩并序身同倦鳥歸來最惜
時光心似閒鷗夢去不離風月須尋歡樂莫過倡酬爰集同志十二人結為
泊鷗吟社月凡兩舉歲可再週賤齒稍長於嘉平月三日值第一會設几案於
栲栳精舍醪資沽飲即事賦詩體不拘_格胸懷咸適率成四律用質同
人都忘機事訂鷗盟泊處真堪適性情半世江湖浪跡一庭風月鬪吟
聲耳碧山老輩人爭慕注云前明無錫諸名宿設碧山吟社紅樹新霜
景最清注云吾_{越王}季重先生開楓社於羅紋坂仿得前規初結社合資博飲

詎無名又四律未聯敢言此會闕風雅夙願蹉跎補未遲詩巢懷古詩何年
結構仿書巢采葛聲歌未寂寥六子靈光分畫筆一堂韵事在詩瓢地遘
盤曲遙臨水松老龍山鄉晉作濤結社後先聲氣應一窩儘許競揮毫鶴跡
欄斑一徑開問巢竟日幾人來生扶大雅先唐代沒祀名山盡越才風月嘯歌終
伴有篇章零落半增哀分題懷古情無限須莫耕漿前草萊

嘉慶二十五年庚辰公六十七歲

是年春公居家公四見仍館肥城花朝後偕詩社諸君泛舟小雲棲詩放船
隨處載詩人跡似浮鷗泊岸頻出郭不逾五里路看花只算一分春別開精宇

園雲水小集吟壇送主賓停棹便登歡喜地雨絲風片畫圖真送六姪赴歷
下兼示諸兒暨孫輩詩耕苦隨身石硯肥出門又見著征衣衰能有幾回
別汝輩都須閒歲歸遠道奔馳防暑觸他鄉會合書飛我知尋樂休
牽挂吟閒斜陽兩扇扉五月二十三日公長孫達甫生子顯曾六月初八日
公九姪生第三子譜名景信字實甫六月二十七日公六姪生第一子譜名景
字同甫

道光元年辛巳公六十八歲

是年春公居家公四兒仍館肥城春閒偕香書弟九姪回姚江省墓

下榻宗祠之南樓借徐氏兩表弟暨弟姪至游源埽墓宗井西麓招
同姪^弟舟進上林湖遊普濟寺訪海亭公碑刻返舟泊縣城過忠義祠謁高
高祖明府庠生舉孝子鍾華公粟主歸家題方正學先生自述詩墨
蹟五百年來墨瀋乾東山高處五湖看初心只慕功成退不道乘舟欲去難
一夕飛灰失故宮天朝家事尚煩公雲濤煙浪題詩處中有孤臣血淚紅
侯城一集免披離收得忠魂紙上帝此幅流傳真幸事鄉閭路近浙東西
門題聚寶古時城過客蒼茫恨未平我捧短章^錄至寶千秋書種屬先生
六十八生辰詩句歲月方吾有還家七度我秋

道光二年壬午公六十九歲

是年春公居家公四先改館山東曹州府張家山掃墓詩掃墓三月半百年不改期曾隨大父後今攜曾孫時樹壓封秦甕舟行背禹祠湖山長在目一度有餘思謝墅掃墓詩結句聊一奠丙舍幾時成吾鄉舊有詩巢在鑑湖明狀元余武貞題其額為秋水長天祀賀知章秦系方子陸游揚廉夫徐渭諸公於內每遇文讌必赴之和周虎木先生為姪女畫扇頭山水詩序畧稱先生有弟宸木即予姑父長表妹行六性貞靜解唐宗詩幼許字胞弟寘書過門奉祀先慈惟謹弟患咯血二十六而止無子息以予第二子廷璋繼為子頗得歡心孳居課子茹素奉佛旋為繼子料理婚

配得兩孫長景健稍長卽以此扇付之壽五十餘逝世其胞弟梅卿兩中副
車同予援例請旌茲景健以畫扇請題識披覽追思為之黯然因卽步韻附
注於後四兒寄到泰山摩崖碑為賦長古七月望後述近況詩句自笑謀
生拙諸孫作客忙注云日內第五孫隨六姪赴山左同人新葺詩巢以放翁生
日落成商大拜亭賦二律卽和詩萬千巖壑檻前收歲久何堪剝落秋名繼
書巢足今古勝標鏡閣剝亮鷗輪扶大雅尊師範路整高坡免竹兜慰得後
賢風雨感効綿木樞與釘頭又詩越絕鍾靈在卧龍揚鑣攬響信雄豪綿延壇
坵推同輩漸愧江湖說長翁十月初七日公九姪生第四子譜名景俊字中甫十一月
十六日後宅從園第大房生次孫譜名景儒字文甫

道光三年癸未公七十歲

是年春公居家公四見仍在曾館新正四日出門間步詩叙七十正平頭杖履

還堪覓近遊歸客折梅逢一笑明朝須放禹陵舟三月公九姪兩田後宅七

姪田偕赴山東後公四見家習律案七十生辰詩句遠將儀物因風便滿設詩

屏展待曉開注云四見寄到曹郡王太守暨各署諸公儀物十一月十六日後宅

後從弟彝趙節母於迪埠十一月十七日公長房長子因瘋自盡哭家孫景修詩

向無言徒抱生前恨有佛難除病裏魔

道光四年甲申公七十一歲

是年春公居家公四仍見在曹館省園招飲席間詩句二月融和景色新省園

依舊集嘉賓又曰池寬鷗鳥白成點兩雨歇春亭醉欲堆歡會不常人易老

拙詩未就客爭催懷餘姚三山舊居詩句遷居經累世空說還鄉人屋宅苦撐
拄地溝每通堙慈茲越城居適與三山均冬間公三兒選授山西交城縣典史

道光五年乙酉公七十二歲

是年春公居家公四兒仍在曹館詩集向有放翁生日會今同人每逢二月初四日
為徐天池先生生日設祭賦詩西軒即事詩卜居安得住西邨半畝先人舊宅

存塔影鐘聲清到枕桂椿桑本老當門隨緣茶飯分白送統膝賢思得
半論老嬾起居類假寐下簾香篆一鏺清

道光六年丙戌公七十三歲

是年春公居家公四兒仍在曹館子姪輩旋里典得鄰居畧為修整詩靜門庭得
康假歸省視幾兒郎百年舊宅來峯下一帶新居古桂旁托鉢眾僧仍合宅養蜂
小戶喜分房注云六姪移居新屋頗思改作虛資費租代安排半月忙春閒公三兒
罷去交城典史寄三弟詩家事清閒作客忙匆々兩地過時光盼歸小圃栽梅圃待
飲先開得月廊免乞營資同社老終慙朽質說元方叮囑莫負來書約花甲將週

準東裝注曰弟來書云五十九歲一準旋里計期不遠矣五月十三日公出繼子玉田
沒九月公四兒回里省視十二月二十七日公四房舉第一孫名曰慶曾

道光七年丁亥公七十四歲

是年春公居家三月十三日與雪舫丹蘿諸君并四兒十姪泛舟赴小雲棲詩句上已展
今日聯翩樂我羣舟小容排比湖寬逐浪紋五月公四兒仍赴山東就清平縣館六
月十七日公三弟側廬閻氏生子諧名廷璫後字福田九月公三弟歸里公題其鑑
湖歸舟圖詩曰季弟別家十四載欲歸竟歸約不差歡欣握手笑不止新添兒女坐
滿車此歸未免途路遠斗酒對斟洗塵沙醉餘吁見出此冊鑑湖風景視周適逢

底有書兼有酒卧龍山近進若邪定然園中俱壽相逍遙歲月聞伊啞天倫樂叙忽
技廢快筆幾欲追八又囑弟索詩鷗社侶先自塗抹供笑譁公之詩存按之商君嘉
言序文公三弟可樓公郵金書促不已重負弟意乃屬商遠選十之二三授梓而自題
曰延緣齋詩存序後紀為嘉慶二十年^五秋七月而卷之十二已存有道光七年丁亥
之詩是必授梓後所增存者丁亥以後之詩應皆漫稿^在全集中惜今殘缺渺無所見

道光八年戊子公七十五歲

是年春^公居家公四兒仍館清平四月初三日公四房舉第二孫名之曰瑞曾五月公四
兒移館兗州府八月初十日公九姪生第五子譜名景侗字成甫

道光九年己丑公七十六歲

是年春公居家公四兒仍館兗州府後宅公廷光姪書藝不輟是年取進
山陰縣學附生八月二十九日公十姪藍田生子景偉字韋甫

道光十年庚寅公七十七歲

是年春公居家公四兒仍在兗州府館三月十三日公姪^五孫立甫生子緝曾
八月二十七日公三姪孫安甫生子學曾

道光十一年辛卯公七十八歲

是年春居^公家公四兒仍館兗州府六月初六日公五姪孫立甫生子繹曾公三兒自罷交城典史遊於福建是年七月二十九日沒於閩省無子以四房三子景介入繼十二月公四兒移館曹州府

道光十二年壬辰公七十九歲

是年春公居家公四兒仍館曹州府十一月初一日公四姪孫仁甫生子希曾

道光十三年癸巳公八十歲

是年春公居家公四兒仍館曹州府五月二十一日公三弟可樓公謝世

道光十四年甲午公八十一歲

是年春居家公四兒仍館曹州府正月初九日公三姪孫安甫生子錫曾三月二十一日公六姪錫田病故

道光十五年乙未公八十二歲

是年春公居家公四兒仍館曹州府

道光十六年丙申公八十三歲

是年春公居家公四兒初仍曹館四月遣桂孫回家省公四月初九日後宅公
從弟香書公逝世十月公四兒移館東省臬署

道光十七年丁酉公八十四歲

是年春居家公四兒仍館東臬十二月三十日公三姪孫安甫病故

道光十八年戊戌公八十五歲

是年春公居家公四兒仍館東臬二月二十四日公十一姪孫敦甫生子耀曾公月

二十三日後宅公七姪鹿田生少子譜名景仲字吉甫

道光十九年己亥公八十六歲

是年春公居家公四兒仍館東臬五月解館回里八月十九日申時公考終公
四兒二十日寅時抵家計後六時不克一見抱恨難已含斂盡哀七日延帛杜尺
莊先生致挽聯曰碩望享遐齡更比放翁添一歲詩巢興墜緒永陪賀監祀干
秋與同社楊吉園王月槎諸先生製公粟主送入詩巢受祀十二月於棲鳧後灣
營公及陳太孺人廕壙越兩歲於道光二十一年辛丑九月初吉乃合葬焉

This image shows a blank ledger page with 11 vertical columns. The columns are separated by thin vertical lines, and the entire page is enclosed in a thick black border. The page is otherwise empty of text or data.

--	--	--	--	--	--	--	--	--	--	--

人家百數十年之興起辛勤詒謀積累滋培承接敷疏然後耕行而萬萬
嗚呼豈易哉言我會稽白倚之岑自寄亭公垂德立基春江公發解樹望春
山公歷游幕府月槎公勤學黌序而遇三三之厄雲泉公名幕廣惠春
秋四十四而棟折榱崩當此之時我鏡西公年二十有五香書公可樓公皆幼
弱我公祇懼警惕兢圖維內勤教誨出支門戶佐治江南郡邑數十年五
十以外公四子香書公隱德閭然生三子可樓公魯撫而久佐臬事亦生
四子及我公年六十少子芳田公又繼起我公乃居家不復出孫曾繞膝領額而
飴不及徧一鄉之望優游年所八十有六而考終命越兩年而芳田公魯及吾
浙撫幕雖我公不及見豈滋培敷疏之所致哉嗚呼偉矣我公好吟詩生平足

有萬首不啻以詩記事，舊藏公刻^所延緣齋詩存十二卷，親友致雲泉公及與
公書札鈔謂之置書懷袖，既得見公所修二代行畧及行畧附記，暨可樓公鑑
湖歸舟圖題詠，後又得鈔鏡西漫稿初三六集，日本十四亂後僅獲此數，並得
鈔芳田公年譜，至是而我公一生之出處行誼可以備考，因擬分年而為公之譜
值忙人羽檄一作十報未成三分之一竟^致束閣，退休以後四修會稽支譜見餘姚志
有公傳而甚畧，乃為我公立之家傳，復始於姚之東門，創立祠宇，特奉我公於
崇德報功之位，方籌續成前志而修省，既疎霹靂半空，其家室驚悔悲傷
心氣欲散一束遺事如在九重深淵，日日念之而不敢一引手，今年春間忽病
入夏復病逾七十而衰，若此安敢企我公之健享大年，前事半途而畫，何以

對我公於上位乃勉鑒寸衷不敢大著力用勿忘勿助之法復翻各冊而漫執
筆若邀公佑漸有餘緒五句六句乃得續成大約二五以前多本於二代行畧
二五以後則取於詩存漫稿及其他各冊平實懇摯務求簡要於公詩之上
口順成三讀流涕者或全首或一聯單句分載若干以見公真性情惜乎七五以
後漫稿無獲不能更載詩向其時可樓公歸老不祿香書公亦先公而逝崦
嶺情懷亦云苦矣譜終長言以當祭告嗚呼嗚呼我公其必饗臨金之

七十七元甲子年夏六月二十日白倚齋孫遷復餘姚象坤謹跋



The image shows a large rectangular frame with a thick black border. Inside the frame, there are several vertical lines that divide the space into columns. The lines are not perfectly straight and appear to be scanning artifacts or part of a table structure. The overall appearance is that of a blank page with a grid-like structure.

原敬

色敏之子明安由兵部委吏領催承襲堂兄慶安之

佐領生一子恩特恒額

色敏之子明安由兵部委吏領催承襲堂兄慶安之



年譜

乾隆十年 二歲
 世康佳領明安 祖色爾布及
 三歲
 四歲
 五歲
 六歲
 七歲
 八歲

九歲
 十歲
 十一歲
 十二歲
 十三歲
 十四歲
 十五歲
 十六歲

母常察氏及

十七歲
 十八歲
 十九歲
 二十歲
 二十一歲
 二十二歲
 二十三歲
 二十四歲

曾祖以薩瑪里
 元及

二十五歲
 二十六歲
 二十七歲
 二十八歲
 二十九歲
 三十歲
 三十一歲
 三十二歲

三十三歲
 三十四歲
 三十五歲
 三十六歲
 三十七歲
 三十八歲
 三十九歲
 四十歲

父色散及
 王宗子色散及
 色散及
 色散及
 色散及

四十一歲

四十二歲
嘉慶元年

四十三歲

四十四歲

四十五歲

四十六歲

四十七歲

四十八歲

四十九歲

五十歲

五十一歲

五十二歲

五十三歲
嘉慶元年

五十四歲

五十五歲

五十六歲

五十七歲

五十八歲

嘉慶十七年
承任領時
於

履歷
○明安生於

乾隆二十二年乙亥夏四月十二日卯時○乾隆三十七

年壬午年十八歲

娶蒙古氏

乾隆五十六年辛亥

年三十七歲秋八月

初二日亥時冬十月

孫恩特恒額生

父歿

乾隆五十七年壬子年三

十八歲春三月

是歲

夏五月承

嫡堂兄慶安歿

襲佐領

嘉慶十二年丁卯

年五十三歲
蒙古氏歿年五十一歲
乾隆二十二年丁丑春二月初二日
已特生

嘉慶十七年壬申秋七月 日世承佐領明安歿

原啟
保存之長子福祝隆阿緒繹生員教習

生一子繹精額

年譜

乾隆二十一年結
釋生員為譯
官教習福祿
隆河生

二歲

三歲

四歲

五歲

六歲

七歲

八歲

九歲

十歲

十一歲

十二歲

十三歲

十四歲

十五歲

十六歲

十七歲

十八歲

十九歲

二十歲

二十一歲

二十二歲

二十三歲

二十四歲

二十五歲

二十六歲

二十七歲

二十八歲

二十九歲

三十歲

三十一歲

三十二歲

三十三歲

三十四歲

三十五歲

三十六歲

三十七歲

三十八歲

三十九歲

四十歲

父儀祥

氏

中三員

長子福祿
三員

祖母福祿
各員

諸母福祿
元定各員

四十一歲
嘉慶元年

四十二歲

四十三歲

四十四歲
中

四十五歲
嘉慶五年
秋

履歷 福祝隆阿生於

乾隆二十一年丙子秋八月初七日辰時 乾隆二

十七年壬午

年七歲冬十一月十一日 巳時 祖母諾音濟羅氏歿

乾隆三十六

年辛卯

年十六歲秋八月十三日 巳時 曾祖母歿

乾隆四十一年丙申

乾隆二十二年丙子
十一月初五日生

二十一歲夏月娶那拉氏 乾隆四十三年二十

三歲戊戌十二月二十八日戌時長子穆特額生

是歲夏五月中緒繹生員。乾隆四十六年辛丑
年二十六歲春正月。父歿。乾隆五十二年丁
未三十二歲夏六月。祖歿。嘉慶二年丁巳四
十二歲春二月補教習。嘉慶四年己未四十四
歲冬十月中緒繹官
十一月補實錄館

嘉慶五年庚申春三月初六

日子時教習緒繹官緒繹生員福祝隆阿歿

竹園鴻爪錄

奉新趙敬襄司馬

僕生於乾隆二十一年丙子六月三十日丙寅巳時
時先君下榻城外寶雲寺先一夕歸家見有小光
墜宅後同行者皆見之幼時字以瑞星後始改今字
其年值大比之歲先祖命乳名曰寶興次年周歲
晬盤先弄墨故予有私印取伐檀集文字有緣曾弄
墨之句

乾隆二十六年辛巳六歲先祖弃世時受書於先
母至予未得爲孔子徒也二句訃至先母倚戶哭
先君下繼室後見山園聞訃絕而後蘇

三十一年丙戌十一歲以乳名應縣試第十二名邑侯
 寶斌趙公中忱府試三十二名太尊矩平李公籍貴
 府試末覆十二人予未預是年予未試本邑書院而
 趙公令往肄業長書院為南昌踐堂危公諱庚辰舉
 人院試亦未預

二十二年丁亥十二歲試入馮川書院第三名署邑侯
 候補別駕錢塘閩夫吳公璵贈以曹素功墨印率石
 各一匣書院師同邑蔣房帥公光胤辛巳中會試癸
 未進士是年予縣試第五名府試四名太尊修寧汪

公題院試亦未預是年始進書院

三十三年戊子十三歲試入書院第三名署邑侯靖安
令程公_憲師仍葺房先生是秋先生卒先生吾邑名
宿兩年內常蒙指示所得爲多

三十四年己丑十四歲試入書院第十七名邑侯修文

運齋尹公_{德嘉}辛酉舉人書院院長湖口念陵崔公

_謙壬戌進士縣試六名府試三名大尊仍汪公院試

入縣學第三名費案第四名因涂君靜文_紉關文內

有獨得題竅之處故自後拔居第一也學使閣學鎮

澤持齋汪公_{廷璵}戊辰一甲第三人

三十五年庚寅十五歲運齋先生常招入署品騰其文

署內柴君先生同鄉人書院鄒君楹相南城人皆相

引重科試一等三名時持齋先生意在決科於覆試

後擇文藝尤佳者九學凡二十四人續取六人次日

再試先生具酒饌縣學四人宋君澹思鳴珂居九學

之首陳君鑑泉鳳游第四嚴君菽筐錫予及予名稍

後府學吾邑二人皆續取徐君克齋晁南劉君仲宣

豐案發嚴君居第八名是年宋徐及予皆舉鄉試次

年陳劉舉又十二年癸卯嚴君始舉與劉君皆未第

八月鄉試首場交卷畢監臨大中丞海公明令提調

督糧道天津魏公精年呼至案前詢其年各籍貫見

予色頗疲勸令返闈中丞謂魏公曰是猶臉書氣可
 嘉也榜發中式第五十八名典試長白國右堂先生
 柱乙丑進士侍講學士後官太僕寺卿長洲褚筠心
 先生廷璋 癸未進士亦侍講學士後以大考左官同
 考弋陽縣尹大興超亭吳公與宗 辛巳進士於十四
 房中年最少所得士六人副車二人履歷皆未三十
 而予齒最幼十一月廿四日娶甘孺人十二月十日
 先慈擗之壯上取道浙江除夕泊龍游同行羅丈平
 齋承 徐五丈蘇揚日昌 六丈海帆日晨 羅翁沙彥
 李虛谷懋 熊崇山恢宇 彭小籤孕星 宋澹思過

廣信舟中遇吉水郭紫厓 綬光 凡十一人 彭郭二人 次年登第

三十六年辛卯十六歲二月五日台兒庄賃騾車次日

起行十九至京寓奉新北館後大間舅氏秋圃陳公

鍾貝 教習授知縣需次都中攜之謁南昌彭文勤公

公言去歲順天諸生有八十以上者二人奉

吉特賜舉人二十三歲者二人奉

旨策其精進今吾鄉來會試者興安縣

欽馬舉人李煒年一百歲與十四歲中式之舉人老少

相懸亦一時僅見可於

聖德更延回鑿之日恭迎道左叩謝

天恩因代爲呈詞赴禮部投遞大宗伯錢塘王白齋先

生際華許爲據呈代奏前引順天舊案後云今江西

省李煒趙賓興仰邀盛典共沐殊榮而壽屆期願

齒更加於大耋年方鼎角名已列於賢書彌彰

仁壽之徵益顯

文明之瑞云四月初詣南

苑海子裏跪迎

聖駕叩頭謝

恩畢回京初六日榜發未預因留京試卷在上海陸耳

山房散點三篇無評抹然文實不佳因入闈匆遽送

考之人亦初入京遺去食箱遂枵腹終事非閱者之

咎也同舉中所知年少者大興張君光熙後官臨清

直隸知州順德溫貧坡汝适後官兵部侍郎皆甲戌

生文勤公嘗為予言所知某某皆向來以十四五歲

中式之官卷其民卷中則數十年內未之聞也又云

人只要立得志定欲為某種人便為之終有成就但

勿畏難爾是夏同年南昌萬荻薈廷青雷皜泉綸新

建涂鎮莊日煥朱章浦紱同邑徐五六丈宋澹思八

人文會秋甚雨予以幼不離几案又嘗醉垂足而卧數

月後遂攪足疾不痛癢但微浮而筋似弛不良於行

先君憂甚謁籤正陽門外 關帝廟云與君定約

爲霖曰或言新建熊太史鶴嶠先生爲精於醫善
爲人視疾盡詢之先生固與從祖惕齋公同舉先君
攜往視云可治但須逾百劑方見功因爲定方以去
濕爲主服獨活幾一斤始用鹿茸虎脛諸藥爲丸丸
盡而愈是時茸價不過數金虎脛一金至今予足過
自高而下及稍備陔處需人扶掖以是故而先生療
治之恩 神之告均不敢忘也興安李君榜後

同業街留京視暇

自壽前數日卒於寓邸

附呈 欽惟我

皇上道協中和

慶臻熙皞

建極錫福斂時箕範

之敷老安少懷

契合尼山之揆特啟兩科甲乙

長循十載庚辛喜溢儒鏡歡臚子墨猶復

恩施溥被

斂思無窮

錫老壽以科名策少成之精進惟

聖人因材而篤俾多士有志者成

三皇如春四海躋夫仁壽小子有造

一人作之君師焯等皓首菲材垂髫蕪質愧菰蘆之下

士際義樸之昌期壯不如人化日之優游已久

年未及歲童蒙之佔畢何知詎期寵賁

華給各補鹿奉之籍不謂榮分蕊榜身辭夢篠之遊春

風和拂夫枯枝滋露濃霽於小草安陪閑喜若孫行
祖輩之相懸榮懋觀光許白髮黃童之並預覘弧南
之宿方長歲月敬仰祝夫

慈嚴執研北之經有志詩書期勉遵乎

文治所有感激下情云
云 歡忭上呈

三十七年壬辰十七歲會試本房青陽王文僖公春圃
先生題修閱卷總裁武進劉文定公評云泛語未淨
三藝亦欠完備其時騰未堅剛意會場須有六勝人
處而題路感實刻感求工遠淹晷刻不得已仍取舊
所習吳雲巖文格調爲之至三藝而時日已促二語

實確評與辛卯之本房皆可謂黜而宜乃知我也時
內中書及學正學錄需員依己丑科之例榜後總裁
兼選墨卷中字畫端楷者不拘薦否取六十名俟新
進士之取朝考而歸原班者一同引 見用中書三十
人學政學錄十人予名在四十四五月初引 見四
十三名以前未到者二人予居四十二 朝考班八
人舉班二十二人以前用中書二十三至三十二人
用學正學錄闈辛巳己丑兩榜每班各有去取是年
則三十三名以後均未預也江西三人惟新建涂鎮
莊名在十三其三十五名安瀾伍君 亦未預六月

朔隨先君由潞河買舟歸同行安義詹廣文_{傳進}
士鶴齡仍取道浙江登釣臺八月抵家先君體素
豐舟行觸熱未至家數日病瘧歸後服姑丈彭公澄
藥經月始痊

三十八年癸巳十八歲春先君病黃瘧服執友揚萬
鄧公_{湛名}藥久之方愈

三十九年甲午十九歲內人自辛卯患筋骨疼醫者投
以網辛等藥病良已而體弱甚遂多疾及是年春瞳
翳散大遂失明療之無效然疾亦較可十二月赴禮
部試是秋道經王倫倡遊山東臨清州旋就戡定

先君廬途中或有小梗須相機進止仍挈之行取道

大江同行靖安涂姑丈亮工寓先舒同年祖承舒君

謙遜希曾同邑余文茵心暢熊君崇山凡八人余君次年登第

因十年乙未二十歲正月杪王家營賃車行東境俱已

安貼二月十四日至京寓南館後進西廂房是年開

卷經本房長白白公麟閣薦三藝俱已付刊擬第四

名三月杪總裁屬同考以前十名試卷例應進呈

書細加校勘白公人本樸誠自恃無他因言此卷絕

無違誤惟第五策用大厯字業經改寫自無妨碍王

考編文恭公變然疑其不可白公爭愈力而文恭疑

亦愈深紛競者數日迄以南昌高君學鍊為房首名
第十三而江西首卷為新建魏君春林名第六於是
取中在後之卷策內用慶歷萬歷等字者皆易之自
後科場禁例除閱歷字照常書寫外其本字係指天
文者雖經改寫而古字本通試卷內亦宜避而不用
以昭敬謹蓋文恭弱冠登朝畏慎無過失獨嘗於
進呈文內有引

御製詩用本字未經改寫者坐是出南書房故生平
過

廟諱

御名輒加敬畏然宋制尙避嫌名則古字本通之字理
宜謹避今之禁例自爲得也五月三日隨先君仍
借熊君出都六月二十一日抵家

四十一年丙申二十一歲家居無事

四十二年丁酉二十二歲十一月起程赴京同行徐丈
蓀塢十二月至杭州河凍寓城內惠安寺者二十日
時文勤公任浙江學政常至署中臆底立春凍解賃
舟行附舟福建劉君漢人至丹陽值運河挑濟壩
未開帆檣山積停數日知開壩尙早雇扛車行七十
里除夕鎮江問舟是日寒甚

四十二年戊戌二十三歲元旦啟行泊金山下登山一覽數日至王家營賃車月底到京寓南館後東房是年試卷在嘉定籌圖秦公大成房閱薦主司于金壇首藝連圖者數十句無評籌圖先生亦未知所以不傳之病在病亦以時日促故病猶夫子辰也車至台庄賣舟由大江歸里同行徐六丈海帆十丈環圖日星宋紹禧等遊寧牧園騎龍金砥廉作礪陳秋澗吳楚歌平華叔至寧開祖妣謝孺人去世十月廣京學使選江李雨村吏部調元自蘇州遣人邀入粵由會垣舟行至蕪州陸行八日抵嘉應州雨村令其

子朝 問業同事者錢塘丁傳魯齋桐城孫良弼金

區王容太倉王口除久在惠州是年長妹適彭

國十四年己亥二十四歲正月隨學後至廣州是年將

試瓊州予往於過海歸出高要門底附近山西會館

斜對遇者一月同邑廖君名李愈安義輝壁

楊君姓高安吳君名李利華時相遇

從二月廿一日附舟歸時先君自去歲攜予至省

啟行後聞嶺南多瘴且慮水土不習令僕人張發促

歸三省予已登舟因擊之同行過梅嶺遇雨前夕復

醉淫暮至南安道旅次日早感中氣繼遣人請學醫

鄒五丈秬畬王求醫服一劑而愈三月杪抵家十

二月赴禮部試因次年

聖駕南巡慮山東車值昂貴取中道由湖北河南同行

徐文洪波大海自家雇扛車至九江覓舟過黃州觀

迎春

四十五年庚子二十五歲春至京寓北館前小廳闢卷

係合肥蕭公際韶房因題係補傳場中欲融會書旨

未避下文心字見抹亦其宜也榜後留京舅父秋圃

先生隨以謁選至臆月移寓粉房琉璃街是年與同

輩六人文課長沙周希甫有聲南城章六石樓學濂

鉛山蔣二秋竹知節臨川李三姻叔夢巖傳燮湖口

彭十錫珩宋侶蓀是年次妹適宋

四十六年辛丑二十六歲會試大挑俱見黜試卷散點

終篇無評抹聞其房似是郭寅亦未知果否正月試

膳錄夏試教習均未取錄教習卷詩用琅光字本無

出處閱卷官用紙條書此二字抹之可謂明矣自潞

河由大江抵家才四十餘日緣夏秋間北方水漲而

江風順也同行羅丈平齋羅晴沙廖愛吾以莊涂山

曉日炬寧州榮君錫廣昌揭君芝蘭凡七人

四十七年壬寅二十七歲都伯黃公修都萊徽縣莫

志以後事蹟邑人因議重修署縣事李公樹德悃悞
無華同入築室道謀日享盤飧無所事久之予謝去
志迄無成而選舉之屬鋟木者已不少板存徐某家
今一片不可得空費多金尸素之愆於斯爲甚十月
邑丞漢陽員角江君瑞延課其子

四十八年癸卯二十八歲在江君署舅父於去年春選
授浙江湯溪十二月北上經湯溪度歲

四十九年甲辰二十九歲正月初徐丈洪波廖君搏萬
學鵬及牧園通署因同行由王家營雇山東笨車至
京寓牛血衛衛校尉營家承祖叔寓會試本房大理

卿長白富公炎泰閱薦三司德定圃宗伯評云理境

清蕪絕無塵氛首三藝連圈二十餘句江西中額十

人南昌府屬無一雋者是歲閏三月於四月始出京

同行徐丈海帆環同廖白香用雲熊允吉兆占鄒丈

瓚侯玉章廣昌李君開元宋侶孫偕弟雲墅鳴琦五

月初至揚州諸君皆取道浙江惟二徐丈及予由大

江六月抵家秋仍館江君署

五十年乙巳三十歲館羅坊嚴氏下榻仙遊觀是年

先母及內人因予年已及壯且係長子買一人為嗣

續計其奇劣予知不可留將轉售而家中皆謂如我

等人家詎可作如此事內人持之尤力至庚戌歲抄
迫於無可奈何始從予說造鄰邑有明知其劣而願
售者亦奇也居數月仍轉鬻於人予命西火以戌爲
墓乙巳至庚戌五年適行戌運俗云墓庫運凡事顛
倒以是觀之猶信真西山常以命訛日者殆有據而
然與

五十一年丙午三十一歲仍在仙遊觀十二月偕碧巖
兄北上仍經舅氏任所

五十二年丁未三十二歲正月鄧君緒五經遠過湯溪

因偕行由清江浦賃小車至台庄雇驢車抵京任東

河沿舊館客房會試大挑俱見黜試卷散點無評抹
或云是葑蕀王友亮房未知其審凡士子崎嶇數千
里入都就試每房之卷至多不過三百每卷加一二
字但勿批其杜撰其爲挑而來者卽加以潦草荒疎
等字有何費力奚爲不著一字乎已酉奉

諭旨不薦之卷必批明不薦之由自後舉子雖黜無怨
矣偕石華叔碧巖兄五月初賃車至台兒庄附硝舟
遇臨川黃君友榮同行仍取道湯溪大熱時至家是
年場前於禮部改今名九月蒲山弟完姻

五十三年戊申三十三歲仍館羅坊嚴氏墨園家塾十

二月北上同行嚴叔管及韓中_{韓吉}廖君搏萬鄒君
綬麟仍取道浙江

五十四年己酉三十四歲正月過湯溪舅父有公事未
返惟表兄濟源鳳_汪在署留數日行自甲辰至是費
舅氏資斧者三心殊媿赧過高郵見州牧吳公距丁
亥廿三年矣經雄縣於劉丈笛樓念_拔署覓車同廖
君迂道過保定司馬涂山曉署一宿三月四日抵京
寓北館閣卷經本房宛平史柘溪_{程容}閱薦主司鐵
冶亭宗伯評云體度雍容後二篇亦妥適詩佳三藝
及詩選圖凡數十句榜後留京兩年中同里官畿輔

君頗多涂劉二公外甘宣化純齋先生立德徐河間

慎齋日言時署寧晉及山東廉訪甘丈德齋定進余

太湖文茵及湯溪舅氏皆有卷資受之滋媿是年三
妹適徐

五十五年庚戌三十五歲會試首題皆自明也臨桂周
君現評云文筆頗覺清警惟首作後比用乾之象晉
之象似於引書釋經之外另增枝節殊非文體所宜
且中比末句千手雷同奈何奈何二妥三平詩頗佳
惜筆念不控而擡劬字姑備蓋是年江西之卷多用
方城禹御洪水一節題文中比末句黠而不薦亦宜

也同碧巖兄熊君崇山蔡妹丈岷虛顯功由潞河大

江歸抵家十餘日弟藹山貴興補郡學生弟生辛卯

六月先君方攜予京邸時年二十

五十六年辛亥三十六歲大中丞姚鐵松先生於豫章

書院山長鄒侍御西麓先生處見予駢體文以爲可

遠邀入署襄筆墨是年春先母患咳二月嬰腹疾

端午後腹愈而病劇歸視者再秋頗愈十二月杪始

自署歸

五十七年壬子三十七歲正月初納側室張上元後仍

入中丞署因先母疾未全可署內往還不便三月

初辭出隨館樓前帥氏家塾距家二十里而近四月中
先母患項筋痛至子後輒不能寐閏四月杪自塾歸
五月初仍至塾六月鐵松先生丁內艱赴省作弔仍返塾
七月初諸生赴省應鄉試子歸侍疾重九先母弃世是年
同學嚴柳樓雋

五十八年癸丑三十八歲館清江南溪楊氏寧靜草堂
俗呼南陂橋同學楊得之補諸生是年徐氏妹卒側室
生長男佑書

五十九年甲寅三十九歲仍館南溪內人生長女而病
三月八日卒是年同學融石屏雋

六十年乙卯四十歲正月偕石華叔碧巖兄學博分官
林尹堂 大任 倪軒彭君 端甫 蔡君星玉 象衡 由大江
赴京黃林庄雇笨車閏二月抵都任北館小房大挑
見黜榜發馮下第偕尹堂洪波丈金君幹成 廷松 王
君 視 等賃車至台庄附舟由大江六月杪至家八月
因兒生九月同學朱蒙泉嚴朗垣雋洪席珍得乙選
楊齊嵐舉優行入雍蒙泉籍豐城地名泊潏距南溪
廿里其俗取科名及遊庠者告祖之辰宅前演劇十
月初齊嵐邀至其家往來兩處張飲數日頗爲歡洽
膺底石華叔歸始得試卷本房不知何人評云不能

卷之二

二

切題發揮糾纏無味二三皆泛泛無一真切語詩平
觀其筆畫殆少年人初謂評語於予文病處似乎秦
越細思其言亦復有理因於近墨內頗求其所謂切
題之說已未遂叨一第斯評與有力焉是年四妹適
帥

嘉慶元年丙辰四十一歲仍館南谿田兒未周歲而天
同學徐拔元甲補諸生

二年丁巳四十二歲館南谿五月次女生

三年戊午四十三歲館南谿同學徐芸門及門同學饒
拔英雋薦月偕拔英及清江張君志泰靖安舒君景

驥趙松友邦元峽江郭韻堂廷璜同邑徐謙雪必貴
葆初必德由大江王家營赴禮部試

四年己未四十四歲正月近龍江關遇暴風山東道上
陸行遇雪騾夫牲口皆初習陷淖輒不能行甚至卸
行李雇人搬運步行至逆旅已將夜半而空車仍不
能起次日早用衆力始拔出之前後來往此途二十
餘次無若此固之踳踳者二月至都寓南館前進東
廂房四月六日榜發中式第三名本房漢陽蕭岷田
先生詩云博大精微總裁大興朱文正公云文富理
清長沙劉文恭公云精理明辨儀徵阮芸臺師云思

范筆達長白文芝厓師云義精語粹前十名三場卷
例於榜前進 呈仍錄第二藝第二問入進 呈刻
本 殿試三甲第一名

賜同進士出身 朝考第十名五月三日引 見蒙

恩改庶吉士八月入庶常館宋禮部雲壑邀至宣武門
外上斜街寓邸課其子八月雲壑入川候補太守九
月家舉出京余仍寓南館十二月交勤公招至豐順
衛符寓邸課其三孫是年第三女生九月廿一日
高宗純皇帝升祔 恩封先君 贈贈先祖皆敘任郎
翰林院庶吉士祖妣廖妣陳皆 贈婦人

五年庚申四十五歲六月予因久住外城好於門攤書肆遊行寓目屬小恙辭公出居北館門側兩間是年四妹壻帥幼芸學議雋錫彭秀巖立仁選廣西金城巡檢司從錫靖安舒石生選拔貢生同學余嶰谷鄉試得_乙選五妹歸於涂

六年辛酉四十六歲二月移寓粉坊琉璃南頭路東小宅四月十五日

冊立中宮 恩封本身妻室內子甘得 贈孺人十八日散館二等十八名二十日引 見收主事籤分吏部派文選司行走候補世九到司同學明垣芸門第

進士徐館選改令嚴刑部主事五六月間京師雨數
十日不止畿輔大水予體不耐潮濕七月十九日請
假附同學楊得之大使舟南旋八月初啟行霽舉登
第候補中書請假同行九月杪至揚得江西題名小
錄知弟藹山及同學帥蒲香雋十一月至家臘月送
藹山弟北上至省得順天試錄知同學彭春農雋藹
山弟偕徐瑤圃光廷由浙河入京予於臆底回家
七年壬戌四十七歲館南昌黃氏下榻進賢門外法輪
菴九月次子佑藩生十二月三弟裕之益興卒以次
子子之是年彭氏姑母去世年八十二同學楊行端

補諸生

八年癸亥四十八歲春往饒州景德鎮饒州過宋溫魏
景德選許張瑜族兄大業等相處頗密六月歸八月
自省如清江林樹鎮楊立山春園昆季勘入都助以
資斧十月借涂菊人日耀由浙江王家營北上騰底
至京任南館前進封印前一日到司是年伯父去世
年八十一

九年甲子四十九歲八月鄉試充受卷官九月望得妹
文幼芸書知藹山弟卒於七月三日因請假歸由台
庄大江十一月到家

十年乙丑五十歲館清江老嘴頭楊氏敬業堂書塾主人輝堅已卒其子字敏行九月三子佑象生是年春
養第進士十第完婚

十一年丙寅五十一歲仍舊館楊得之卒於揚州臆底
予辭清江之館欲於鄰近招數人講肄迄未就自家
至省而阻未幾是年九第完婚

十二年丁卯五十二歲日淹留旬日三月過衢州遇菊
入鄧署龍游事至郡偕返龍游寓署留數日偕往杭
州賭樓渡江至上虞金山塲晤徐効菴必蓋偕返
杭旋賃舟往姑蘇四月初寓彭表妖夢遊天地醫寓

昭方伯胡公果泉泊鉛山熊三兄撫安義熊照磨
源義寧冷香阜豐端午看龍舟後數日賃小舟如
揚謁芸臺師於家將北行不果附舟至蕪湖晤楊觀
察雪颿九兄寓澹齋菴聞楊君春園去世時徐芸門
任南陵距蕪湖百里留署數日仍返蕪湖晤署觀察
魯子山銖旋賃小舟至安慶廉使楊栢溪二兄時署
方伯而雪颿來署廉使二公以暑熱勸予留逆旅數
日雨後微涼乃行過湖口親家李春蹊廣文署停數
日偕春蹊至省即歸八月仍偕立山至河口九月回
省垣十月杪至家是年同學熊聲谷雋歲杪六妹歸

於周

十三年戊辰五十三歲館中丞蘭畦金公署公爲文芝
厓師會試本房是年立山楊君卒又聞霽嵐卒於廣
西五月至南溪七月再至送春園得之葬九月先
君八十壽辰後攜佑書入京由浙江至黃林庄雇笨
車行未久車夫一人佯病雇驢馱至台庄復雇一車
過鄒縣車夫二人逃縣尹衡水周君景巖留飲覓一
轎車至德州始換大車向嘗以笨車極安便及是乃
知其不可雇也十月二十七日先君考終於家十
二月初十至都寓北館前小廳十一日到司十五日

咨文到部丁憂

十四年己巳五十四歲正月朔奉

萬壽恩詔賜贈 先祖承德郎吏部主事

晉贈 先君如之 祖妣 妣皆

晉贈安人二月出京四月至家是歲聲谷登第同學何

鳴岡補諸生臆底次妹卒

十五年庚午五十五歲館水樓余氏下榻靖安城外十

餘里凝禧觀九月同學余齮谷東白兄弟及前同學

周道谿雋十月下榻干洲余氏祠歲杪佑書愛室

十六年辛未五十六歲仍館余氏下榻顧埠董侯書院

同學胡希文補諸生

十七年壬申五十七歲下榻水樓余氏默齋家塾前同學宋懷英舉歲貢生其子香雪及再從甥靖安舒讓伯選拔貢生是年膺底自家至省雪阻未歸於試館度歲是年七妹歸於甘

十八年癸酉五十八歲仍任默齋二月長女出閣九月同學余惠疇及前同學廖溥泉彭荆田雋香雪居鎖榜十月偕彭君倪軒入粵十一月至廣州寓春農學使署是月初九家中得長孫代官次年正月廿五閱家信乃知之

十九年甲戌五十九歲因粵中講席已定無坐處慶文
之事限於精力非所克勝二月十二附舟歸閩二月
十一過吉安原泰鹽肆余君秀老挽留數日十九日
附舟廿六至省寓吾家試館三月初十移寓府學崇
禮堂廿三移尊經閣十月十五因自腹以下小腫歸
十六至家勿藥而愈是年九弟補國子生荆田登第
廿年乙亥六十歲正月廿日得次孫芳官是年充南豐
書院山長聞止有數月之膏火因從同學之請仍館
清江彭澤 文昌宮書舍二月九日至館四月廿一
附舟往省廿二住周氏試館廿九自省如南豐陸行

四十里至謝準附小舟端午泊許灣初十至琴城書院亦曰琴臺六月中得兩廣制府蔣礪堂先生邀往端谿之信七月初六自南豐買舟回清江承邑人士於書院懸一小扁云人師小引云奉新趙太史竹岡先生今歲主講琴臺書院邑人士皆有所矜式先生固經師亦人師也今歸里有日未能挽留謹書於此以誌景仰之意邑人羅經魯學泗譚光祿劉煒鄧來覲趙宜鑾偕肄業生童立十二日至省廿三自省登舟廿五至彭澤十一月十日自館至鎮任阜興號張慶雲兄藥肆十二日登舟十三至省廿日歸家十二

月廿日自家起身次日至崇禮堂前兩次皆寓此
廿一年丙子六十一歲偕族弟浣生大觀附舟如粵正
月廿六日登舟數日始行二月初將至豐城夜遇大
風與己未龍江之險相似三月六日至端谿書院七
月一日往省見礪堂先生初九歸十二日早登岸九
月五日廣東鄉試揭曉次日始知書院譚雲二生雋
羅副榜第一十月三日得江西鄉試錄知靖安從甥
舒載餘恭受洎其叔慎符懋修湖口周世兄雪橋仲
堦南豐趙階平德徵詩

廿二年丁丑六十二歲在端谿九月礪堂先生送來歲

關書十月先生調任四川初二日予買舟至三水初
四見先生送行初五回書院十九日新制府阮芸臺
師自廣西過肇見於舟次是年次女三女出閣長孫
女及劉家外孫女生宋錫由吉願年同學清江龔東
樂補諸生

廿三年戊寅六十三歲在端谿二月九日往省見芸臺
師寓舒菴房妹丈正南街公館十九歸廿一至書院
九月一日得來歲關書是年三月廿一得幼芸廣省
來書知六妹婿周六璧兆瑄去世六月幼芸來書院
十一月偕浣生歸十月十一見江西試錄知從弟養

吾得解首是年書院陳溫二生雋宋甥選年余壻振
采補諸生三女孿生二外孫女同學高安朱石梧振
果雋次年始知緣本名絲未知其改名也

止四年己卯六十四歲在端谿正月四日往省仍寓萸
房公館十六歸十八至書院十月初三復往省寓舟
中初十還書院芸臺師兩次皆不在署一在廣西一
往京師閏四月十日東樂自家來六月晦得帥幼芸
書始知長媳已于上年去世隨問家中知故於二月
二十八日孫女亦夭於五月十二日八月廿九長女
生一外孫十九次女生一外孫女九月書院李生雋

四載端谿三逢鄉試例於六月廿三爲決科之課丙子謝生第一未入場第二名卽譚生智浩戊寅陳生虞裔已卯李生天任皆決科第一亦一奇也是科本省鄉試德興筮生賢書雋十一月一日張發卒發南昌人居省城鐘鼓樓側近幼失父母家惟一伯母待之不慈年十六跳至奉新依予家從入都者三予久不第慚於其僕令他往已未適在京因復從予予授徒無須僮從仍令他往率半歲或一二歲輒遷性剛褊使酒與儕輩居至匝月未有不相詬者聽其言大率因不肯侵冒主人之費居多予諭以錙銖之物無需

計較弗能改也。遇車輿不便，步從數百里。有公事湍
水中行數十里，不以爲勞。在甘肅有年，所得金爰費
外，仍好調。同侶之急，輒隨手盡。年六十八，無家室。卒
前數月，買一女，病亟，書院茶房黎德願以爲媳，葬於
義塚。黎氏祖墳之側，春秋麥飯可附及焉。其伯父及
父皆爲人，儉從。卒於粵。渠上年欲歸里，予許之。因循
未果，竟卒於粵。始有數存，與初六日得署制府康蘭
皋闕書。十二月，姪汝駒來。

廿五年庚辰六十五歲在端谿正月十二東樂偕汝駒
旋里五月間七妹去世之信是科會試載餘中式七

月廿五日

仁宗睿皇帝賓天肇郡於八月十九日聞報十月七日
由廣省歸家十一月十七抵家歲杪東樂來視予在
予家度歲

道光元年辛巳六十六歲正月十日自家起行東樂偕
予次子佑象姪汝令同行十一至崇禮堂十六登舟
十九至黃土寓沃塘東樂家日省堂兩日出至樟鎮
寓南溪楊氏恒裕號兩日自癸丑館南溪往來輒下
榻於此幾三十年人事變遷非一調工部多慙鮑叔
知及白首泪雙垂之句爲之泣然輾轉不寐者久之

廿五日別楊家長幼及東樂暨同學聶子嘉等攜子
姪行二月廿日至端谿始知移館香山隨賃原舟由
省至晉山廿五日抵豐山書院九月廿九日解館歸
十月九日自省登舟十一月十五至崇禮堂仍往南
溪數日十二月十五抵家

二年壬午六十七歲館樟鎮 文昌宮是年同學楊特
舉肅培植補諸生新喻袁文輝雋

三年癸未六十八歲館臨江章山書院寓居慧力寺二
月至館同學楊霞舉補諸生十一月歸家十二月省
垣度歲

四年甲申六十九歲正月十日自省登舟十四日至黃
土寓日省堂數日十八至新喻館西門周氏祠十月
底志局度歲

五年乙酉七十歲仍寓周氏祠同學王日新何滌川胡
人鏡塗克生選拔貢生皮栗菴補諸生鄉試胡希文
雋

六年丙戌七十一歲館渥塘袁氏二月至館十一月歸

七年丁亥七十二歲館本邑岐峯書院

八年戊子七十三歲家居同學裴序軒補諸生南康廬

厚南雋

竹園師哀辭附

維道光戊子冬十一月乙卯先母見背之五十六日也日午吾

爾竹園趙先生凶問至越翼日丙辰耀南爲位于日省堂書屋謹奉心喪之禮訃告闔郡同學諸友前月之初耀南使姪濟才奉聞先母之訃旋讀手諭病勢日增二十日卸哀恭謁助調湯藥數日飲食漸加行動可自爲力謂耀南二十六日其旋里吾一年或可無妨明年二三月當來編未成之集不意遽爾長逝臨終十五日飲酒數盃口占一絕云魂歸縹緲留形際

命在須臾頃刻間只恐夜臺無紀與提壺沽去復空
還兩月之閒登遭慘凶嗚呼痛哉憶自弱冠失恃棄
舉子業行篋每攜玉茗堂四種紅雪樓九種及購全
集讀之慨然想見其爲人乙亥受業

師門欽承講畫久之知其性外和中介真有吾鄉湯若
士蔣清容兩先輩之風而闡論四書經史類多先賢
所未發無一語拾人牙後慧其所見殆欲過之於易
學尤爲淵綜如序卦或以爲非易之蘊非易之精

先生駁正京房之謬妄就上下經次序依相盪卦列成

二圖精蘊畢見惜前人未及見繫辭首章自來卦以

爲渾言陰陽形氣之實體性吳草廬知雷霆風雨指
先天次序圖而上下文仍雜以後天之說今以天地
定位圖句並下文皆指後天而此章釋先天又分剛
柔相摩圖句及乾始坤成爲橫圖之位日月運行四
句及成位乎中爲圓圖之位識解超卓耀南母老不
獲朝夕隨侍而諄切訓誨雖不能至心嚮往之遺稿
俟商諸同志次第梓行

先生行事已自爲鴻爪錄耀南作哀辭以舒其哀以附
於鴻爪錄之後

嗟維昔


歸兮少舉於鄉長更迤邐兮屢窒於行將天厚其植兮
祿故不豐抑天逸其躬兮縱使常羊身雖未顯兮於
道彌光鑽研聖籍兮如炙其旁論或驚衆兮義則優
長空所依傍兮雖創胡傷彼易之精兮說未盡良穿
鑿淺陋兮輟轉多妨既經圖示兮意實如常異固非
異兮同亦非同嗟若列宿兮使循其行千載疑團
兮謔然交過親炙雖久兮愧不自彊一旦永別兮瞻
仰徒誠嗚呼哀哉兮何日而忘

辭韻

次韓文公歐陽詹哀

皇清誥授中憲大夫 賜進士出身掌山東道監察御
史署工科掌印給事中稽查北新倉事務前戶部
員外郎八旗現審處總辦則例館提調總纂山東
兗沂曹濟兵備道江南江安等處督糧道揚州府
知府刑部郎中員外郎主事總辦秋審處律例館
纂修管理贖罪處充 文淵閣詳校官乾隆乙卯
甲寅己酉 恩科順天鄉試同考官加三級顯考
春松府君自記年譜

仁菴自記年譜



長樂系
振錄西

乾隆二十一年丙子秋九月二十六日丑時仁菴生
於錢唐北郭米市巷之老屋先大父贈中憲大夫
蘆溪公尚在堂大母章太恭人下世已八年先君
贈中憲大夫秋浦公配先母吳恭人秋浦公同懷
兄四人大先伯封州同知晉贈奉直大夫掌山東
道監察御史瑤圃公二先伯贈朝議大夫戶部山
西司員外郎國子監典簿靜陬公三先伯封奉直
大夫刑部貴州司員外郎復堂公四先伯贈中憲
大夫戶部山西司員外郎歲貢生候選訓導香城
公時皆慶侍仁菴始生之前一夕吳恭人夢人授

一香櫟有枝葉因小名櫟命名成憲字寶臣及長
號曰春松後得宋玉印章文爲仁菴又自號仁菴
焉

丁丑仁菴年二歲是年冬秋浦公補博士弟子員學
使者東武竇東臯先生

戊寅仁菴年三歲秋九月二弟彝憲生冬十一月先
大父蘆溪公卒

己卯仁菴年四歲是年冬先恭人於懷抱授文選詩
及唐宋人絕句

庚辰仁菴年五歲

辛巳仁菴年六歲始入家塾誦毛詩師先恭人之姪

歲貢生吳畬士先生經督課嚴而有恒每授讀後
不滿百徧雖極熟不許輟背誦盡卷若一字錯更
令追讀從師七年頗以爲苦十三經史記漢書文
選皆畢功速後簿書鞅掌久不溫習故業而夙讀
之書老而不忘皆此七年中先生之力

壬午仁菴年七歲

癸未仁菴年八歲是年冬讀周易師以重巽以申命
句令屬對卽舉先經畢業尚書中允升于大猷句
爲對師亟賞之

甲申仁菴年九歲是年冬秋浦公移居於侍御坊南
之崇雅堂

乙酉仁菴年十歲夏五月三弟蓉生弟嗣三先伯復

堂公後

丙戌仁菴年十一歲

丁亥仁菴年十二歲夏五月四弟紹憲生

戊子仁菴年十三歲師聘君何春渚先生琪先生不

習舉子業精於經史金石之學遂命學爲詩古文

辭雖童年頗心好之是年春正月居鄰不戒於火

門閣燼焉

己丑仁菴年十四歲冬十月六弟景萬生

庚寅仁菴年十五歲師先恭人之伯兄邑增廣生吳

六驥舅氏克昇始習制藝讀書於舅家西爽園

辛卯仁菴年十六歲初應童子試不售是年冬讀書於湖上德生菴

壬辰仁菴年十七歲夏六月補仁和學博士弟子員學使者韓城王文端公是歲讀書於西山靈隱寺之松靄山房

癸巳仁菴年十八歲讀書西爽園師先恭人之季兄

乾隆癸未進士吳竹堂舅氏霽是年冬錫山秦太

史端厓先生潮視學皖江延致竹堂先生於幕府

因負笈從之游

甲午仁菴年十九歲是年春夏端厓先生按試廬鳳

穎三郡及六安泗滁和諸州余悉偕行得遊泗州

都梁山滁州醉翁亭亭藏歐陽公畫像上有李端叔晁悅之書贊並蒙

高廟賜題從裘文達公請也幸肅拜焉秋七月還里省試報罷

乙未仁菴年二十歲讀書湖上葛林園受知於學使者臨川李少司空西華先生每試必首選宋石經考一篇尤所擊賞食餼於庠冬十月元配湯恭人來歸乾隆庚辰舉人辛巳會試中正榜元內閣中書上選公女二姑母出

丙申仁菴年二十一歲館方谷園許氏受業者茂才華祝

丁酉仁菴年二十二歲仍館許氏夏六月試拔萃科
學使者王文端公賞爲遠大之器轉不令與茲選
秋九月舉於鄉座主爲協揆南昌彭文勤公時官
少司空宮詹丹徒茅耕亭先生元銘時官編修本
房師爲義烏明府新城黃平山先生元煒揭曉後
有 賜學正銜同里趙公世玉及前靈石明府涿
鹿胡公永齡就養其孫仁和官舍並以康熙丁酉
舉人重宴鹿鳴文勤公首唱四詩門下士和者甚
衆命余書爲二冊同年序齒余爲之殿

戊戌仁菴年二十三歲禮部試報罷是年春二弟彝
憲補博士弟子員

已亥仁菴年二十四歲秋七月長女瑞葆生冬十一月計偕北上

庚子仁菴年二十五歲禮部試再報罷同考官蕭侍

御際韶優獎文藝竟未一薦是秋鄉試二弟彝憲

中式本省副榜

辛丑仁菴年二十六歲禮部試三報罷爲翰林學士

王正亭先生坦修薦卷主司有五策詳贍之評汔

置不錄夏四月南歸五月抵家前旬日家中不戒

於火讀書之樓燼焉舊藏善本及手鈔祕籍金石

圖繪蕩然無存乃生平一憾事冬十月江西學使

者少司空胡文恪公招致幕下四弟紹憲從學

壬寅仁菴年二十七歲在江西秋七月遊廬山觀漱
玉亭三峽橋瀑布之奇有匡廬紀遊略一卷

癸卯仁菴年二十八歲秋九月自江西歸里冬十一
月計偕北上

甲辰仁菴年二十九歲會試中式 殿試二甲四名
成進士座主爲相國漳浦蔡文恭公大宗伯長白
德文莊公協揆河間紀文達公時官總憲總憲仁
和胡文恪公時官少司空房師爲翰林學士長洲
褚筠心先生 廷璋 揭曉後恭逢

高廟六巡江浙展 廷試期一月試日定不給燭之例及
試卷式比前改小並自是科始前列十卷將奏進

相國蔡文恭公已擬第一因首頁第八行脫寫一
字經南昌彭文勤公籤出抑置第七時相國阿文
成公以刑部需人奏請多派數員引

見時

上親御丹毫注授凡滿漢十三人成憲名列第一到部後
在直隸司行走秋七月乞假歸省

乙巳仁菴年三十歲主講婺州麗正書院是年江浙
秋旱成菑西湖淺涸

丙午仁菴年三十一歲春二月北上元配湯恭人及
女瑞葆從焉四弟紹憲偕行肄業太學時旱歉之
後流民滿野黃運淺阻夏六月方抵都湯恭人勞

勩成疾解裝旋卽呻吟誤於庸醫以閏七月十四
日下世秋九月旅櫬南還四弟率瑞葆回里形影
羈孤遂依棲於胡文恪公邸第在西曹坐辦安徽
司事晝則趨公夜仍傭書屬草

丁未仁菴年三十二歲在西曹夏六月奉派赴

圓明園詳校 文源閣四庫書偕同年吳石亭周
廉堂吳雲樵崔雲客四翰林同假直於澄懷園辰
入酉出每日拜清茶暑湯之

賜紗葛大緞乳酥餅哈密瓜

恩賚數四凡三閱月校畢吳柳村明經

錦

爲作

西苑校

書圖卷題者甚多冬十一月阿文成公奏保提牢

引

見除授凡在任一年先後共事者曰 交通曰 瑚素通阿二

君交勉以矜卹獄囚爲務十二月四弟復至京

戊申仁菴年三十三歲在西曹有歌郎陳盈官以色

藝冠一時素驕侈因事逮繫司獄繩以法抗不循

也因立予杖仍牒所司核訊何校遞籍同年張芥

舟詩云傲骨稜稜舉世驚西曹望重信陵名與君

欲賭旗亭壁更遣何人唱渭城韓桂舫詩云魏侯

骨聳精爽緊平生坦易無畦畛一臨大事決大疑

口吻風霜受者窘會臨狴獄敲奸偷木彊不顧儕

輩哂皆指此事是年夏三弟蓉補博士弟子員冬

十一月提牢得代授陝西司主事

己酉仁菴年三十四歲在西曹夏四月繼室秦恭人
來歸乾隆丙戌進士國子監司業潮公女秋八月
充順天鄉試同考官得士清和等十三人副榜二
人撥房中式者五人四弟以迴避不與試

庚戌仁菴年三十五歲在西曹恭遇

覃恩贈先祖蘆溪公爲奉直大夫刑部陝西司主事祖母
章爲宜人封秋浦公爲奉直大夫刑部陝西司主
事母吳爲宜人夏五月題授貴州司員外郎

辛亥仁菴年三十六歲在西曹秋九月題授四川司

郎中

壬子仁菴年三十七歲在西曹冬十一月奉派詣

文淵閣詳校四庫書

癸丑仁菴年三十八歲在西曹春二月抱劇疾瀕危
數四閱兩月乃瘳夏五月六弟景萬補博士弟子
員冬十二月以失察四川省遺漏秋錄情實人犯
一名自行檢舉經吏部議降二級因級不敷抵仍
降一級調用相國阿文成公謂余素性孤介必無
力捐復原官卽以熟習讞務面奏隨與各堂官具
摺保畱照所降之級補用仰蒙

恩旨准畱刑部後余感舊詩有云惟將耿介酬知己說著
恩言淚便紅蓋紀實也

甲寅仁菴年三十九歲在西曹春三月補授安徽司員外郎充律例館纂脩夏四月特拜荷包香扇之賜秋八月充順天鄉試同考官得士蕭培厚等十三人副榜三人撥房中式者六人四弟以迴避不與試是歲連次承辦

廷鞫重案屢蒙

賞賜克食

乙卯仁菴年四十歲在西曹時

高宗純皇帝以新疆黑龍江等處遣犯日積日多有本罪止於杖徒軍流核辦時從重問擬者交軍機大臣會同刑部查核分別減等爲從來未有之曠典經

堂上官崑派與裘可亭郎中行簡逐案逐名悉心
核議可亭兼直樞省復專以屬余余念邊方久戍
人數盈萬幸際

聖恩寬大法外施仁而歷年久遠刑部載經回祿成案不
全惟在慎重周詳方足以廣

皇仁而昭矜恤行准新疆等處冊報遣犯共九千八百二
十一名余稽核爰書準酌情理除情罪本重擬不
准者三千四百名外餘擬卽釋卽減徒者共二千
九百六十八名分別滿五年十年二十年再予減
釋者計三千四百五十三名逐加詳勘與可亭再
四諮商由堂上官會核畫諾奏上得奉

俞旨是役也同曹初以艱鉅之責代爲惴心余積半年晝
夜力於案牘叢殘中手披目視草成奏牘萬頁深
以不致隕越爲幸秋八月充順天鄉試同考官得
士解元王廷濬等十三人副榜二人撥房中式者
四人四弟以迴避不與試九月題授廣東司郎中
嘉慶元年丙辰仁菴年四十一歲在西曹元旦

授

受禮成恭遇

覃恩晉贈先祖蘆溪公爲朝議大夫刑部廣東司郎中
祖母章爲恭人晉封秋浦公爲朝議大夫刑部廣
東司郎中母吳爲恭人春二月都察院奏江南興

化縣民陸錦書呈控縣書聳官開征一案

命署少司寇

伊江阿

公馳往審辦余與金臺員外

亮保隨

行以三月上旬抵境核訊定擬十日蕞事回棹時
適秋浦公有高郵之役不期相值舟中侍奉數日
至公路浦登車拜辭北上揚州羅兩峯山人聘爲
作官舫侍膳圖海內詞人題成巨卷

丁巳仁菴年四十二歲在西曹秋八月阿文成公薨
繼任總理秋官者爲大學士和伯一日余赴直廬
白事多辨難同年友陳質齋少宰時爲吏部郎文
遠臯中丞時爲辦事翰林適在列牽余袂至戶外
曰和伯與君素無半面識新莅事而君論事之頃

屢持不可殊非閭閻之義余曰民命至重少依違
則說不能達矣已而和伯悉如余說行冬十一月
男謙晉生

戊午仁菴年四十三歲 京察一等引
見記名奉

旨補授江南揚州府知府春二月朔請

訓蒙

召見於

養心殿

垂詢出身家世敬謹奏對

太上皇帝謂汝是讀書人家並

諭以清廉愛百姓者再成憲之以清愛名堂及繪讀書人

家之圖誌

恩遇也三月挈家買舟南下夏六月到郡時值小旱步禱
卽沛甘霖而泰州東臺興化寶應得雨少遲親往
履勘詳請緩征又以郡城河淤淺籌款疏濬是秋
鄉試文闈江都黃生承吉武闈甘泉張生金彪並
冠榜首越歲會試江都史君致儼以南宮第一入
詞垣堪輿家謂爲脩復水利之驗亦偶然耳秋八
月三弟蓉力疾赴省試試後加劇不起九月秋浦
公偕太恭人就養郡署

已未仁菴年四十四歲正月初三日

高宗純皇帝龍馭上賓

哀詔至朝夕哭臨敬念自成進士卽蒙

特授刑曹嗣後資淺題升左遷留部屢叨

俞允兼荷

恩褒每當祇承

廷鞠克食

賚及小臣中祕紬書珍

賜出於內府去春上考

記名出守陳謝跼聆

天語勉奮殊常悲感交縈涕泗橫集

山陵禮成恭遇

十一
覃恩晉封秋浦公爲朝議大夫江南揚州府知府母吳爲
恭人而贈元配湯封繼室秦均爲恭人夏四月制
府費文恪公檄調至江寧遵

旨復鞠先經正法副將楊天相一案是案副將以獲盜報
制府蘇相國訊非實情行查閩省未准咨復卽以
誣良爲盜定擬中外傳爲疑獄余檢查案牘核訊
證佐與原問一一符合力持復查閩省之議期於
鑑空衡平旋准閩浙諸大府密細詢訪實屬良民
奏奉

俞旨朝野始無間言秋八月奏護常鎮通海道篆冬十一
月奉

旨補授江安督糧道十二月以公事赴淮安除夕歸次召

伯埭阻凍

庚申仁菴年四十五歲春正月赴江寧任督糧道事
夏四月長女瑞葆贅壻張茂才泰泉是月督運北
上時方奉整飭漕務之

諭旨力矢清慎以選兌好米官丁交便爲兢兢有運弁一
人於受兌開行後復以米色不純具稟余廉知貪
僞親臨水次傳集官弁驗明實係好米將捏稟之
運弁立予細責通幫肅然進行無滯抵通州逐一
交卸惟松江幫米不足數經倉場奏

聞將旗丁拿交刑部運弁一併革訊余知爲沿途食耗並

無他弊照例籌款買補並具牒據實申部訊供無
異復奏後檄坐糧廳驗米補收革弁開復擬杖之
旗丁並予免罪是役也余裁禁陋規酌定經制傳
籌握算日發百函炎風烈日中或乘單舸或駕小
車往來催察幸免訐尤六月初九日先大夫棄養
於金陵官署制府費文恪公馳奏上

聞是月二十六日在張家灣水次聞赴呼號莫及痛不自
持交篆星奔旋署秋八月奉吾母吳太恭人扶護
回里遵例入城治喪淺厝於臯亭山麓

辛酉仁菴年四十六歲守制在里恭遇

覃恩晉贈蘆溪公爲中憲大夫江南江安督糧道祖母章

爲恭人秋浦公爲中憲大夫江南江安督糧道晉
封母吳爲太恭人

壬戌仁菴年四十七歲守制在里夏四月舅氏竹堂
先生卒於蘇州平江書院馳往護喪五月仲姪謙
泰補博士弟子員冬十一月服闋十二月北上舟
抵袁浦內弟秦君用翰官清河縣廣文畱署度歲
癸亥仁菴年四十八歲春正月杪抵京寄居旅店溫
習經史徧遊城南古寺訪碑看花頗得閒靜之樂

三月二十五日奉

旨補授山東兗沂曹濟道翼日請

訓蒙

召見於

勤政殿

上謂汝非有人保舉由朕親用並諄諄以察吏安民爲諭單車之官夏四月二十六日任事越三日詣

闕里敬謁

聖廟並展

孔林五月赴曹單工次防伏秋大汛至霜降後已慶安瀾

忽豫省衡家樓河隄漫溢充曹地居下游壽張陽

穀荷澤定陶曹單濮范鄆城鉅野等屬被浸成菑

秋九月十六日聞信星馳履勘亟加撫卹中丞鐵

公命議大賑章程余周諮寮友采訪紳耆擬就規

條二十四則中丞刊發有菑州縣遵行設粥廠數十處集捐棉衣十餘萬領余親赴各鄉村抽查戶口分別極貧次貧自仲冬至季春本邑折色核實兼放與菑民相見於泥淖中有感泣者余有示牧令詩云流亡皆赤子慙愧俸錢多忍使千家哭愁連萬井波長裘資蓋裹凍澤轉陽和默默情難說新霜鬢漸皤冬十一月六弟景萬奉吾母太恭人至署余方在濮陽察賑接太恭人諭盡心賑卹不必急謀覲省敬賦詩云一紙家書抵萬金王程還念我登臨正逢肅雁劬勞日多感慈烏惻隱心土銜煙騰新脫粟木棉衣暖舊紉箴如何衆母兒身

任愛惜蒼生母訓深逮小除日甫得旋署拜見太
恭人起居康彊幸遂膝下團圞之樂

甲子仁菴年四十九歲新正三日卽赴濮范一帶察

賑與孫觀察

星衍

偕在濮陽同勘金隄有聯句五

言古詩一首夏四月衡工合龍賑務報蕝始終無
一道殫之人亦未有陳訴之牒而髭鬚自此見白
矣五月詣曹單工次防汛秋九月奏報安瀾因念
太恭人就養後水土不甚相宜飲食少減且職在
隄防常駐工所不獲晨昏定省卽具公牘乞養并
以詩上鐵中丞云莫慮飢寒計俸錢慈雲冉冉夕
陽天只緣烏鳥投林急不爲鱸魚入饌鮮霜後孤

筠須愛護風前殘燭怕流連此情大府如憐許猶
及深秋下水船旋以鐵中丞與徐節帥堅畱不得
請是年五月姪彭年補博士弟子員

乙丑仁菴年五十歲春正月赴濟南謁鐵中丞力陳
歸養之情已荷憐許旋具牘賫申適中丞晉督江
南正在據情繕疏李節帥以莅任未久正資佐理
馳書阻止鐵公臨行仍以手札勸畱余無如何也
夏五月赴工防汛太恭人起居如常而飲食減少
日進參劑余日夜眷戀喜少懼多秋九月三日接
六弟信云近日太恭人小恙余卽晝夜遄程以初
六日回署見太恭人於榻前諭云別無所苦但喜

睡不喜飲食耳余侍疾焦灼醫藥無功時妹壻陳
明府日壽入都謁選挈二妹來於初十日晚抵署
太恭人喜劇扶病起坐笑語有加連日勉進粥糜
少許良醫束手但以參麥湯爲引猝於十四日壽
終余自工次馳回未及一旬竟遭大故搶地呼天
生不如死與六弟扶柩絲涕上登舟南下入城治
喪詎二弟於聞赴後哀毀致疾以逝到家已不及
見皆余不孝不弟之愆痛哉冬十二月接部牒知
守揚時失察儀徵縣私梟一案被議降一級

特旨俟服闋赴補之日吏部帶領引

見再降

諭旨榮榮鮮民不更計黜陟矣

丙寅仁菴年五十一歲守制在里夏六月江南鐵制
府與

欽使戴冢宰徐節帥聯銜具奏以要工需員請將丁憂在
籍之魏成憲調取委用得

旨魏成憲尚未服闋不得開奪情之漸不准發往苦由餘
生上荷

孝治矜全涕泗感激沒齒不忘冬十月合葬先贈公暨先
太恭人於佛日塢高郵王觀察念孫爲誌壙中石

吳縣潘學使世恩表其墓墓距先大父蘆溪公兆

域半里而近以二弟彝憲二弟婦張附於其廬三

世體魄相依體先志也十二月葬原配湯恭人於

櫻桃園吳祭酒

錫麟

誌之是歲倡捐重葺慈谿祖

祠

丁卯仁菴年五十二歲守制在里先贈公桂巖小隱
集中有集文選詩句五言律十六首梁學士山舟
先生爲書長卷并跋云有鈎心鬪角之奇而無聲
牙距齒之病若忘其爲選詩者洵前人所未有成
憲拜受珍感急壽諸石願世世子孫寶藏之冬十
月春渚先生下世經紀其喪十二月服闋

戊辰仁菴年五十三歲夏四月回慈谿敬展列世祖
墓時新葺祖祠落成奉先贈公栗主祔祀姪承恩

偕行成禮而還五月雨多傷禾米價翔貴冬十一月爲舅氏六驥吳公營葬於臯亭山之麓表兄翁士先生耐焉

己巳仁菴年五十四歲夏四月遵

旨引

見仰荷

特恩以六部員外郎用復玷之餘京曹仍拜榮感異常時刑部長官將奏畱余婉辭焉遂以五月旋里冬十月恭逢

聖主五旬萬壽偕耆紳梁學士諸公敬建經壇虔申覬祝
庚午仁菴年五十五歲春江南松制府招致幕府夏

五月辭歸

辛未仁菴年五十六歲主講崇文書院夏六月赴湖州會葬侯翀菴兵部健融翀菴甲辰會元鄉會試並與余同舉下世二十五年尚在淺土遺孤貧不能自存因與三數同年爲麥舟之助買吉壤合窆焉次年其少子履元補博士弟子員始有室

壬申仁菴年五十七歲主講崇文書院秋八月姪承恩以主簿分發甘肅冬十二月以諛墓金三百分贈三黨中寒人自顧無以卒歲則鬻敝裘焉時學使者周廉堂同年分俸二十金見貽謝之以詩云窮交散盡賣文錢昨夜清寒剩一瓊飲水心期差

自喜斗升分到必廉泉石門陳梅垞少司馬萬全

同年卒逾十載室如懸磬僅一孫纔八齡冬十二月特往會葬風雪歸舟到家正塗竈日

癸酉仁菴年五十八歲主講崇文書院春三月三日

與莫濰山

濰

高未堂

家駿

朱友鶴

邦經

高邁菴

樹

程

修稷雅集五人合三百四十一歲皆丁酉同年

也自是月必有集略仿眞率會邁菴作苔岑蘭會

圖各賦一詩同人題者甚衆同年蔣礪堂制府書

幣見招因作粵游冬杪始達羊城館於節署十二

月男焜棟生余方在粵命小名曰荔生

甲戌仁菴年五十九歲春二月蔣制府奉

命赴廣西勾當公事邀余偕行歷梧州平樂桂林柳州南

寧潯州諸郡攬陽朔山崑崙關昭平峽之勝謁柳

柳州祠堂觀龍隱洞宋元祐黨籍摩崖碑因題名

於石壁妹壻陳

日壽

時官永康州牧舟次來見二

妹已下世追話涕洟水陸半年秋仲方回羊城有

驂鸞詩草一卷是年四弟紹憲需次閩中旋補祥

豐場大使六弟景萬貢入成均

乙亥仁菴年六十歲春三月自羊城歸舟謁南海神

廟觀銅鼓登浴日亭遊峽山寺淙碧軒觀瀑布上

觀音巖夏四月抵家姪兆奎姪孫大綱同案補博

士弟子員秋七月北上至濟寧店作力疾登車不

事醫藥八月杪抵京乃愈解襄於寄園之古藤精舍

丙子仁菴年六十一歲春二月銓補戶部四川司員
外郎充則例館提調總辦現審處事旗民交涉地
畝案件文移查勘月日經久至有十餘年不結者
每案塵牘盈尺披閱易疲吏因生奸民不堪命余
悉心核訊逐案清釐一經審結兩造退無異詞於
旗民不無裨益是秋姪彭年舉於鄉

丁丑仁菴年六十二歲在農曹管理捐納房事春二
月有刑部獄囚兆昌拾獲司獄吉椿無名詈罵字
蹟輒誣捏重情妄告一案

特命重臣嚴審余奉派往鞫不事刑求四日而真情斯得
省釋無辜甚衆時論躋之姪彭年公車入都晨夕
相對旅中至樂薦而未售首夏別歸姪謙升歲試
補博士弟子員以古學見賞文宗爲杭郡第一男
謙晉娶婦孫氏

戊寅仁菴年六十三歲在農曹吾鄉舊有浙水慈航
之舉爲鄉人旅櫬無歸者附載南還近以運資不
繼事不果行余請之富春董太傅率先捐俸與同
年茹大司空釀金集成有生息之款有取租之屋
酌定規條歲歲運資以裕立石於長椿寺之妙光
閣期於經久踵行秋七月姪謙震繩武同案補博

士弟子員第三女歸壻孫茂才曰庠海鹽陳南叔
爲余寫寄園種花圖

己卯仁菴年六十四歲在農曹恭逢

聖主六旬萬壽

覃恩具牒陳情馳贈外祖父吳公 中定 爲奉政大夫戶部

山西司員外郎外祖母高爲宜人春三月姪彭年
試禮部仍薦而未售與吳表姪庚俱畱京同廡寄
園同人結文字之會時爲評騰冬十月撰進五言
長律庚辰全韻詩祝

嚴蒙

恩陳設

御園十二月保舉御史引

見記名

庚辰仁菴年六十五歲在農曹姪彭年試禮部主司
已列中卷仍以額滿被落夏四月南歸是秋

仁宗睿皇帝駕幸避暑山莊七月二十五日

龍馭上賓

哀詔至京隨班行禮敬念自嘉慶三年上考出守未及兩
年

特擢糧道服闋赴補越次超除

召對時蒙

諭汝非有人保舉由朕親用嗣居憂在里吏議鑄級得

旨俟服闋引見再降諭旨旋經江南大吏奏調蒙
恩不准奪情迨逾

旨引

見榮改京曹追溯回環哀號欲絕此蟣蝨小臣不能自己
之感痛也冬十一月清釐現審處積訟兩月之內
核結一百八十餘案硯冰燈炮披閱忘疲並以恭
逢

恩詔官員賠項得邀豁免謹推廣

德意撰擬奏草其略云查戶部現審處積年已結之案
有因追違例地價花利漏稅銀兩未完不能銷案
者共二百餘案應追銀約五萬餘兩此等追款既

非拖欠官租亦未侵用官項只以嚴禁旗民交產
因而追罰示懲日久催追仍少完報請將定案在
恩詔以前者援照豁免以廣

皇仁而清塵牘由堂上官具奏得

旨英和等奏該部積年應追未完違例地價花利漏稅
銀五萬餘兩凡在恩詔以前者均著豁免以廣恩施
欽此

道光元年辛巳仁菴年六十六歲在農曹充則例館
總纂夏四月山西孟縣民秦美章以丁糧不清累
及里長等情在半壁店道旁叩

關交刑部審明將秦美章依衝突儀仗例杖一百發邊

遠充軍事在道光元年四月初七日

恩詔以前係因輪充里長爲窮丁賠累受苦急切申訴
情尚可原應減爲杖一百徒三年至所控各情事
關民瘼不得以該犯罪有應得不爲查辦致小民
苦累情形無由自達查地畝丁糧事隸戶部應請
旨勅下戶部將該縣丁糧應否照該省節次改攤成案
並此外尚有丁糧未經合辦之各州縣一體詳查
妥議具奏等因奉

旨依議欽此其時同官咸以事涉更張應聽晉省自行
辦理爲言余力持不可卽主疏稿其略云臣等伏
查山西省一百一州縣向係丁徭地糧分款征收

嗣緣無業貧民艱於輸納節經歷任撫臣先後將太原等八十一州縣丁徭銀兩或全行歸入地糧或酌歸一半攤征俱經臣部議覆准行有案惟孟縣興縣陽曲右玉遼州陽高絳州岢嵐州應州永和寧武神池偏關五寨稷山絳縣嵐縣平魯壽陽靈邱計二十州縣尚有額征丁徭銀兩未經議改今孟縣民人疊有控案此次秦美章冒昧叩

聞經刑部查訊實因苦累情急事關民瘼似應循照歷次將丁銀歸入地糧之成案准予攤征况該省由分改合之州縣數已過半均未見有翻控之事而孟縣民人則以丁糧分辨苦累情形疊控不已是

前此該縣詳稱民久相安毋庸更張之語竟難憑
信况編丁已久每歲總照原額催征其一丁頂完
一二十丁及逃亡故絕之戶勢難完納亦係實情
卽如嘉慶二十四年十一月內撫臣成格具奏尙
嵐保德二州丁銀缺額攤賠滋累請在通省養廉
內照數攤捐蒙

仁宗睿皇帝恩旨國家惠愛黎元旣知小民瘠苦豈尙計
及錙銖征收缺額之賦所有尙嵐州缺額銀一千五
百八兩零保德州缺額銀七百十七兩零著卽加恩
按年豁免以示朕勤恤民瘼至意欽此

天恩浩蕩洞悉民艱是丁徭無著之銀必致有虧正額而

歸併地糧之賦總可按畝攤征在

國課不減絲毫於小民實多便益且嘉慶十七年蒲
縣丁歸地糧之案卽係該省巡撫奏改臣部核議

照覆奏蒙

俞旨遵行今孟縣事同一例未便獨令向隅相應請

旨飭交山西巡撫秉公查案據實議奏毋任該州縣迴
護朦詳仍滋訟蔓至刑部原奏又稱此外尚有丁
糧未經合辦之各州縣通盤籌畫一體詳查妥議
等語查興縣陽曲等十九州縣額征丁徭該省從
未議及是否舊章可循毋庸更改抑係情事相同
應歸畫一之處并令該撫體訪輿情據實具奏請

旨裁定總期均課便民等語奏上得

旨山西省州縣向來丁徭地糧分款征收嗣因貧民輸納維艱節經奏准將丁徭銀兩歸入地糧攤征已有八十一州縣惟孟縣等二十州縣未經議改疊經縣民以苦累呈控現經戶部查明該省編丁已久若照原額催征其一丁頂完一二十丁及逃亡故絕之戶勢難完納請仍照成案將孟縣丁銀歸入地糧攤征著交成格秉公查辦勿聽州縣迴護朦詳罔卹民瘼其興縣等十九州縣情形是否相同並著該撫體訪輿情次第酌擬具奏欽此冬十一月補授山東道監

察御史

壬午仁菴年六十七歲春正月奏清訟安民摺奉

上諭御史魏成憲奏請明定現審章程一摺戶部現審處管理旗民田土案件其無地檔契據者原不准率行查辦至提訊人證尤不應關傳四出擾累無辜但例內並無明禁誠恐書吏納賄舞文司員因循遷就致乖清訟安民之意嗣後呈控旗地到部分別老圈契置查檔驗契確有憑據方准究辦毋得僅憑呈控之詞遽准審理其應提人證除近在大宛五城地方者仍照舊票傳外若關提京外人證概行具稿呈堂用印行文如有票仰司坊關提者將承辦司員參處著戶部纂入則例永遠遵行欽此夏四月聞四弟閏

三月之喪客中哭之哀自是而歸計決矣五月題
掌山東道考試旗童得

旨著保福魏成憲監試都察院奏派接查北新倉奉

硃筆圈出魏成憲卽日任事六月奏請疏通部屬摺奉

硃批軍機大臣會同吏部議奏欽此秋七月順天府奏

派查勘貢院奉

硃筆圈出佟濟魏成憲勘畢遞摺奉

旨知道了欽此九月署工科掌印給事中冬十二月奏
請鄉會試復性理論摺奉

硃批大學士會同禮部議奏欽此

癸未仁菴年六十八歲春三月乞假南歸以上已後

一日首涂月杪抵里意有所觸口占成詠有南歸
詩草一卷男焜棟聘婦邵氏

甲申仁菴年六十九歲主講吳門正誼書院姪謙升
從學冬十一月遷杭祖祠落成與諸兄弟姪姪孫
等謹按昭穆以次安位行家祭禮一一如儀敬奉
先大夫先太恭人神位時泣然淚下念孤兒之暮
齒感先澤之畱詒一息苟存兢兢業業願吾家佳
子弟共諒此心而已是月六弟婦王病歿此吾家
賢婦爲之作傳從謙升請也

乙酉仁菴年七十歲主講正誼書院春三月回慈溪
敬展先世祖墓是秋姪繩武舉於鄉冬十月臥疴

幾殆閱兩月始瘳歸孫氏第三女猝逝病餘不勝

悲痛

丙戌仁菴年七十一歲主講正誼書院姪謙升從學

姪孫受田歲試補博士弟子員

丁亥仁菴年七十二歲主講金陵鍾山書院春秋佳

日與張古餘觀察敦仁方茶山廉訪體瞿秩山觀

察會輯孫尹圃刺史源潮諸君迭主游山觴詠間

作

戊子仁菴年七十三歲主講里中紫陽書院夏五月

冢婦孫氏病歿姪謙泰謙升男謙晉以官卷同應

鄉試姪謙升文為楊鷺洲明府時雍力薦主司已

列中卷旋以額隘見遺是年與六弟爲洞霄大滌
西溪之游謙升爲余校栞清愛堂集冬十月訖工
已丑仁菴年七十四歲主講紫陽書院夏四月長壻
張泰泉病歿男焜棟歲試補博士弟子員

庚寅仁菴年七十五歲主講紫陽書院春正月長女
瑞葆猝逝五十年父女一旦先我而去摧腸湧淚
幾不自持吾衰益甚矣秋九月第四女歸壻許學
濂

辛卯仁菴年七十六歲主講紫陽書院夏四月男謙
晉續娶婦吳氏

嗚呼痛哉 先大夫以道光十一年七月二十九日申時卒於里第距生乾隆丙子九月二十六日丑時享壽七十有六 不孝等 罪孽山積猝遭閔凶不可爲人不可爲子泣念 先大夫以孝友爲政於家以勤慎受知於

國平時服官行事

不孝等

生晚未及備知苦由荒

迷不能筆述謹將自記年譜與滋伯從兄重加檢校敬授梓人冀以乞銘誄於

當代且備

國史之采至 先大夫經濟文章嘉言懿行譜中所未載者不敢妄自增益懼失立言本意士論

具在昭然不朽無俟 不孝等 之覩縷萬一也

不孝孤子魏 謙晉 泣血謹識

賜進士出身

誥授中憲大夫例晉通議大夫廣西桂平梧鬱兼管通

省鹽法道署按察使司按察使提督四川全省學

政掌河南道監察御史 國史館提調甲寅江西

副考官辛酉四川正考官己酉順天鄉試同考官

乙卯會試同考官翰林院編修年愚表兄錢枳頓

首拜填諱

魏 謙 晉 泣 血 謹 識

凌次仲先生年譜序

琮旣序校禮堂詩集其弟子其錦復爲之作年譜蓋追按事迹分年編之其例視行狀加詳其體則始自唐宋閒昔先生輯元遺山年譜與翁洗馬本閒有異同蓋年遠而考核難也若其錦遊於先生之門者垂十年固見而知之者也雖然有難焉者夫數典而忘子孫且然況他人乎師弟之道今不古若弟之從師所問者名所慕者科有爲聖賢授受之說且反驚爲迂怪其心性本不相屬雖當執經侍坐已不知師之年幾何者况他事乎弟子過矣夫亦由師道之不立也先生七年而就傳十

三而學賈十五能詩詞二十能古文二十七遊京師始
習時文三十三舉於鄉三十四登進士第其於天文律
呂各有著述而獨致全力於禮以爲生人踐履之實蓋
以人之異於禽獸者在禮儒之異於佛老者在禮本深
造自得之學而因之以教人故禮經釋例一書歷二十
二寒暑而卒業當時諸公貴人一見傾心交游半天下
而相處最久無若儀徵阮尚書五十三而卒無子尙書
旣以禮經釋例刊行於世其收輯遺文則皆出於其錦
之手在先生早知其錦爲有心人故與言兼及生平而
其錦爲先生入室弟子故序事能賅本末從先生者五

十有五人其錦則先生爲寧國府學官之弟子也姓張氏歲貢生

道光六年歲在丙戌季夏月海鹽朱錦琮序

沙作先生全譜

--	--	--	--	--	--	--	--	--	--

次仲凌君別傳

儀徵阮宮保元撰

凌君諱廷堪字次仲安徽歙縣人遠祖安唐顯慶中任歙州州判遂家於歙父文煇業賈於海州君生海州六歲而孤困苦窮巷中母王氏鬻簪珥就塾師麤記姓名而已去學賈不成年二十餘始復讀書嚮學能屬文懼時過難成也著辨志賦以見志乾隆四十六年遊揚州慕其鄉江慎修戴東原兩先生之學四十八年至京師始多交游大興翁覃溪先生見君所撰述大嗟異始導之爲四書文應順天鄉試不第明年復遊揚州見元以學問相益君乃擬李白大鵬見希有鳥賦以見意五十

一年復入都應試不第明年從翁先生於江西又明年
客河南秋三應順天鄉試始中副榜南歸五十四年應
江南鄉試中式明年成進士出朱文正王文端二公之
門蓋與洪君亮吉等皆以宏博見拔者也殿試三甲例
授知縣君投牒吏部自改教授曰必如此吾乃可養母
治經文端曰吾不强子改冷官子願之甚善文正題其
校禮圖曰君才富江戴又曰遠利就冷官蓋甚重之旣
選寧國府學教授乃奉母暨兄嫂之官孝弟安貧謹身
節用畢力著述君之學博覽強記識力精卓貫通羣經
而尤深於禮經不較寒暑二十餘年著禮經釋例十三

卷君謂禮儀委曲繁重不得其經緯塗徑雖上哲亦苦其難苟得之中材可勉赴焉經緯塗徑之謂何例而已矣不會通其例一以貫之祇厭其膠葛重複而已耳烏覩所謂經緯塗徑者哉於是區爲八類曰通例上下二卷曰飲食之例上中下三卷曰賓客之例一卷曰射例一卷曰變例一卷曰祭例上下二卷曰器服之例上下二卷雜例一卷共爲卷十三至於第十一篇自漢以來說者雖多由不明尊尊之旨故罕得經意乃爲封建尊尊服制考一篇附於變例之後不別立宮室之例者宋李氏如圭等已詳故也君又著魏書音義燕樂考原崇

實新書元遺山年譜校禮堂集君雄於文九慰七戒兩
晉辨亡論十六國名臣序贊諸篇上擬騷選鄉射五物
考九拜解九祭解釋牲詩楚茨考旅酬下爲上解諸篇
皆說經之文發古人所未發其尤卓然可傳者則有復
禮三篇唐宋以來儒者所未有也嘉慶十一年君以母
喪去官兄嫂相繼歿哀且病十三年元復任浙江巡撫
君免喪來游杭州出所著各書相示元命子常生從君
學明年歸歛病卒年五十有三

國朝漢學師承記

甘泉江上舍藩揆

凌廷堪字次仲一字仲子歙人也父文焜字燦然自歙遷於海州之板浦場遂家焉君十二歲卽棄書學賈偶在友人家見詞綜唐詩別裁集攜歸就燈下讀遂能詩及長短句浙人張賓鶴見其詩詞大奇之告之板浦場大使湯某某敬禮之邀君至楊州是時饒使置詞曲館檢校詞曲中之字句違礙者從事讎校得修脯以自給君之精於南北曲而能分別宮調者基於此也久客邗江爲華氏贅壻與黃明經文暘交明經勉君爲舉子業始學作八服文讀五經是時年已二十五矣後游京師

受業於翁覃谿學士乃究心經史之學乾隆戊申順天副榜貢生己酉中式本省舉人庚戌成進士銓授寧國府教授迎生母王至學署先意承志得親歡心母偶不憚必長跪以請俟母笑乃起母沒哀毀骨立肯一目而妻亦相繼殂謝子然一身居恒不樂至徽州依程君麗仲麗仲以師禮事之阮侍郎芸臺服闋復爲浙江巡撫延之課子得未疾終於歛君病時麗仲贈以紫團手煎湯藥其死也經紀其喪擬之古人其范巨卿之流歟君無子應繼兄子嘉錦嘉錦先君卒嘉錦兄嘉錫在海州聞訃以次子名德後嘉錦爲君之承重孫君讀書破萬

卷肆經遠於士禮披文摘句尋例析辭聞者冰釋至於
聲音訓詁九章八綫皆造其極而抉其奧於史則無史
不習大事本末名臣行業談論時若瓶瀉水纖悉不誤
地理沿革官制變置元史姓氏有詰之者從容應答如
數家珍焉近時講學者喜講六書孜孜於一字一音苟
問以三代制度五禮大端則茫然矣至於潛心讀史之
人更不能多得也先進之中惟錢竹汀邵二澐兩先生
友朋中則李君孝臣汪君容甫及君三人而已其於詩
也不分唐宋門戶專論聲韻之協對偶之工詩餘亦不
主一家而嚴於律今人之詞有一字不合者必指摘之

雅善屬文尤工駢體得漢魏之醇粹有六朝之流美在胡穉威孔奭軒之上而世人不知也弟子中最著者儀徵阮君常生字壽昌一字小芸從君受士禮校刊禮經釋例十三卷小芸好學深思不才地矜物恂恂君子也宣城張君其錦字裴伯廩膳生精研章句不墮師承聞君沒徒步至歙訪君遺書無所得又北走海州於敗麓中攜拾殘稿假居僧寺輯錄以歸得燕樂考原六卷元遺山年譜二卷充渠新書二卷校禮堂文集三十六卷詩集十四卷梅邊吹笛譜二卷將謀劄劄可謂不負師門矣嗟乎君冷宦無家白頭乏嗣雖死故鄉實同旅

殞亦生人之極哀也已然而懷方之禮付於戚生昌黎
之文編煩李漢斯又不幸中之幸也君久客揚州如劉
君端臨汪君容甫諸君子以及宋君守端秦君敦夫焦
君理堂阮君伯元楊君貞吉黃君春谷皆君之友也援
寓公之例記於郡人之末云

國史文獻通考卷之九十四

--	--	--	--	--	--

校禮堂集紀略

儀徵阮雲臺侍郎

元

定香亭筆談云歛凌次仲與子以

學訂交二十年次仲於學無所不窺九經三史過目成誦尤精三禮辨晰古今得失識解超妙爲文沈博絕麗會榜受知于朱石君師官寧國教授奉母修潔白之養石君師用昌黎薦士詩韻題其校禮圖圖寄至浙予亦用韓韻題之次仲復用此韻見荅比于韓門籍湜焉

儀徵阮梅叔上舍

亨

瀛舟筆談云凌次仲學博家兄畏

友也讀書過目不忘尤精于三禮之學有校禮圖朱石君相國用昌黎薦士詩韻題其上學博及家兄皆有和

作學博有禮經釋例一書自詫爲生平辛苦有得之學
先以序目寄家兄今錄其序于後次仲子音樂亦自謂
獨得秘奧錢漑亭尚未通解其一書專論此事今并錄
以俟解者

揚州李艾塘詩人斗畫舫錄云凌廷堪字仲子又字次
仲歙縣監生僑居海州之板浦場以修改詞曲來揚州
繼入京師遊于豫章雒陽中戊申科副榜己酉科舉人
庚戌科進士官安徽寧國府教授始不爲時文之學既
與黃文暘交文暘最精於制藝仲子乃盡閱有明之文
得其指歸洞徹其底蘊每語人曰人之刺刺言時文法

者終于此道未深時文如詞曲無一定資格也善屬文
工于選體通諸經于三禮尤深好天文律算之學與江
都焦循竝稱焦循字里堂稱以歙縣凌仲子吳縣李銳
尚之歙縣汪萊孝嬰爲論天三友

凌次仲先生事略狀

先生姓凌氏諱廷堪字仲子又字次仲先世自唐顯慶間有爲歙州判者始家於歙世居歙之雙溪祖諱易筠國學生祖妣許氏父諱文煇國學生以治生僑居海州之板浦場因元配戴氏無出復娶王氏生子二長廷堯次卽先生生有異稟觀書十行俱下幼孤貧賴兄營家計太夫人教之讀稍長工詩古文及宋元人詞曲年二十三遊揚州金棕亭博士

北燕

目爲奇人慇懃入都翁

覃溪閣學

方綱

見其著述大異之勸習制藝令受業于

其門時乾隆癸卯先生年二十有七矣遂以國子生應

京兆試覃溪先生適爲主考官不報歸省客揚州時儀徵阮芸臺大中丞元尚困童子試中相見遂訂交焉華翁光祖以女妻先生蓋相攸得之也旋復遊京天津牛次元部曹坤與先生相友善卽寓之學齋日相切劘再應丙午京兆試又不報愈發憤攻苦遂中戊申京兆副車己酉本省鄉舉庚戌聯捷成進士癸丑補殿試歸班選用先生以太夫人將躋八旬改就教職尋選寧國府教授於乾隆六十年赴任嘉慶元年逢國慶典得賜贈祖父母勅贈父母而生母王太夫人勅封太孺人云先生之學無所不窺其於六書厯算以迄古

今疆域之沿革職官之異同史傳之參錯外屬之源流靡不井然條貫卽累朝名人文章詩歌銘贊類皆隨舉琅琅成誦蓋當代未數數覲也自就官陵陽尤專功於禮學其教人必以禮謂古聖使人復性者學也所學卽禮也孔子言勇而無禮則亂直而無禮則絞又曰好直不好學其蔽也絞好勇不好學其蔽也亂孟子曰上無禮下無學故知所學者卽禮也顏淵問仁孔子告之者惟禮焉爾顏子歎道之高堅前後追博文約禮然後如有所立卽立於禮之立也子思言天命之謂性率性之謂道修道之謂教所教者因人所當行而品節之卽禮

也盡乎禮斯可以復性故所謂格物者物卽禮也所謂
慎獨者亦卽禮也禮有節文度數非空言理者可託也
此皆發前人未發之覆也先生謂儀禮一經悉體天命
民彝之極信非大聖人不能作以江氏慎修儀禮釋例
僅有釋服一類復取向所自著禮經釋名一書改名釋
例區爲八類曰通例飲食之例賓客之例射例變例祭
例器服之例雜例以明同中之異異中之同矻矻十餘
年橐凡數易而後成焉禮經而外復潛心於樂謂今世
俗樂與古雅樂中隔唐人燕樂一關蔡季通鄭世子輩
俱未之知因著燕樂考原一書據隋書音樂志言燕樂

出于龜茲蘇祇婆之琵琶然當日鄭譯猶演爲八十四
調而附會於十二管惟遼史樂志直云燕樂不用黍律
以琵琶弣叶之蓋以琵琶四弣第一絃最大爲宮聲二
絃爲商三弣爲角四弣最細爲羽而無徵聲故燕樂亦
止四均一均七調故止二十八調而二十八調實止十
四調以七羽合于七宮以七角合于七商也燕樂以夾
鐘爲律本而琵琶第一弣宮聲又燕樂之律本也以今
樂準之如上字配宮聲尺字配商聲工字配角聲凡字
配變徵六字配徵聲五字配羽聲乙字配變宮合字配
下徵四字配下羽則今之用字譜而成調卽古樂之用

五聲二變而成音先生自謂孤學獨鳴無師無友爲宋
以來講樂家所未悟者也近世通人多精於書數之學
若言禮樂而得其精者先生一人而已先生名播海宇
識與不識靡不重其學行自座主德定國尚書王文端
公朱文正公外如錢辛楣官詹王懷祖給事程魚門編
修謝蘊山中丞孫淵如觀察汪容甫明經諸公不可悉
數而得覃溪先生爲師芸臺先生爲友尤知己之最者
余自乾隆丁未入都卽耳先生名後獲覲面隨各南旋
嘉慶二年丁巳余在省垣投効值石君夫子再撫皖先
生自寧郡來謁得其數晨夕者半月六年余補授宣城

學幸與先生共事一方時相過從聆益良多逾年長子
揚輝出都來署卽命受業其門先生嘗語余曰我於時
文半路出家余笑謂半路出家今竟作開山祖師矣蓋
先生中副車不曰如之何一節題文自後仿效其體者
輒多獲捷故也先生論古文則以騷選爲正軌詩則不
分唐宋但論正變以元遺山爲宋後一大宗又 國朝
排擊宋儒者毛西河爲最戴東原次之而先生則謂二
君之論宋儒猶未能搜其根而擣其穴云乙丑歲王太
夫人年九十卒先生奉柩回歛時寧郡魯子山太守 銓
爲先生同年來歲敦請主講敬亭書院獨來蕭齋鬱悶

無聊與余往來無少間卽除日猶相對至舉燭方散外人頗謂先生盛氣不可犯以非禮余聚首六載見其肫肫事慈闈以孝待朋友以直接後進以誠真能以禮律身者夫豈阿其所好哉丁卯春當道又延爲徽郡紫陽書院山長初先生回歛程也園吏部

振甲

以別墅館之

命其次子洪溥字麗仲從學戊辰歲芸臺先生延至杭州節署誨其少君故先生著作多載受業儀徵阮常生婺源戴揚輝同邑程洪溥等全校云嘉慶十四年四月先生自杭州回歛倏於六月初一日晚膳席間偶一傾跌扶起遂不能語四更後痰湧而卒距生于乾隆二十

二年丁丑八月二十日享年五十有三先是術者謂先生運行在甲不吉然乙丑春先生之兄卒於學署夏又丁太夫人憂而淑配華孺人於九月隨逝卽一僕亦死僅存側室張氏可謂劇矣乃迄今五年天復奪之算豈不悼哉昔漢鄭康成夢孔子謂曰起起今年歲在辰明年歲在巳旣寤知命當終其年六月果卒先生一生服膺後鄭今歿亦以巳巳六月豈真所謂歲在龍蛇賢人災者耶先生歿于歛之旅寓襄喪事者程易田先生畢君子廉程君麗仲暨郡學博夏君朗齋璽以先生無子胞兄有子二人長嘉錫字晉昭次嘉錦早卒因卽以嘉

錦爲先生嗣又卽以嘉錫之次子名德繼嘉錦爲先生
承重孫其弟子宣城張廩生其錦字娶伯從先生遊最
久績學砥行克守師說聞訃卽徒步往歛余亦命次子
揚廷訃弔是時晉昭已率名德自海州來奔喪今年夏
葬先生於歛之梅山晉昭比來余署聞其欲還居海州
因泫然告之曰立後者所以爲祭掃計也矧君家自父
以上墳墓皆在歛今海州離此幾二千里每歲掃荆榛
而供麥飯寧不疎且曠乎余又寓書于歛之親友使勸
止之而晉昭泣曰是固然矣但貧無立錫難以驟遷惟
每歲展墓亦如先君先叔在時可乎乃攜名德與先生

側室張氏并藏書數千卷去之海州裴伯懼先生著作
散佚將往海州校輯余極嘉之遂于初冬啓行檢理遺
稿以歸編成校禮堂文集三十六卷詩集十四卷梅邊
吹笛譜二卷充渠新書二卷元遺山年譜二卷燕樂考
原六卷劄記若干卷其禮經釋例十三卷芸臺先生業
已刊播燕樂考原裴伯現在付梓予將抄其文集合揚
輝校刊焉嗚呼今距先生之歿已年餘矣余羈於冷墮
揚輝亦以一官匏繫山右故歿不能撫其喪窆未及臨
其穴眷念宿草奚啻腹痛余固不足表揚先生但有難
已于懷者爰略撫其始末以備他日史官之採擇云爾

卷之九 年譜 附錄

昔嘉慶十有五年庚午季冬門愚弟婺源戴大昌謹狀

次仲先生校禮圖



聖道燦著六經從同以禮
實之乃悉貫通舍禮說理
流弊無窮七百餘年異學
相蒙襲漢或雜沿宋則空
我師於道樞得環中昔侍
禮堂坐歲春風今展遺象
筆類化工

受業張其錦敬摹寫并題
宣城後學詹允翺敬書



凌次仲先生年譜卷一

受業宣城張其錦編輯

先生姓凌氏諱廷堪字次仲一字仲子江南徽州府歙縣九都七畝人凌氏出自周官凌人之後先生嘗自謂受氏之由當據通志以官爲氏而字則當據廣韻從水作凌以廣韻於水旁凌字下注明引吳將凌統爲證也凌氏之見史傳者始於吳志偏將軍父子而歙之凌則始於安生於餘杭唐顯慶二年任歙州判卒於官遂家於歙之雙溪爲遷歙始祖再傳而有東支西支之分其後裔散處或富春或休寧或宣城或

饒州或歛南總以雙溪爲大宗傳三十三世子任字
肩吾明萬曆壬午科舉人歷任上海縣教諭江西龍
泉縣知縣山東濟南府通判直隸順德府通判廣西
平樂府永安州知州著有白雪樓藁四卷政拙編二
卷永安州志六卷族譜十卷子任生坤元字寧一邑
庠生著有長松室穩香舍二稿先生之高祖也會祖
濟生字方平祖易筠字松友國學生昔先生嘗語其
錦曰先大父少任俠讀書好奇計騎射馬稍皆絕倫
恒往來江淮間遂寧張文端公總制南河甚重之數
爲陳河工利弊文端欲延之幕下辭不就但過從談

說而已後遊塞上客寧遠大將軍岳威信公所嘗以
禦準噶爾策千岳公岳公猶豫未卽用遂辭歸終老
於家不復出父諱文煇字燦然國學生自高祖以下
皆隱德不仕燦然公以謀食至海州之板浦依外祖
許君世貞遂家焉厥配戴孺人無子復娶王孺人生
子二長廷堯字致堂一字華峰爲人孝友和睦有古
人風次卽先生也

又先生從叔曾祖諱潤生以布衣從族叔河南巡按
諱駟有殉難歸德事謹案 御批通鑑輯覽於順治
二年三月特書我 大清兵定河南進取歸德巡按

御史凌駟及其從子潤生死之華亭王氏明史藁福
王傳載之甚詳甲申春三月京師失守五月福王監
國於南京辛丑兵部主事凌駟起兵東昌討賊九月
丙申以王之綱充總兵官掛盪寇將軍印鎮守河南
凌駟聯絡河南北直順治二年春正月乙酉朔福王
居南京癸巳命河南巡撫越其杰巡按凌駟防守虎
牢三月丁未我大清兵取歸德巡按御史凌駟及
其從子潤生死之此卽顧亭林氏哭楊主事詩所謂
我慕凌御史倉卒當絕吭也汪堯峰氏江天一傳亦
日方勝國之末新安士大夫死忠者有汪公偉凌公

駟與金僉事公三人而顧詩注文皆舉駟不及潤生者蓋卑統於尊也其錦於嘉慶己巳秋往歛之雙溪見凌氏宗祠之外別有六忠祠所奉祀者宋待制公唐佐明太常公子儉尚書公義渠侍郎公駟御史公潤生刑部公世韶并有六君子傳詳其忠節始末而他以科目文辭著者不得入焉其族風尚大抵以忠孝爲本子孫之風尚如此而祖宗之遺澤從可知矣先生生我朝文治極盛之際其學之博大精純世盡知之求聖人之道而實之以禮尤千餘年未發之覆昔揚州江鄭堂先生序先生文集曰君學貫天人

博綜邱索繼 本朝大儒顧胡之後集惠戴之成豈
阿好哉

乾隆二十二年丁丑八月二十日巳時先生生於海州
之板浦場寓宅

先生二十生日作歌七首序云日躔壽星月離菁觴
吾降值焉

二十三年戊寅先生二歲

二十四年己卯先生三歲

二十五年庚辰先生四歲

二十六年辛巳先生五歲

太公燦然先生示以堂匾聯對之類先生卽應聲對曰某某試以鄰居戚友所常往來之家者亦然蓋見人讀而從旁默識之故也見者皆驚其有宿慧云

二十七年壬午先生六歲冬丁燦然公艱燦然公生於康熙丙戌七

月十五日未時卒於是年十二月二十八日午時

二十八年癸未先生七歲始就塾讀書

儀徵阮雲臺宮保撰次仲凌君別傳云君生海州六歲而孤困苦窮巷中母王氏鬻簪珥就塾師是年次姪嘉錦生大姪嘉錫長先生一歲

二十九年甲申先生八歲

三十年乙酉先生九歲

三十一年丙戌先生十歲

三十二年丁亥先生十一歲

三十三年戊子先生十二歲

海州程時齋太學枚庚午冬與其錦書有云乾隆戊

子余年二十聞鄭氏書塾中有同鄉凌氏子年十二

慧甚日讀百行

三十四年己丑先生十三歲學賈

先生昔嘗曰某六齡而孤貧無立錐賴兄致堂營生
養母次年始就塾師讀書十三歲卽以家貧棄書學

賈六經未之全讀也阮公撰別傳云就塾師麤記姓名而已去學賈江鄭堂先生 國朝漢學師承記云

君年十三卽棄書學賈皆紀實也夏丁嫡母戴太孺

人憂

戴太孺人生於康熙己丑正月初七日子時卒於
是年四月二十五日未時葬濟生公墓側

三十五年庚寅先生十四歲

三十六年辛卯先生十五歲能詩及詞

國朝漢學師承記云偶在友人家見詞綜唐詩別裁集攜歸就燈下讀之卽能詩及長短句先生乙巳年學古詩有云十五學吟詩

三十七年壬辰先生十六歲

錢塘張堯峰先生 賓鶴 至海州板浦寓楊鍊星 鍊含

滄書屋見先生詩詞大奇之示以詩法丁酉寄懷張

雲汀先生詩云憶君在海上授我為聲詩謂我下筆

古有若屈宋辭

三十八年癸巳先生十七歲

三十九年甲午先生十八歲

先生詩集始於是年存靜女吟以下四首

四十年乙未先生十九歲

吳郁洲先生 恒宣 修雲臺山志聘先生襄其事吳公

嘗作雙仙記義貞記傳奇先生謂詞曲雖小道亦音

律中之一端於是兼留心於南北曲之學是年詩存和酌亭彈琴見憶以下七首

四十一年丙申先生二十歲能曲及古文

先生一斛珠傳奇序云余友程君時齋取曹鄴梅妃傳譜作傳奇取少陵事附之名曰一斛珠歲在丙申始屬草焉時余在海上時時過相商定未二年各以事他去又長安春望圖序自注丙申二月故於是年以能曲及古文著之詩存牛墩河以下十四首

四十二年丁酉先生二十一歲

先生招海客辭序云僕本歙人生於海上二十有一

年矣思歸不可得乃擬楚人作招海客辭以自慰李
問原秋郊小獵圖序秋日西莊小集序亦作於是年
詩存題羣仙渡海圖以下六首

四十三年戊戌先生二十二歲

先生論古文以騷選爲正宗於是作祀古辭人九歌
遊胸山尋秦東門遺址作秦東門銘賣癡獸文亦在
是年所日與往還者程時齋序堂琴仙春生松秋蘊
光李問原章酌亭吳牖雲松屏黃小松沈德秀方方
山李鉏景張秋崖德圖松泉許石園香溪書谷羅守
溪詹香崑周蘭坡諸君詩存送許香谷歸里以下十

五首

四十四年己亥先生二十三歲始志於學出遊客儀徵

二月初一日始出遊以中表許崧陽明府

執中時爲

儀徵稅課司大使聘也先生辨志賦序云某春秋二十有三托跡溟海抱影窮巷爲賈則苦貧爲工則乏巧心煩意亂靡所適從用是慨然有向學之志焉乃爲辨志賦以自廣求聖道於六經雲臺先生撰王太孺人壽詩序云太孺人曰汝爲賈而恥與人爭利恐難成宜從事於學然學非蘄爲博士弟子之謂也必通經立行爲古之儒焉且獨學無友則孤陋而寡聞

吾有汝兄侍養汝其遊四方就師友以成之於是次
仲乃挾書出遊是年作擬連珠詰叢桂辭吳志伊十
國春秋跋擬西楚霸王廟碑詩存別家以下五十四
首

四十五年庚子先生二十四歲客儀徵

冬十月自儀徵回板浦同兄廷堯姪嘉錫扶燦然公

柩歸歛十二月與祖父松友公柩祖母許太孺人柩

合葬於梅山汪家地

祖父生於康熙庚戌九月初一日未時卒於乾隆四年己未十

月二十五日子時祖母生於康熙己酉九月十一日卯時卒於乾隆六年辛酉六月初十日申時是

年作魏文帝賦詩臺賦鄔覺庵詩序書唐詩殘卷後

十六國名臣序贊詩存送方竹樓之潤州以下二十八首阻風青山以下皆歸歛途中作

四十六年辛丑先生二十五歲春自歛由杭回板浦客揚州撰元遺山先生年譜初稿

正月十六日自歛由杭州回板浦二月初一日應離使伊公之聘客揚州先生手鈔諸經跋云乾隆庚子冬兩淮巡鹽御史長白伊公齡阿奉 旨刪改古今

雜劇傳奇之違碍者次年屬余襄其事客揚州者歲餘吳人孝廉李勉伯先生 編 贈余詩有莫將掾似筆

顧曲誤垂名之句於是感其言取諸經就枕上觀覽

同人或阻之乃自課以手鈔代讀案曩日館中同事

者總校甘泉黃秋平文賜江寧李理齋經分校先生

及海州程時齋枚丹陽荆玉樵汝為委員淮北分司

漢陽張瑤村輔板浦場大使長洲湯亮齋惟鏡經歷

查公建佩他如揚州朱二亭篋羅兩峰聘李艾塘斗

張登封宗泰仇載南傲張筱軒海觀朱崔巢煊柳東

犁夢薦周光羽鴻葉英多永福林鐵簫李汪損之錫

維閔蓮峰華儀徵方竹樓元鹿趙雪篷參汪繡谷文

錦陶鏡堂鑑石野堂楫李小梁灑高郵金畹芳蘭泰

州宮霜橋國苞黃竹亭廷垣通州陳小山模如臯管

蓋曰廣文濤 丹徒唐西美五 法辛侶嘉燕 丹陽荆葯

田青 溧陽史朗亭應曜 武進岳澹園肇基 陽湖褚容

船邦慶 金匱王春明灑 華杏村光祖 筱塘熙 宜興萬

華亭應馨 吳縣惠雅南承緒 長洲宋椒園使君道南

江寧李桐宇廣文紘 翁桐軒廷儀 山陽金午橋孝廉

培 朱實齋棟 程緱山崔年 潘桃溪源 淪川渭 胡肇先

裕未 沐陽吳南昀中翰白華 桐城劉學海濤 歙縣吳

暮橋魯 汪劍潭學正端光 謝未堂侍郎溶生 葉詠亭

天賜 洪麟書瑞 方鑑亭世陞 汪鯤颺瑛 汪古香桂 休

寧金翼庵別駕忠沂 黟縣汪石蘭廣文燾 涇縣朱立

堂森桂全椒金棕亭博士兆燕退谷璉篠村臺駿盱

貽江灝西使君沈天長林廋泉道源奉天鄔覺庵佛

保郎鈕月兆夢長白年汝鄰王臣天津張桂崑賜寧

錢塘孫熙堂咸程對山升元黃小松主簿易詹倫表

惟英錢袖海東嘉興王蔗鄉馨張恭初惟敬陳東暘

天遜石門陳桐嶼治蒞江夢桂烏程沈少約國棟周

方旭夢旦沈文若錦春歸安嚴雪舟文舜山陰童二

樹鉦會稽王裕民光祖王梅墅忠孳王敬輿嘉年沈

參軍錦林漢陽張秋堂主簿永清大定劉白沙使君

文清奉新徐九長孝廉日吉及尺五樓林歲成鄒文

奎簷石琴楊集古吳葳蕈張竹軒汪贊庵史倬齋解
荻洲孫詩廷江虞川陳樟亭周允中諸君皆已亥至
壬寅四年中竹西同遊者是時阮宮保纔應童子試
與先生稱莫逆交故撰王太孺人壽詩序云乾隆辛
丑與元訂交於揚州問學相長各期束身修行少有
所表見於世以無忝所生是年作擬王琳討陳檄文
金衍慶宮功臣贊族會祖蒼舒先生手札跋書宋史
史浩傳後黃氏通史發凡後復章酌亭書詩存深渡
以下十四首深渡至過杭州自歛往杭塗中作過平
望以下由杭回海州塗中作

四十七年壬寅先生二十六歲春夏客揚州季秋始入
京都

初金棕亭先生與先生相見於揚州小玲瓏山館目
為曠代奇才是年秋圖直指 明阿 撤去詞館因憇

入都湯亮齋明府適值轉餉先生遂受其聘偕行九
月二十八日到京同縣程戢園編修 晉芳 極器重之

大興翁覃溪洗馬 方編 見所作詩古文辭及他撰述

歎曰此不朽之業也戢園先生擬薦之汪編修 如藻

校修一統志而覃溪先生因其門生桐城章君 維垣

新派四庫館總校又薦之為其校書戢園先生亦勸

就焉是年作謝金棕亭博士惠鱗魚蒸餅啟謝翁覃溪師贈戴氏遺書啟詩存錢塘廉吏行以下四十首四十八年癸卯先生二十七歲客京都始習時藝夏援例入成均秋初應京兆試不第冬回板浦省親

春二月十八日覃溪先生令受業習時藝覃溪先生於鄉會兩榜外無門生蓋特奇異之也夏四月三十日援例入成均秋初應順天鄉試不第是科主試者卽覃溪先生也而先生下第真有命存焉先生學勤齋時文自序云癸卯客京師洗馬大興翁覃溪先生見某所作詩古文及他撰述大嗟異問笑不應試某

以幼未嘗學時文且不知理法爲對先生蹶然曰子蓋爲村夫子之言所誤矣夫古今文一而已豈有二理二法哉乃取案上文數篇示某曰此時文也寧有異於子所云乎乃勗之學於是遂受業於先生之門援例入成均應試是年主京兆試者卽先生也而某以支不合格下第○二月二十一日後館於滿洲慶敬齋主事格家受業者繼誠吉昌毓秀自壬寅入都以後名公鉅卿通儒雅士時在都中者如餘姚邵二雲編修晉涵典化任子田禮部大椿高郵王石臞工部念孫歷城周書倉編修永年錢塘吳穀人編修錫

麟 滿洲吉竹坪祭酒 善 閩縣葉毅庵學士 觀國 湖口

周駕堂編修 厚 輶 丹徒鮑雅堂中書 之 鐘 欽州馮魚

山編修 敏昌 祁陽陳瑤次比部 山 琨 泰州錢秋浦孝

廉 蓉 興化李蕙圃孝廉 晉 坊 無錫顧容莊孝廉 鉅 顧

鯉門孝廉 訓學 鳳陽孫飲香孝廉 是 蘭 解州宋芝山

上舍 葆淳 長洲胡眉峰上舍 童 廣德吳景季拔萃 嘉

植 富陽羅艾堂上舍 俊 丹徒張平伯秀才 秉鈞 桐城

張浣亭上舍 裕 驥 滿洲吉穀少 福 及綏之履之又趙

貢夫 九鼎 任田農 大 楷 吳涇陽 授 鳧 孫淵如 星 衍 張

度銅 頃 時亦在都國子監司業鄒公 炳 泰 崇志堂學

錄常公循暨同鄉刑部陝西司主事余公德澤程魚

門編修晉芳洪素人比部朴洪桐生中翰梧朱滄湄

中翰文瀚鄭融峰御史曦江漪堂中翰澹程蘭翹編

修昌期吳桐初晉程彝齋敦程觀瀾光勳洪石農範

胡樹思梧實諸君悉愛重納交而先生亦遂因之互

相資益焉居京數月名噪一時都中莫不知有先生

矣後官吾郡其錦從讀四庫提要并簡明目錄等

書因請問紀曉嵐先生時在都否先生曰在都惜曩

日未嘗請見也後先生嘗自厯舉多見海內學者亦

以未見紀文達公為憾云九月二十二日出都回板

浦省親是年詩存題吳上舍讀易圖以下七首

四十九年甲辰先生二十八歲春客揚州娶華孺人秋
回板浦冬再入京都

揚州汪容甫先生

中

其論學最惡宋儒漢唐以後所

服膺者崑山顧寧人氏德清胡朏明氏宣城梅定九
氏太原閻百詩氏元和惠定宇氏休寧戴東原氏以
爲 國朝六大儒於時流恒多否而少可及與先生
相見辨論古今深爲折服手書一十六人姓名示之

嘉定詹事府少詹事錢曉徵

大昕

江寧府學教授錢

學淵

塘

陝西侯補直隸州州判錢獻之

珩

廩生金其

章日追 附生李生甫 廣芸 長洲布衣江良庭 聲 江國

屏 藩 江浦副貢生韓紹真 廷秀 陽湖進士莊保琛 述

祖 歛舉人程易田 瑞田 修撰金輔之 榜 寶應舉人劉

端臨 台拱 高郵進士李孝臣 悖 餘姚編修邵與桐 晉

涵 曲阜檢討孔搗約 廣森 仁和翰林院侍讀學士盧

召弓 文昭 曰此皆海內通人也與吾夙相交契者今

得君合十有七矣遂介交江國屏上舍并示孔檢討

所撰林編修誅及元武宗論二篇春三月華君 光祖

以長女妻先生秋先生以華孺人歸板浦嫂氏汪孺

人卒先生謂伯兄曰嫂氏在世艱苦備嘗身後事不

可草草

嫂氏生於雍正乙卯九月初七日亥時卒於是年四月十四日未時葬海州板浦鎮西

冬張堯峰先生往山東巡撫明公署先生與之偕行入都是年專志禮經作七戒再晤阮公於揚州作後大鵬遇希有烏賦及周易述補序蜀岡餞別詩序上洗馬翁覃溪師書詩存甲辰二月至揚州金棕亭先生招飲以下五首

五十年乙巳先生二十九歲客京都

寓天津牛次原先生學齋次原名坤戶部師竹先生子也識先生於貧困待之如同胞兄弟在其學齋習時藝每月四課文成必呈覃溪先生改正是年考取

一等入監肄業本堂老師常公循山陽人戊子舉人
司業運時帆先生本名運昌奉 旨改名法式善二
月初七日 皇上臨雍講學隨班接 駕聽講恭紀
二十韻進呈二十一日領 賞綠紬一疋三月十五
日領 欽賜銀一兩是年作學齋二箴詩存恭紀以
下二十三首

五十一年丙午先生三十歲客京都再應京兆試不第
冬回板浦省親

乙巳丙午客京都同在學齋習時藝者次原先生及
同縣胡樹思 梧實 皆於丙午科中式而先生獨下第

厚溪先生日子之文可中而不中蓋天之所以厚子

也子必勉之兩年間曲阜孔廟軒先生廣森偃師武

虛谷先生億時亦在都相與訂交講學論文氣味最

洽自甲辰以來知交日衆在揚州時又有鍾啟崖懷

何春林孫錦江定甫安秦敦夫思復汪晉蕃光燧焦

里堂循李濱石鍾泗史望之致儼歸安陳君文煜在

都有檀公萃王解元有年牛揮雲劉古三鄭秋浦李

載園呂星垣方藕堂陸以寧龔石春趙渭川張鄂樓

方道坤黃左軍章實齋朱少白周采巖葛菱溪唐柘

田談階平林嘯雲喬莘農葉曲臺褚希之趙石泉江

六瑤羅斯翁翁玉階翁宜泉胡敬仲戴祖啟俞 金門

漆 瑄 諸君詩酒往來極一時友朋之樂詩存送李載

園明府之官保定以下六首

五十二年丁未先生三十一歲春客揚州夏客南昌秋

往河南是年撰禮經釋例初稿

覃溪先生督學江西以書招佐衡文遂於三月初自

板浦起身時南康謝蘊山先生 啟昆 為揚州太守覃

溪先生房首也一見遂定交焉五月同舟至南昌客

學使署佐閱南昌府屬生童卷舉移寓謝公所時鉛

山熊蔚亭太守 枚 臨川李進士 宗澍 東鄉吳秀才 嵩

綦

武進蔣修隅

知廉

修竹

知節

桐城胡洛君

虔

諸君

咸在南昌八月初由漢口往河南客畢秋帆中丞節
署是年作九慰答牛次原孝廉書與阮伯元孝廉書
孔檢討誄詩存小孤山以下三首

凌次仲先生年譜卷一

卷一

共

凌次仲先生年譜卷二

受業宣城張其錦編輯

五十三年戊申先生三十二歲春客河南秋入京都三
應京兆試中副車冬回板浦省親

畢秋帆先生每歲十二月十九日置酒高會爲東坡
作生日丁未冬以病不果於戊申正月補爲之時在
座者先生及吳竹嶼舍人張吾山廣文唐拓田進士
方子雲布衣洪雅存博士徐朗齋孝廉朱秋巖明經
沈春林上舍王石華藕夫二茂才也漢軍李香林
如
蘭長洲朱念莪上舍淳時亦在河南是年預行正科

鄉試秋由河南入京都三應順天鄉試中式副榜第

十名正主考禮部尚書德保字定圃姓索綽羅氏滿

洲正白旗人丙辰舉人丁巳進士副主考禮部右侍

郎鄒奕孝字念橋江蘇金匱人癸酉舉人丁丑探花

工部右侍郎管幹珍字松厓江蘇陽湖人丙子副榜

已卯舉人丙戌進士第四房同考官內閣中書張虎

拜字錫山號嘯厓直隸天津人已丑進士同房中式

者第六名潘本郊字序伯江十九名汪滋畹字薰庭

寧二十五名王宗誠字中孚江三十七名宮秉鑑字

唐江南五十九名姚杰字邁人浙七十六名段達和

秦州人江會稽人

字蓉泉江蘇武進人一百十七名趙蕙芬字樹百浙江秀水人一百二十

七名朱鳴鳳字桐雨浙江海鹽人一百五十名蔣光祖字竹史江南常

熟人一百六十六名呂彩字江華江南儀徵人一百八十一名諸

葛謔字願之浙江蘭溪人一百九十一名吳芬字香林江蘇宜興人二百

六名詹應甲字巽甫江蘇副榜第十名先生副榜第十

九名蔡世懔字爾攄湖北監利人頭場四書首題子曰不曰如

之何一章次題小德川流二句三題堯舜之知三句

詩題賦得六藝道德本得行字先生首藝主陸賈新

語慎微篇以春秋時事點綴成篇文最博麗會西井

明府謂為時文家別開門徑是也後先生歸歛主紫

二

陽講席索觀者衆遂重爲付梓自記曰此文爲房師張嘯厓先生所薦座主德定圃先生甚賞之已登前列尋有言其踴弛者久之始改副車庚戌歸安張蘭

渚同年

師誠

以吏部郎左遷中書循例請會試在哲

昆鄂樓

彤

書齋見余此文而愛焉謂爲前此所未有

未幾入場遇君命召不俟駕行矣題竟效爲之榜發遂以第七名獲雋而余亦於是科成進士去余中副車時僅一年許也乃戲作二詩柬之文章毀譽信悠悠嗜好從來豈易投同是人間不龜手一泚泚統一封侯流俗紛紛愛抑揚大慙大好亦何妨寄聲鄉曲

拘虛子拭眼重看古戰場又京官六品以上例不準
鄉會試而蘭渚官吏部者數年因降調復舉禮闈入
翰林亦爲前此所未有也并記於此以備他日掌故
云冬回板浦省親應板浦場李使君汝璜之聘與海
寧張集堂光湜吳興沈吉甫謙日逐唱酬是年作登
鄴城賦大梁與牛次原書倉頡廟碑詩存杏花以下
三十首

五十四年己酉先生三十三歲舉本省鄉試

春里居不戒於火太夫人陷於室內先生冒火入背
太夫人出母子毫髮無損見之者悉歎曰非孝感不

如此三月自胸浦往湖北復客儀徵秋應 萬壽恩

科江南鄉試中式第一百四十四名舉人正主考內閣學

士胡高望字希呂浙江仁和人癸酉舉人辛巳榜眼

副主考吏部考功司主事賀賢志字虛齋直隸遷安

人庚子舉人第十三房同考試官潁州府蒙城縣知

縣劉士煌字鍊齋廣東饒平人己亥舉人同房中式

者第五名施廷柱 字贊清江蘇通州人 第五十四名張煥 字敬軒江蘇

蘇江陰人 第六十名吳眉 字登如安徽桐城人 第九十一名劉時 字易

借江蘇山陽人 第一百四十四名先生副榜第四名樊卓 字崇

明人 副榜第十五名汪桐 字太倉入江 頭場四書首題務

民之義二句次題書同文三題夫義路也至小人所
視詩題賦得重與細論文得和字試前見安徽學使
秦端厓先生潮秦公謂戊申分校北闈見先生文與
莊公通敏其相激賞深以南人不閱南卷爲惜是年
兄孫兆淵生詩存牛揮雲太守宣石假山以下五首
五十五年庚戌先生三十四歲成進士

春二月初二日自板浦起身由陸路進京寓次原先
生學齋應 萬壽恩科會試中式第四名大總裁東
閣大學士王杰字偉人癸酉拔貢己卯副榜庚辰舉
人辛巳狀元副總裁工部右侍郎鄒奕孝字里科吏
第見前

部右侍郎朱珪字石君順天大興人丁卯舉人戊辰

進士第十房同考試官國子監助教沈維坤字莪溪

浙江德清人已亥舉人甲辰進士同榜中式者第一

名朱文翰字屏茲號蒼二名陳登泰字三名

辛從益字謙受號筠谷四名先生字立凡

順天宛六名李賡芸字生甫號蘇齋七名張師誠字

友號蘭渚浙八名方體字道坤號茶山九名陳之綱

字惇三號旭峯十名許作屏字號畫山十一名

黃洙字依宣號澹人十二名趙睿榮字守能號蒞

十三名德文字蔚之號粹圃十四名石韞玉字執如

江蘇吳縣人 十五名齊嘉縉 字衣聞號雲橋 十六名劉敬

熙 字號 江西南康人 十七名霍來宗 字瑞堂號輯 五十

八名邢澍 字雨民號自軒 十九名韓廷秀 字紹真號

江浦人 二十名戴敦元 字士旋號金溪 二十一名黃鉞

字左君號壹齋 二十二名錢福胙 字錫嘉號訥堂 二

十三名陳希祖 字敦一號玉薌 二十四名趙未彤 字

滋號序堂山 東萊陽人 二十五名葉繼雯 字桐峰號雲素 二十

六名洪亮吉 字君直號穉存 二十七名盧元偉 字特

西津江西 二十八名王治模 字範之號梓堂 二十九

南康人 名王謨 字恒甫號晴庵 三十名龐士冠 字正南號鹿

順天涿州人 五

人 三十一名白守廉字河南河內人 三十二名陳鴻賓

字漸遠號雲門 三十三名錢學彬字采南號質夫 三

十四名羅廷彥字孟淳號湘洲 三十五名桂馥字冬

未谷山東 三十六名張桓字子善號八愚 三十七名

曲阜人 張時霖字子肅號石樓 三十八名鄭大謨字孝顯號

候官 三十九名胡先聲字駿夫號希齋 四十名王定

柱字直隸正定人 四十一名保麟字子良號九真 四

十二名葉大觀字巨賓號蓮山 四十三名端木煜字

坦號敬齋江 四十四名邵葆醇字睦民號松疇 四十

蘇江寧人 五名陳崔鳴字殿頌號若仙 四十六名恩普榜名訥

江西寧州人

裕特氏字夢符號雨
堂滿洲鑲藍旗人
四十七名朱煌
字昆墀號蔚堂
安徽當塗人

四十八名史書笏
字欽三號恒巖
直隸新樂人
四十九名楊日鯤

字啟甫號蒼石
江西分宜人
五十名徐憲文
字郁亭號石渠
山東滕縣人
五十

一名楊邦直
字安徽懷遠人
號古愚
五十二名蔣祥墀
字盈階號

丹林湖北
天門人
五十三名張若采
字子白號谷漪
江蘇婁縣人
五十四

名周系英
字湖南湘潭人
號
五十五名王蘭芬
字蘅洲號
星硯江蘇

山陽
人
五十六名陳慶槐
字應三號蔭山
浙江定海人
五十七名王

蘇
字延庚號脩嶠
江蘇江陰人
五十八名阮升基
字亨舉號助林
福建羅源人

五十九名王寰
字江蘇金匱人
號
六十名安清翹
字翼聖號寬夫

山西絳州
垣曲人
六十一名高賜禧
字得蒼號心蘭
河南祥符人
六十二

名王應垣

字山東諸城人

六十三名魯銓

字選堂號子山江蘇丹徒

人六十四名張世彥

字美濟號詠厓直隸樂城人

六十五名劉珏

字輝堂號

六十六名王宗誠

字中孚號蓮府安徽青陽人

十七名牟昌裕

字啟昆號松巖山東棲霞人

六十八名孫希元

字仲

和號澹如山西興縣人

六十九名熊方受

字介茲號定峰廣西永康州人

七十

名喬遠煥

字子萬號賁山湖北孝感人

七十一名顏惇恪

字詒兼號心齋

廣東南海人

七十二名賈鈞

字河南濬縣人

七十三名吳大

勲

字銘石號集齋貴州畢節人

七十四名李錫書

字洪九號璧齋山西靜樂人

七十五名黃齊煥

字采臣號昭園湖南湘鄉人

七十六名顧王霖

字穉圭號容堂江蘇鎮洋人

七十七名王訪

字采軒號惺亭山東蘭山人

七十

八名鄭彤 字澗江號蜀門 七十九名朱偃 字右佐號際唐四川

典文 八十名魏紹濂 字湖纓號順天大通州人 八十一名郭淳

字元滙號曉泉 八十二名田瑛 字英玉號懷雨 八十

江蘇吳縣人 三名盛安 鍾姓字無逸號遷 八十四名吳雲 字潤之號玉松

江蘇長 八十五名李鑿宣 字介周號丹厓 八十六名

洪梧 字桐生號東湖 八十七名李湘 字楚航號衡帆

安徽歙縣人 八十八名史積中 字道存號虛谷 八十九名延弼 字

一號西園滿 九十一名秦維嶽 字觀東號曉峰 九十

洲正藍旗人 二名封大受 字仲可號棣堂 九十三名祝曾 字紹宗號蘭坡

河南固 九十四名李榮 字仁甫號蔚圃 九十五名紀

始人 山西曲沃人 七

蘭

字楚佩號香谷直隸晉州人

九十六名匡苞

字于桑號夢坡山東膠州人

九

十七名魏鈞

字秉衡號萊峰順天通州人

九十八名顧玉書

字謹堂號

繼庵河南長葛人

九十九名張問陶

字樂祖號般山四川遂寧人

一百名

宋簡

字在心號西樵江蘇元和人

一百一名阮文燾

字涵虛號蓋亭貴州畢節

九十二名蕭廷發

字興選號一齋廣東嘉應州人

同房者六人先

生及趙未彤邵葆醇張若采劉珏顧王霖頭場四書

文首題皆自明也次題君命召不俟駕行矣三題使

數人要於路曰請必無歸而造於朝詩題賦得老當

益壯得方字是科新例進士覆試先生有四月十八

日正大光明殿覆試恭紀詩以頭場首藝磨勘停

殿試五月二十一日自京由水路回板浦七月二十
二日到家海州分司何公某旋聘焉是年作章酌亭
墓誌銘詩存次韻覃溪師獻縣途中見懷以下二十
四首

五十六年辛亥先生三十五歲

春正月己酉房師劉明府戊申座主管漕臺暨清河
謝蘊山觀察各遣使延聘因於二月十一日自板浦
起身由陸路過龍苴渡沭河厯宿遷暨銅山之楊莊
宿州之符離至蒙城謁劉鍊齋先生三月初七日自
蒙城由水路發過河厯懷遠五河泗州至淮安謁管

松崖先生夏往清河客謝觀察暑冬回板浦是年作
蒙城縣莊子廟碑手鈔諸經跋改擬連珠等篇詩存
過龍苴鎮以下十五首

五十七年壬子先生三十六歲

春夏客清江謝觀察署秋八月謁己酉座主胡豫堂
先生於江寧試院二十七日謁庚戌座主朱文正公
於安慶撫署九月二十日從大江由蕪湖至溧陽時
溧陽令為閩縣張燮軒先生 經邦 招飲座中閱順天

鄉試題名錄知鮑雙五 桂星 何春林 孫錦 王晚馨 紹

蘭 管南英 粵秀 畢蘊山 耀會 英煦齋 和 諸公獲雋賦

詩志喜旋歷宜興丹陽鎮江揚州於十一月二十九日回板浦是年作與焦里堂論路寢書詩存題謝蘊山觀察種梅圖以下三十九首

五十八年癸丑先生三十七歲春入京都補殿試夏客熟河冬回板浦省親

春二月二十五日自板浦起身至清江晤謝觀察餽贐甚厚送至王家營三月二十三日到京四月十五日赴禮部驗到二十一日清晨入東長安門詣貞

度門太和門右門領卷恭詣保和殿殿試二十五日

臚唱得三甲第二十六名二十六日恩榮宴二

卷之二

十八日 午門謝 恩領表裏一副 金醬色大緞一疋 玉色絹一疋

五月初二日應 保和殿 御試題擬後策賢良制

一道積古疏一道發微不可見充周不可窮之謂神

論一篇賦得松風水月得閒字五言八韻詩一首初

四日至翰林院演禮初六日辰刻 宮門引 見歸

班銓選初九日具呈吏部改教職以養母十五日從

座主王文端公自 圓明園起身十九日至熱河十

月初三日自京回板浦是年在都與江鄭堂 潘 及玉

文端公季子更叔 培 講求象緯之學作縣象賦熱河

謝座主韓城公貽鮮荔枝啟與胡敬仲書書篋銘小

歎視銘一斛珠傳奇序等篇弔李將軍文蓋自歎不
與館選也詩存曉發小店集以下五十一首清河橋
道中以下往熱河作荏平以下出都作

五十九年甲寅先生三十八歲春夏家居秋冬客杭州
禮經釋例二稿

秋九月初二日偕姚庶甫同年自淮起身由揚州鎮
江到杭州客謝蘊山先生臬署十月部選得寧國府
教授缺時仁和盧抱經先生纂儀禮注疏詳校成將
以授梓先呈謝公而先生見之亦以夙所校本相質
正盧公一見遂深相契焉適有善貌者爲先生作小

照因請書校禮圖三字於卷端盧公自謂不善書轉請伊同年梁元穎先生爲之書并題作合之緣以贈之又鮑以文先生廷博歙西長塘人居浙之桐鄉烏鎮博極羣書家藏萬卷所刻知不足齋叢書風行海內往來武林時入臬署與先生晤談最密曾示以全謝山先生蒼水張公神道碑云將爲張公建祠且欲以此文刻諸張公墓前先生曰此文字句多未檢點當是草創未經修飾者若遽以勒石是形前人之短也似宜別求作者以忠烈事實另作墓碑或祠堂記而刻之庶幾此舉得尊君親上之體矣作與鮑文書

直指其文中之紕繆山陰趙煦堂

元杰

錢塘錢岑石

松

江西楊桐石明府

懋圻

及宋立厓汪石蘭謝砥山

李凌翰朱瑤圃郭頻仰鄭粲石王沛堂徐東崖沈盤
谷吳夔庵胡洛君詹笠東諸君常與往來湖上飲酒
賦詩是年作學勤齋時文自序詩存寄祝座主韓城
公七十壽詩以下二十四首

凌次仲先生年譜卷二

凌次仲先生年譜卷三

受業宣城張其錦編輯

六十年乙卯先生三十九歲春自杭州歸歛到安省領
憑赴寧國府學教授任

春正月在杭州臬署將回徽盧抱經先生撰校禮堂
初稿序以贈之竝乞作儀禮注疏詳校序海寧陳仲

魚先生鱣雪中過訪謝臬使及秦觀察瀛鞏明府懿

修皆厚贐焉二月初四日起身十二日到歛之雙溪
拜祠展墓曲盡誠敬與族戚往來外屢同程易田胡
受轂曹官保金殿撰方侍御諸鄉先生集會討論學

術閏二月初九日自歛由休寧往安省二十五日藩

憲驗看

姓朱名賡漢軍
係十府糧道署

三月初三日謁撫憲

姓周名
樽雲南

昆明人已卯舉
人本藩臺署

初四日赴院考驗四書題非擇而取

之詩題賦得異香開玉盒得開字五言八韻初五日

考列一等領憑卽日起行由水路往宣城十三日到

寧國府學教授任十七日遣柴十回板浦迎親母王

太孺人奉養四月二十日王太孺人同華孺人暨胞

兄到署七月奉委送考往江寧自甲寅以來尤留心

推步之學吾宣梅勿庵先生其後裔寓江寧明瓦廊

三元巷先生至卽訪之石居先生

鏐

文穆公第八子

也悉出徵君所製比例銅尺及銅規銅渾儀等器觀之又有程綿莊所製竹渾儀竝借讀江慎修先生翼梅八卷八月二十四日回署是年其錦肄業敬亭書院先生到任後卽以論語黃衣狐裘當從毛詩羔羊正義指韋弁服解問先生極賞之遂承家君命受業於門後問以四書中典禮其儀文度數何以不能了然於心先生曰須求之於儀禮先以張稷若儀禮鄭注句讀爲讀本再考之賈疏并示以楊氏儀禮圖謂讀儀禮非圖不明也又以日至求故閏月成歲璣衡齊政等解問先生曰推步之學汝宣城梅氏爲集大

成者卽以歷學疑問三卷疑問補二卷授之謂先讀此自可入門明年肄業學署中請問如何用功先生手書杞菊軒功課單示之今謹錄於此以爲好學者式

杞菊軒功課單

月課

每月初二日初八日十六日廿三日課四書文一篇
試帖詩一首

每月逢五讀生四書文一篇
熟文若多不讀亦可 試帖詩一首
臨小楷數百字

每月逢十讀生古文一篇

如長分作兩三課讀

文選及唐宋大

家皆可讀古詩律詩各一首漢魏六朝及唐宋人皆

可臨小楷數百字

日課

每日早起讀生經文一百字

凡未讀者皆陸續補讀讀必精熟務須手鈔如

不能百字即隨意溫熟文數篇須用心探索讀經不

可閒斷

早飯後溫熟經文二百字隨意或臨帖或鈔詩古文

或劄記典故

分門別類四書文及後場應用者尤要緊

或讀史數頁

午飯後隨意溫四書數頁有暇即參稽經史討論詩

文有疑卽須問難

燈下隨意溫熟文數篇或鈔舊讀詩文或查考日間所讀詩文中故事

五更醒後默記新知醞釀舊得此最要緊功效進益多在此時

此單驟閱之似乎平易然果能日日有恒不作輟數年之後必有成就昔王深寧宋之通儒其所立課程不過日誦文字一篇或量力念半篇或二三百字而已此外則將經史分門編纂其說載在詞學指南中皆古人之成效若貪多務廣不能爲繼於實際終無

益也

是年作擬璿璣玉衡賦鄉射賦儀禮注疏詳校序與
江豫來書戴東原先生事略狀謝山西方伯謝蘇潭
先生惠朝服啟詩存喜海寧陳仲魚雪中過訪以下
二十五首

嘉慶元年丙辰先生四十歲官寧國教授

正月初一日恭遇 覃恩加一級祖父易筠貽贈文
林郎寧國府學教授祖母許氏貽贈孺人父文煇勅
贈文林郎寧國府學教授嫡母戴氏勅贈孺人生母
王太夫人勅封太孺人是年元遺山先生年譜成作

序及中星閏月說羅睺計都說方直儀銘立三角儀
銘讀孟子書唐文粹後書程賓渠算法統宗後樹經
堂詠史詩跋詩存題王柘庭壯士十年歸圖以下九
首

二年丁巳先生四十一歲官寧國教授

座主朱文正公以安徽巡撫內遷兵部尚書夏四月
先生往安省謁見文正公用韓昌黎薦士詩韻題校
禮圖曰遠利就冷官曰君才富江慎修戴東原蓋誠
重其學行而將敷薦之故又曰君方束圭璋特達待
上告以後題者如玉儕嶠阮雲臺諸先生多依韻和

之時戴可亭相國以京察督學安徽按臨寧郡禮遇有加焉錦於是年取第一名入學會面諭之曰凌老師名師也須多從遊幾年方能獲益是年作寧國凌氏宗譜序懷遠宮氏族譜序謝座主朱石君師贈線縑啟汪容甫墓誌銘擬淮南節度使楊行密大破朱溫於清口露布詩存寧國學署梅花盛開以下二十四首

三年戊午先生四十二歲官寧國教授

青浦王蘭泉先生索刻辭稿錄一卷寄之是年兄孫兆淵來署作擊蒙書室雜銘與王蘭泉侍郎書答孫

符如同年書詩存題楊克堂醉漁園以下八首

四年己未先生四十三歲官寧國教授禮經釋例三稿

是科會試總裁吏部尙書朱

珪

左都御史劉

權之

戶

部侍郎阮

元

閣學文

寧

而文正公爲先生師雲臺先

生爲先生友閱題名錄喜牛次原諸先生登第因大

集生徒暢飲賦詩以樂之自注謂榜中如史望之鮑

雙五吳山尊王伯申張臯聞程春廬汪薌林馬器之

吳春麓白小山諸君或同年或同門或舊相知識皆

一時名下士也作禮經釋例序周官九拜九祭解成

擬賀日月合璧五星聯珠表與孫淵如觀察書詩存

題張季和池上草堂圖以下七首

五年庚申先生四十四歲官寧國教授

翁覃溪先生自都中由家季和徵君

炯

寄新刻所著

元遺山年譜一卷先生謂其錦曰吾向曾以所撰初

稿見覃溪師遂蒙教育得竊科第今師亦成此謹錄

數條載入吾書以見淵源所自間有異同之處不敢

徑改者恐失本來面目也竝錄副本寄都以相質正

○孫淵如先生力扶漢學闢西人推步爲不可信於

是作覆孫觀察書又越海祥風頌權經齋劄記序梅

邊吹笛譜序祭武虛谷文詩存題黃少眉笈雲圖以

下十七首

六年辛酉先生四十五歲官寧國教授

正月十三日初次俸滿於五月初三日自宣由水路

赴省初五日到蕪湖初六日道憲

宋公名鎔長洲人

驗看加

考語年強學裕訓迪端方堪以留任十二日到安省

十六日藩臺驗看

福慶字仲餘滿洲人

二十三日撫軍驗看

荆公

道乾山西臨晉人

皆加考語以勤職註冊留任時桐城姚姬

傳先生主敬敷書院講席為題校禮圖與先生論學

宗旨各別先生答之以詩有云是非原有遺編在同

異何嫌立論殊是年詩存黃直民同年以其先人牧

原先生蘭心圖索題以下三十三首

七年壬戌先生四十六歲官寧國教授

汪瑟菴相國時以侍講學士督學安徽按臨之日每與先生論文講學略去禮儀先生曾以其錦解論語黃衣狐裘指韋弁服上質公極躔之洪稚存先生自塞外歸主講旌德洋川書院迂道來訪留宿學齋暢談數日乃去是年冬先生語其錦日向嘗謂吾聖人之道不能外禮而求由今靜思之真覺確不可易矣十餘年功力一旦卓然自信樂不可言於是作復禮三篇禮後說慎獨格物說好惡說等篇以發明之竝

命於誦讀之際凡說之有以禮爲主者節錄大略使相印證其錦於是將經中語爲一卷子史及集中語爲一卷先生諸論說爲一卷總顏之以約禮編先生曰其庶幾求道之方乎吾宣學博戴斗垣先生

大目

與先生最相得見而歎之曰此論乍聞之若生面獨開而細按之實還其本來面目也特向者未經人指點耳今爲拈出儒家得指南車矣涇川趙肖巖先生

良壽

主敬亭講席往來甚密亦見而云然是年次姪

嘉錦卒作復姚姬傳先生書祭廣西巡撫謝蘇潭先生文詩存和杜竹吟刺史元旦卽事以下十首

八年癸亥先生四十七歲官寧國教授撰燕樂考原

權觀察蕪湖張鞠園先生雲祥丁未進士福建晉江人勤學好古

集古書數千卷延先生往觀之先生於九月十六日

自署起身十月初四日回署尊酒細論者半月有餘

觀察贈琴一張古書數種○舊歲先生以後學古詩

寄都覃溪先生因述古詩五章答之以代面談竝作

札令轉寄王述庵錢辛楣姚姬傳劉端臨諸先生蓋

皆各述所得以相賞析云又儲定齋先生嘉珩字太

士湖北過宣城見先生著述讀弔李將軍文與論古

諸作不覺傾倒後赴姑孰賦詩見志并寄札略云外

間紛紛言考證無當名實如閣下者固當世之所希也魏書音義成幸速寄我鳳凰芝草先睹爲快於是年悟唐宋燕樂之宮調以字譜爲主其原出於蘇祇婆之琵琶作燕樂考原六卷又統論以禮求聖道之意作書覆錢曉徵先生又與阮侍郎書孟子時事考徵序瑞桃頌詩存宛陵晤蔣希裴并追憶令兄竹史同年以下二十三首

九年甲子先生四十八歲官寧國教授禮經釋例四稿方茶山先生體以比部出守九江迂道來訪又許雲

樵司馬

鴻盤

寓學齋數日相與縱談輿地之學先生

謂其錦曰海內第一專家也其會通今古精審之處
直接煤礪作覆許雲樵司馬書及與阮侍郎論樂等
書燕樂考原序詩存吳之水騎尉新構書室以下二
十三首

十年乙丑先生四十九歲官寧國教授夏丁生母王太孺人憂

先生性至孝友生母王太孺人於是年春九十大慶
時阮官保巡撫浙江作古詩十章遣使致祝先生自
去冬以來右目內障因命其錦侍讀於太孺人側太
孺人曰名公鉅卿譽之若此恐不敢當後其錦以自

撰杞菊頌待讀太孺人曰汝文質庶無愧乎五月十七日巳時胞兄致堂卒距生於乾隆二年丁巳二月二十六日丑時享年六十九歲先生謂猶子嘉錫曰汝祖棄世吾與汝俱幼惟賴汝父營生養母身後事宜從厚令扶柩歸葬於梅山濟生公墓側以太孺人年過高匿勿使知乃於閏六月二十五日戌時無疾而卒距生於康熙五十五年丙申三月初七日午時享年九十歲先生卽於是日卸任遵制成服凡事悉竭誠敬如禮同寅及紳士生徒弔者數百人毀瘠憔悴遂眚一目哀慟迷罔中華孺人卒於九月二十

九日酉時距生於乾隆二十九年甲申十月初一日
 子時享年四十二歲先生於是子然一身痛無可告
 署內親丁祇一側室張孺人而已旋於十月初六日
 扶柩起程十一日到歛十二月初八日卯時葬王太
 孺人於問政山塘園華孺人祔之卯酉加甲庚向其
 時弔唁者沿山會西井明府佩蓮南昌許介田運使
音信當塗夏朗齋學博鑾泰州沈午橋進士成渭吳
 江陸澹安孝廉泰增涇縣朱柳堂教授寵含山黃春
 池刑部躍之同鄉程易疇廣文瑤田也園吏部振甲
 麗仲洪溥兌甫恩澤羅仲英永符汪繹如燁諸君及

十

宗黨姻戚

凌次仲先生年譜卷三

凌次仲先生年譜卷四

受業宣城張其錦編輯

十一年丙寅先生五十歲

寧郡魯子山太守前歲議修府志擬聘先生先生以目疾辭乃延洪稚存先生主之而以沿革屬焉繼丁內憂并延主敬亭講席春二月來宣於開館後偶至府署由角門送出次日又遣使立請卽作札辭之曰前此教授知府接見之儀有 國家典例在今則忝敬亭講席與閣下則賓主矣在某微賤不能以禮自處固無足惜若仍僕僕於閣下之門是并不能以禮

處閣下矣是以今日之招雖鄭堂稚存舊雨咸集竟不敢奉陪非惟自愛其鼎亦兩全之道也先生之以禮自處并以禮處人大都類此唐陶山先生 仲冕重修海州志書遣使採訪先生因舉其大者作書覆之又與程易疇先生書

十二年丁卯先生五十一歲

春回歛主講城南紫陽書院初熙園中丞薦也先生與中丞未嘗謀面因作書謝之由魯子山太守處轉達適被幕友改作駢體遞後始知乃覆上書以自明蓋不欲爲駢四儷六之浮辭以寓讀禮不言之古義

而已。先生欲以實學導其鄉人於開課之日卽擬規條榜於堂右其略曰某幼而孤貧流落東海傭食負米未嘗學問至於時藝尤爲疎淺年將三十始妄爲之皆鄉先生所深知者今忝桑梓講席實深恐懼伏思紫陽書院爲一郡英髦所集昔江慎修戴東原金輔之諸先生皆常誦習於此流傳至今不乏鴻通之彥其中兼有耆舊宿學名輩在某之前者幸得朝夕接教庶幾勉其所未至倘有議論紙繆評點失當之處伏祈面加訓誨不啻百朋之錫矣除每月初三日課期應請府憲出題考試閱定外其十八日課期

謹遵 功令竊擬規條於後

初課 此月十八日

四書文一篇

試帖詩一首

已進八韻
未進六韻

次課 次月十八日

試策一篇

經解一篇

或律賦一篇

如有不喜作全卷者任作一題皆可

又次課 又次月十八日

雜文一篇及古近體詩

如有不喜作文與古詩者即近體詩亦可

三課以後周而復始鄙見如此未審諸先生以為何

如某頓首謹白

二月十八日已進四書題緇衣羔裘三句未進四書
題旅酬詩題賦得象限儀得平字。三月十八日已
進題百世以俟聖人而不惑質諸鬼神而無疑未進
題牧皮者詩題賦得寸寸秋色得難字策問題我

高祖純皇帝 欽定禮記義疏內中庸大學二篇前

全載鄭氏註後全載朱子章句不加論斷原欲令學
者自擇究之二家之說孰長請各據其異同之處直
抒所見以仰副 聖朝崇尚經學之至意經解題堯
典以閏月定四時成歲解。評王度卷云大學云自

天子以至於庶人壹是皆以修身爲本中庸云齋明
盛服非禮不動所以修身也是禮字爲中庸大學眞
注脚策問中能見及此可謂豪傑之士亟拔之以爲
有志聖學者勸○評王國翰卷云論語皆孔門遺訓
其中無一理字易書詩春秋儀禮周禮唯詩有我疆
我理易大傳有理得及窮理順理等語然古人皆作
條理解至天理人欲四字始見於樂記亦漢儒采諸
文子去聖人則已遠矣童而習之之書不可草草看
過○評汪寶書卷云策問於詰訓不同處頗見考核
經解所云九百四十分乃四分術之日法至乾象術

已不用矣經生家不明置閏之故皆蔡氏多五日有奇爲氣盈少五日有奇爲朔虛之說害之不可復襲之也。評曹振鏞卷云變易經文標新立異極于王

柏遂爲聖門罪人矣指點體用

體用對舉本六祖語九經三史無此文也

論性談天極於白沙遂爲禪家別子矣有志者當知所擇焉。四月十八日已進題鄉也吾見於夫子而問知子曰舉直錯諸枉未進題其爲人也詩題賦得百石卒史碑得瑛字雜文題擬班孟堅典引一首古體詩題擬姜堯章昔遊詩五古不拘篇數全擬亦可近體詩題擬元裕之論詩絕句七絕不拘篇數全擬

亦可。○五月十八日已進題享禮有容色二句未進

題夏禮詩題賦得沒階趨進得前字。○六月十八日

已進題是惑也誠不以富亦祇以異。遵朱註未進題

是惑也誠不以富。遵朱註詩題賦得溫故知新得通

字策問題朱子論語集註所引諸儒之說其名字爵

里可得聞歟註中引經引子引說文釋文及引史以

證者明用何氏集解及暗用者兩義竝存未經折衷

及疑而未定者明以來講家時文家誤會註意而妄

說者能悉數之歟經解題鄭風褰裳解。○七月十八

日四書題如用之詩題賦得七月流火得流字近體

詩題新秋卽事七律四首。八月十八日四書題公
叔文子之臣大夫詩題賦得一方明月可中庭得方
字。九月十八日已進題人不知而不愠不亦君子
乎未進題傳不習乎詩題賦得業精於勤得精字題
紙後識云四書兩題漢宋之說不同皆 頌在學宮
之書作者請各從所好此次非課時文也策問題胡
拙明先生易圖明辨其說可得聞歟經解題仲尼燕
居郊社之義嘗禘之禮解。十月十八日已進題子
曰切切惓惓未進題泄泄詩題賦得沈沈隱隱得林
字雜文題書方樸山鄭註拾藩自敘後古體詩題讀

方樸山與全紹辰書五古不拘篇數近體詩題讀方
樸山答李雪崖雜辨七絕不拘篇數。自開課以後
始則大諱繼則信疑各半焉而先生教思之誠終不
稍懈嘗語及門胡進士培翬曰僕旣抗顏居此席當
思有益於後進豈忍曲學阿世取悅流俗以誤英雋
之士乎又與畢子廉錫書有云淳安方君樸山吾鄉
素奉之爲山斗者其文集中詆排宋儒不遺餘力蓋
樸山爲西河弟子故堅守師說如此乃其主講紫陽
從未一言道及其卑視吾鄉以爲不足與語者何如
然則弟之厚待吾鄉反遭駭怪何也樸山之薄吾鄉

至此而吾鄉尙有依草附木以借其淵源爲榮者一
何可笑又其所作盍簪錄序等文皆不入集而吾鄉
凡自云其門下士者集中亦未齒及姓名其以吾鄉
人士爲逆旅之藩溷可知樸山文集具在可覆按也
今之奉樸山爲山斗者其文集全未寓目而徒詫吾
言是亦不可以已乎然同志如足下幸有數人則吾
道爲不孤矣又曰此札凡吾鄉相好者祈與之閱天
資高者可以發其聰明次者亦可以破其沉滯不足
語者不必也語雖戇而心則誠幸轉致諸同學共諒
之是年程也園吏部命次子洪溥受業先生極嘉其

才之美而以學進之作銅鼓齋上梁文與羅仲英孝廉書吳宜人傳

十三年戊辰先生五十二歲春夏居歙禮經釋例五稿成秋客杭州冬歸歙

春夏在歙專理舊稿婺源戴爾勤明府揚輝於壬戌歲受業其識最超涇縣潘純夫河院錫恩於乙丑歲受業其年最幼先生俱極器之五月朔與其錦書有曰去秋潘生領鄉薦今春戴生捷禮闈余言驗矣是時雲臺先生再撫浙江遣使延聘因於八月初三日到杭州節署撫軍以洋匪朱濱蔡牽二幫合犯普陀

已往寧波督勦臨行時曾屬先生若到卽令赴寧波
初四日署中卽撥一材官僱船送往初八日抵寧波
寓撫軍行轅卽提督公署明萬厯間沈四明相國一
貫故第也撫軍與先生十餘年契濶渴欲相見雖軍
書旁午相與辨証古今娓娓不倦初十日撫軍親赴
鎮海督諸鎮進兵合勦蔡牽十五日撫軍回行轅行
轅中賓客會稽徐璧堂刺史聯奎錢塘陳石琴孝廉
光岳烏程張秋水明經鑑丹徒吳晴波勇士世臣十
六日先生同陳石琴張秋水登范氏天一閣閣在寧
波府城內明兵部左侍郎范欽建欽字堯卿號東明

嘉靖十五年進士卒年八十三閣制上下皆六楹范氏祖制凡登閣閱書必通知各房族長齊集各帶鑰匙或司總門或司閣上諸厨一同啟閉故閱者甚難十七日撫軍移行轅於海關舊署十八日同吳晴波至李忠毅公祠李提臺名長庚十九日起身回省二十日至餘姚夜渡曹娥江二十一日同張秋水遊南鎮廟二十二日渡浙江入撫署撫軍命其少君常生受業焉每日課經之外必以司馬氏通鑑授讀謂熟讀此書則千古以來成敗得失之故洞若觀火而他日侍帷幄備顧問述往事以匡時就陳編而悟主無有過於

此者作與阮中丞論克己書南城王實齋先生
聘珍
撰大戴禮記解詁先生爲之作跋又章酌亭遺稿序
冬回歛詩存三月晦日雪以下二十四首

十四年己巳先生五十三歲春客杭州夏歸歛卒

春二月到杭州節署與阮撫軍書有曰某向謂聖人
所謂學卽指禮而言苦無顯證後讀論語而得之子
曰恭而無禮則勞慎而無禮則蕙勇而無禮則亂直
而無禮則絞四者獨不云學而無禮之蔽又曰好仁
不好學其蔽也愚好知不好學其蔽也蕩好信不好
學其蔽也賊好直不好學其蔽也絞好勇不好學其

蔽也亂好剛不好學其蔽也狂六者亦不云好禮不好學之蔽又勇而無禮與好勇不好學同謂之亂直而無禮與好直不好學同謂之絞其義甚明何疑乎此人所共見之書惜予之而不能讀也由此觀之鄙說不戾於孔子可知矣又嚴厚民上舍杰贈宋張玉田詞源二卷取而讀之與愚昔所著燕樂考原若符節之不爽其書世無傳本心竊自喜此皆獨抒心得非勦說雷同者可比然則僕與閣下定交尙非貿然互相標榜尊已卑人之惡習也時撫軍介弟梅叔副車亨亦自揚來署又陳桂堂太守廷慶錢太史昌齡

朱兵部

爲弼

陳提臺

大用

及段懋堂鮑綠飲黃秋平

臧在東林嘯雲濟南小桐陳覲光何夢華韓錦仙張
旗山汪選樓諸君往來晤集舊雨新知頗有友朋之
樂撫軍以先生無子贈之一姬字韓芳夏四月中先
生攜歸歛寓問政書塾揚州朱謙山鐘以三十年前
之友來訪謂束書不觀方可生子先生甚感之而以
爲有命存焉於是朝披夕抹日事著述忽於六月初
一日晚餽席間偶一傾跌扶起遂不能語夜半後痰
漸湧而逝值初二日丑時也時親丁祇側室張孺人
與阮撫軍所贈而已襄喪事者惟程生洪溥一人夏

明齋先生時爲料理七月初七日胞姪嘉錫自海州
率次子名德來奔喪因次姪嘉錦先卒其議以嘉錦
爲先生嗣又卽以嘉錫之次子名德繼嘉錦爲先生
承重孫八月初七日治喪禮受親知之來弔者其錦
聞赴走歎燕文酬酒拜哭靈次明年三月十九日葬
先生於歙西梅山十畝園與父燦然公合墓是年夏
自杭回歙改作封建尊尊服制考草創未成其錦校
錄清本於嘉慶十九年往江西節署同原草二冊面
呈雲臺先生定正以便補刻禮經釋例中易簣之日
尚草南宋七閩表說詩存祇鳶戲和陳桂堂太守以

下五首

先生嘗自言一生得朋友之力最多茲故舉所知者
 按年敘之竊謂先生生長胸海而自已亥客儀壬寅
 入都庚戌成進士其知交實滿天下迨官吾郡凡過
 訪者竝勤勤懇懇以直諒待之考古證今靡不各厭
 其心以去郵筒往返幾無虛日遠隔千里情同一室
 於雲臺次原兩先生雖家常瑣事亦彼此互聞蓋尤
 聲相應而氣相求也他如王子卿澤邢佺山澗張子
 白若采孫符如起周耕厓廣業朱習之錫經尊一
 錫爵錫爵杜竹吟開元蔣竹史光祖希裴光庭蒲快亭朴

卷之三十三
 十一

朱約齋肅 左仲甫輔 吳石臣鼎 曹扶谷三選 錢晦之

大昭 汪孝嬰萊 李尚之鏡 蔣蔣山徵蔚 梅抱孫冲 張

愚溪肇瑛 陳鳳石寶泉 楊健齋龍揚 錢質夫學彬 汪

艾塘庚 張侍喬裕葉 葛二林鑿 馬釋齋有年 吳山尊

齋承吉 黃春谷承吉 程香谷家祥 沈虛舟自成 陳一亭心

傳 段廣文玉成 瞿萇生中浴 孫雨窗馮翼 朱琴川楷

陳實甫春華 汪仰之樹棠 程尹溪立達 施雪帆晉 戴

蓮塘綺 孫子畏起崙 李營甫傳鎮 吳之水攀龍 周石

落鶴立 英遊府瑞 楊克堂大壯 諾叅將音保 曹琴軒

夢鶴 章篋堂廷鈞 西來天育 魏憲鄰維綱 章問山玲

黃少眉 振達 周最峰 德隆 沈湘葵 沾霖 諸圃堂 自穀

孔雪樵 傳薪 吳聲揚 鍾 韓明府 子正 吳棣園 璉 王臨

川 祖怡 于寧之 慶餘 范平甫 準 吳玉松 雲 朱敬堂 棧

李春舟 學穎 鄭雲洲 兆珩 鄭新甫 柏 姚根重 持衡 王

賓麓 灼 葛蕙榜 美 吾于篁 祖望 郭晴川 一臨 汪崔崖

杰然 張眉軒 星燦 蔡蔭人 樹望 常合齋 太和 張廉船

舟 張雲溪 兆騫 洪孫符 幼懷 繆敬之 桷 張訪渠 厚載

杜靜圃 鳳梧 勞讓泉 崇勳 孫嘯壑 滙 葛仙源 坡 梅羽

儀 鴻 周萼泉 溥 孫少蘭 世昌 張小篔 大紱 方象三 夢

松 馬雨耕 春田 器之 宗蓮 趙琴士 紹祖 與朱少河嚴

卷之九 十一

道甫黃直民鄧芳圃王柘庭胡本亭吳楚帆張季虎
朱錫章吳復齋方穀存陳子犀黃澹人汪鑑亭孫平
叔吳蔚如宮茂琴雲峰方又輝如川立堂沈楓輝馮
右宜徐書林吳年帆湯漢助吳懷侯濮喬嵐吳季卿
鄭佐廷吳柏泉孫葯亭湯涵三程曉嵐魯美堂宋棻
泉汪應鏞陳廷桂李應勳汪叔辰張鳳翮諸君或同
年或同寅或舊識與新知皆其錦從學宛陵學舍十
餘年所目睹其簡書往來或見諸集中或親接其言
論丰采者類敘於此以誌先生知交之廣云
塾師有三一為許君澤咸歙縣人係先生表叔一為

吳君克明字懋昭海州庠生一爲吳君士楷山陽庠生

受業弟子五十五人戊辰在杭州則有儀徵阮常生字壽昌丁卯在徽州則有歙縣程淇溥字麗仲績溪胡培翬字載屏歙縣朱承儁字馴子羅承域字限之績溪周樹屏字立夫乙卯至乙丑在宛陵學舍則有婺源戴揚輝字爾勤涇縣潘錫恩字純夫震澤沈寶樹字稼維武進蔣之筠字德培歙縣吳承本字葆初廬江朱啟字廷南吳爾祚字永錫涇縣翟森字桃圃胡沛澤字樹雲朱啟字戟門胡承謙字蓮友胡承謨

字典卿馬景涵字岳青英國瑞字繼先吳濱字南涯

潘望寧字海門趙信字子執子翟佩蘭字湘浦旌德汪斐

然字成卿汪績字熙堂原名汪邕字權玉呂飛鵬字

程九方文炳字虎文宣城陳紀字綱甫魯有鈞字權

叔洪惟濱字西涯仲澍字雨之奚若蘭字華廷徐煊

字禮和呂元炬字渭陽高嵩字貢宸張大恕字仲良

凌炳桂字步蟾張承訓字聖傳楊尉字之文徐其洋

字耕野原名徐鼎梅字調之暨其錦與已亡胞弟其

銘字新甫族弟垣字輔之庚戌秋在駒浦則有海州

程立中字敬持喬紹僑字東里喬紹富字巖林癸卯

在京都則有滿洲繼誠吉昌毓秀已亥在儀徵則有
歙縣許承瑞許上瑞

憶壬戌癸亥間阮宮保嘗以書索刻所著述先生以
古人每悔成書太早辭之及卒時祇一禮經釋例清
本在杭節署其一切遺稿皆係程麗仲收藏擬將設
局編校其錦赴歙竝面約襄其事當以燕樂考原爲
著述之亞於禮經者爰乞稿本歸次年夏先生猶子
晉昭來宣乃謂遺書盡歸板浦且以編校相屬因思
遺書在徽有程君勝其任若海隅僻壤恐無珍重而
愛惜之者遂於十月間往海州搜輯其爲友人攜去

者則乞反之底草重複者則剔去之叢雜載歸編輯
爲校禮堂文集三十六卷詩集十四卷劄記六卷晉
泰始笛律匡謬一卷其手定者禮經釋例十三卷燕
樂考原六卷元遺山年譜二卷充渠新書二卷梅邊
吹笛譜二卷禮經釋例己巳春雲臺先生刻於杭州
節署燕樂考原辛未夏其錦刻於家塾曲肱亭時阮
宮保在史館編纂儒林寓書學使顧筠巖先生采訪
吾師遺書下問及錦當將已刻之燕樂考原呈寄王
申秋并齋未刻各種北行擬獻諸 史館適值雲臺
先生督漕來淮代爲籌畫命回宣刻文集三十六卷

乙亥歲學使白小山先生作詩集序謂當與文竝傳
庚辰學使胡書農先生亦問及此去冬海鹽朱尚齋
邑侯錦琮愛民恤士博學能文讀先生詩與詞而好
之今夏給以資斧命刻之以成校禮堂全集則知己
之感師若弟皆永戴之矣噫其錦夙奉先嚴命纂刻
浚氏遺書乃始之以力綿暫輟繼之以事故稽遲屈
指數之今已忽忽焉十有八年矣學不加進而名不
見稱恐卽百年亦終同秋草甲戌冬曾據見聞所及
并考諸詩文將先生出處遺事作爲年譜今取舊稿
略加修飾釐爲四卷刻列遺書後則吾師千秋大業

固自不朽而鄙陋如其錦者亦庶幾附青雲之末而
彰歟時道光六年歲次丙戌季秋朔日受業宣城張
其錦謹識

凌次先生年譜卷四

小門人宣城張家湜校字



大雲山房文彙初集目錄

陽湖惲敬著

卷一目錄

原命

喻性

說地

說山

三代因革論一

三代因革論二

三代因革論三

フニロト夏ニシテホキキ金

三代因革論四

三代因革論五

三代因革論六

三代因革論七

三代因革論八

西楚都彭城論

辯微論

續辯微論

釋夢

釋拜

釋弁一

釋弁二

釋弁三

釋鈞

駁史伯璿月星不受日光辯

駁朱錫鬯書楊太真傳後

雜記

雜說

張真人府印說

得姓述

卷二目錄

九江考

康誥考上

康誥考中

康誥考下

周公居東辯上

周公居東辯下

顧命辯上

顧命辯下

匏有苦葉說

雄雉說

桑中說

蝮螫說

有狐說

黍離說

雞鳴說

鷓鴣說

讀晏子一

讀晏子二

讀五帝本紀

卷之二十一 雜記

三

讀管蔡世家

讀魯仲連鄒陽列傳

讀張耳陳餘列傳

讀貨殖列傳

讀霍光傳

讀論衡

孟子荀卿列傳書後

古今人表書後

三國志書後

諸夏侯曹傳書後

鈴山堂集書後

金剛經書後一

金剛經書後二

楞伽經書後一

楞伽經書後二

天發神識碑跋

乙瑛碑跋

孔羨碑跋

卷三目錄

與紉之論文書

上秦小峴按察書

上曹儷笙侍郎書

上曹儷笙尚書書

上汪瑟菴侍郎書

上陳笠帆按察書

答吳白戶書

答蔣松如書

與湯編修書

明儒學案條辨序

五宗語錄刪存序

子居決事序

先塋記

石橋灣惲氏祠堂記

東湖書院記

新喻東門漕倉記

新喻羅坊漕倉記

胡氏學田記

重修萬公祠記

遊羅漢巖記

東路記

遊翠微峯記一

遊翠微峯記二

重修瑞金縣署記

東麓先生家傳

后谿先生家傳

少南先生家傳

香山先生家傳

衷白先生家傳

遜菴先生家傳

南田先生家傳

羅臺山外傳

謝南岡小傳

二僕傳

後二僕傳

紀言

書山東知縣事

書王麗可事

書獲劉之協事

先賢仲子廟立石文

新喻文昌宮碑銘

文昌宮碑陰錄

都昌元將軍廟碑銘

海會菴放生河碑銘

劉先生祠堂壁銘并叙

卷四目錄

前太子少保四川總督劉公祠版文

兵部侍郎銜署直隸總督裘公神道碑銘

前四川提督董公神道碑銘

廣西按察使朱公神道碑銘

太子少師體仁閣大學士戴公神道碑銘

張皋文墓志銘

舅氏清如先生墓志銘

前臨川縣知縣彭君墓志銘

兵部額外主事王君墓志銘

寧都州學正聞君墓志銘

袁州府訓導李君墓志銘

饒府君墓志銘

饒陶南墓志銘

彭澤縣教諭宋君墓志銘

寧都營參將博羅里公墓志銘

張府君墓志銘

刑部江西司主事曹君墓志銘

外舅高府君墓志銘

楊貫汀墓志銘

徐恭人墓志銘

甘宜人墓志銘

姜太孺人墓志銘

李夫人墓志銘

董孺人權厝志

亡妻陳孺人權厝志

女嬰壙銘

國子監生周君墓表

浙江分巡杭嘉湖道陝西候補道李公墓表

王盛石記

鸚武冢石記

祭張皋文文

右大雲山房文彙初集四卷目錄瑞金陳蓮青雲渠排次
讐校凡雜文一百六十篇嘉慶十有六年五月刻于京師
琉璃廠工冗雜不應尺度且未竟九月補刻并修治于常
州府小營前以彙本篇自爲葉不用漢唐寫書首尾相銜

法爲日若干而竣二十年三月武寧盧宣旬幼眉改定二十篇入外集復刻于南昌甲戌坊附通例于後憚敬子居自爲序錄曰憚氏著于南宋自方直府君十一傳而至明湖廣按察司副使東麓府君巍東麓府君三傳而至典儀正敬于府君紹曾敬于府君入

本朝四傳而至子渭府君士璜子渭府君生先府君輪子渭府君好讀書飲酒鼓大琴先府君無所嗜好于世事無所阿三十年教授窮山中敬生四年先府君教之四聲八
年學爲詩十一學爲文十五學六朝文學漢魏賦頌及宋
元小詞十七學漢唐宋元明諸大家文先府君始告以讀

書之序窮理之要攝心專氣之驗非是不足以爲文于是復反而治小學治經史百家凡先府君手錄天官地志物理人事諸書亦得次第觀之然未有所發也時于一二日中得一解而油油然數十日中得一解而油油然至索之心誦之口書之手仍芒芒乎搖搖乎而已先府君曰此心與氣之故也不可以急治當謹而俟之減嗜欲暢情志嗜欲減則不淆雜情志暢然後能立能立然後能久大自是之後敬不敢言文者十年旋走京師遊中原南極黔楚與天下篤雅恭敏之士交竊窺其言行著述因復理先府君之言欲有所論撰而下筆迂回細謹塊然不能自舉嗚呼

天地萬物皆日變者也而不變者在焉不變者所以成其
日變也文者生乎人之心天地萬物之日變氣爲之心之
日變神爲之神之變速于氣之變而迂回之弊循循然而
緩謹細之弊切切然而急于神皆有所闕焉敢不力充之
以求所以日變者哉然而有不可變者典論曰學無所遺
辭無所假史記曰擇其言尤雅者著于篇可以觀矣雲渠
所錄皆嘉慶建元以後論譔謹以年次其目錄庶得失進
退有以自考焉其改定入外集者目錄皆刪之所存如左

嘉慶元年在富陽四月往貴州十月至江山得文七首

與紉之論文書

東麓先生家傳

遜菴先生家傳

南田先生家傳

紀言

劉先生祠堂銘

王盛石記

二年八月至常州得文二首

亡妻陳孺人權厝志

女嬰壙銘

四年在常州九月至京師得文十一首

讀晏子一

讀晏子二

先塋記

石橋灣惲氏祠堂記

后谿先生家傳

少南先生家傳

香山先生家傳

衷白先生家傳

書山東知縣事

書王麗可事

兵部額外主事王君墓志銘

五年在京師六月至新喻得文九首

喻性

三代因革論一

三代因革論二

三代因革論三

三代因革論四

釋弁一

釋弁二

釋弁三

釋鈎

六年在新喻七月至南昌十二月還新喻得文十六首

說文

釋夢

九江考

康誥考上

康誥考中

康誥考下

周公居東辯上

周公居東辯下

桑中說

蝮螫說

有狐說

讀論衡

三國志書後

諸夏侯曹傳書後

上秦小峴按察書

答蔣松如書

七年在新喻得文十三首

駁史伯璿月星不受日光辯

一
二
三
四
五
六
七
八
九
十
十一
十二
十三
十四
十五
十六
十七
十八
十九
二十

張真人府印說

匏有苦葉說

雄雉說

黍離說

雞鳴說

鳴鴉說

東湖書院記

新喻東門漕倉記

新喻羅坊漕倉記

胡氏學田記

張皋文墓志銘

祭張皋文文

八年在新喻得文六首

鈐山堂集書後

與湯編修書

新喻文昌宮碑銘

新喻文昌宮碑陰錄

徐恭人墓志銘

董孺人權厝志

九年在新喻六月至南昌得文七首

金剛經書後一

金剛經書後二

二僕傳

甘宜人墓志銘

李夫人墓志銘

饒府君墓志銘

國子監生周君墓表

十年在南昌四月至瑞金得文四首

遊翠微峯記一

遊翠微峯記二

書獲劉之協事

姜太孺人墓志銘

十一年在瑞金四月至南昌十一月還瑞金得文十一首

雜記

顧命辯上

顧命辯下

楞伽經書後

楞伽經書後二

上曹儷笙侍郎書

答吳白广書

東路記

謝南岡小傳

後二僕傳

舅氏清如先生墓志銘

卜二年在瑞金得文六首

上曹麗笙尚書書

重修萬公祠記

遊羅漢岩記

海會菴放生河碑銘

前臨川縣知縣彭君墓志銘

寧都州學正聞君墓志銘

十三年在瑞金五月至南昌六月回瑞金十月復至南
昌得文十五首

原命

說地

駿朱錫鬯書楊太真傳後

讀五帝本紀

讀管蔡世家

讀魯仲連鄒陽列傳

讀張耳陳餘列傳

讀貨殖列傳

讀霍光傳

孟子荀卿列傳書後

古今人表書後

上江瑟菴侍郎書

上陳笠帆按察書

子居決事序

袁州府訓導李君墓志銘

十四年三月還瑞金七月至南昌得文九首

三代因革論五

三代因革論六

三代因革論七

三代因革論八

雜說

得姓述

重修瑞金縣署記

饒陶南墓志銘

彭澤縣教諭宋君墓志銘

十五年在南昌十一月至常州得文十首

天發神讖碑跋

乙瑛碑跋

孔羨碑跋

先賢仲子廟立石文

都昌元將軍廟碑銘

兵部侍郎銜署直隸總督裘公神道碑銘

寧都營參將博羅里公墓志銘

張府君墓志銘

刑部江西司主事曹君墓志銘

鸚武冢石記

十六年在常州二月至京師八月還常州得文十四首

西楚都彭城論

辯微論

續辯微論

釋拜

明儒學案條辯序

五宗語錄刪存序

羅臺山外傳

前太子少保四川總督劉公祠版文

前四川提督董公神道碑名

廣西按察使朱公神道碑銘

太子少師體仁閣大學士戴公神道碑銘

外舅高府君墓志銘

楊貫汀墓志銘

前浙江分巡杭嘉湖道陝西候補道李公墓表

凡文之事曰典與者所以尊古也若單文無故實則比于小學諸書當時語據

制

詔及

功令是也曰自己出毋勦意毋勦辭是也曰審勢能審勢

故文無定形古之作者言無同聲章無同格是也曰不過乎物不過乎物者必稱其物也言事言理言情皆以之請以質當世之君子



歲紀

乾隆一歲 十月二十六日辰時生於郡中鼇峯坊祖宅父指雲公母林太孺人本籍長樂前

明遷福州郡城

己卯三歲 能識數百字

辛巳五歲 庭訓通孝經

丁酉二十一歲 夏補邑弟子員 以後師事閩邑貢生蔡于麓先生容

戊戌二十二歲 娶孺人龍田何氏

庚子二十四歲 七月長子鍾曦生

壬寅二十六歲 試高等食廩 十一月女淑定生

丙午

三十歲

二月次子鍾吉生

戊申

三十二歲

二月母林太孺人卒

己酉

三十三歲

八月何孺人卒以後皆授經他館

甲寅

三十八歲

葬林太孺人於北關外大夫嶺何孺人耐焉是秋兄子鍾濂舉於鄉

嘉慶

四十歲

郡邑舉孝廉方正辭不就

丙辰

己未

四十三歲

為長子鍾巖娶同邑沙堤林氏

庚申

四十四歲

積廩餼充歲貢生 六月父指雲公卒

辛酉

四十五歲

郡邑舉實學辭不就 是年兄子鍾濂與妹婿劉士棻同登進士第

壬戌

四十六歲

葬指雲公於大夫嶺 冬長孫文樵生兄子鍾濂卒

癸亥 四十七歲 女適侯官鄭宗墩

丙寅 五十歲 四月蔡于麓先生卒

丁卯 五十一歲 兄子鍾淵登副榜後改名壽仁

戊辰 五十二歲 六月次孫文翔生

己巳 五十三歲 為次子鍾吉娶閩縣孟氏鄉賢瓶菴先生超然孫女 秋女婿鄭宗墩卒

甲戌 五十八歲 次子鍾吉補邑弟子員

乙亥 五十九歲 次子婦孟氏卒

丙子 六十歲 撫部考選教職咨部以訓導用

戊寅 六十一歲 五月次子鍾吉卒無子以長子次孫文翔嗣之

己卯

六十三歲

聘為長孫文樵娶連江鄭氏次孫文翹

同邑林氏

庚辰

六十四歲

十月初三日未時易簣

十一月十日

道光

督撫學憲題請入祀鄉賢祠

是秋兄子壽仁同

乙酉

吏部選授甯洋縣學訓導

吏禮二部文未咨會

受業族姪

宗英

謹編

年譜

元和韓對桂舫氏手訂

余家自有明思聰公由鳳陽遷居蘇郡雲和里爲雲東

韓氏

對

幸託

先人庇蔭由拔萃起家仰荷

三朝知遇歷任中外閱四十九年而自郎官游長秋卿治刑名
爲最久夙夜兢惕惟以受

恩深重不能圖報是懼今以衰病乞骸骨歸杜門養痾又越
數載循省生平居官行事愧無足述惟稟承 庭訓仰
沐

君恩閱歲旣多未敢任其泯沒爰仿古人自訂年譜之例信

筆追錄并詳敘世系詮次歲月以示子孫

九世祖愛松公諱永椿積善起家以孫敬堂公諱世能
官禮部侍郎贈通議大夫

八世祖友蘭公諱宗道封通議大夫

七世祖蘇臺公諱世賢官太醫

六世祖寒山公諱逢隆官太醫贈文林郎

五世祖開雲公諱治明萬歷丙午舉人浙江台州府黃
巖縣知縣有政績入祀名宦以孫文懿公諱莢官禮部
尙書

誥贈資政大夫

高祖清諧公諱馨明應天監元鄉諡貞文先生

曾祖聲谷公諱樵太學生鄉飲賓

累贈光祿大夫刑部尙書

曾祖妣氏呂

累贈一品夫人

祖補瓢公諱騏吳庠歲貢生

累贈光祿大夫刑部尙書

祖妣氏王 氏顧俱

累贈一品夫人

祖妣氏陳

勅封安人

累贈一品夫人

父樂餘公諱是升吳庠附貢生

誥封資政大夫廣東巡撫

晉贈光祿大夫刑部尙書

聘母氏蔣

累贈一品夫人

母氏顧

誥封宜人

累贈一品夫人

乾隆二十三年戊寅

是年八月二十四日午時余生於蘇城北顯子巷舞綵
堂時 先祖妣陳太夫人年五十七歲 先大夫樂餘
公年二十四歲 先妣顧太夫人年二十二歲伯兄聽
秋先生^崧長余二歲 先大夫名余曰崧字曰禹三先
一夕夢山僧攜贈香櫟一籠芳烈沁脾已而吾母 顧
太夫人遂坐草 先大夫謂是野衲託生將來或有善
果故又字曰櫟也 顧太夫人履覓乳嫗悉不稱意遂
自乳焉

乾隆二十四年己卯二歲

乾隆二十五年庚辰三歲

姑母之適蔣者歸寧時見而愛之自以艱於得子謂

先大夫曰姪猶子也此子好頭角盍呼我爲母取乳名

曰桂林少長因卽號桂舫嗣後余恆食宿姑家爲外叔

祖辛齋

重光

容齋

含光

兩先生器賞

乾隆二十六年辛巳四歲

每見伯兄散塾必於

祖妣陳太夫人前背誦四子書

心甚羨之輒信口襲誦

陳太夫人尤鍾愛遂親課之

識字日記數十字不等三月三弟

華

生九月殤

乾隆二十七年壬午五歲

八月始入塾與伯兄同受業於表叔陳稼漁師晉師學
業豐富不獲一衿授余兄弟經最久

乾隆二十八年癸未六歲

七月十五日四弟崑生

乾隆二十九年甲申七歲

體羸善病每疝氣作經月不能入塾

乾隆三十年乙酉八歲

七月二十一日五弟峯生

乾隆三十一年丙戌九歲

施正甫先生陳其阮舅祖執柯締姻顧瀛齋先生文耀

長女少余一歲

乾隆三十二年丁亥十歲

稼漁師奉母諱守制

先大夫受業師湯孚庵先生

信

權課始命學爲制藝曾以校人烹之反命曰七字命題
余學作一破云小人之貪也以口小人之詐也亦以口
先生大加賞異謂先大夫曰此老吏斷獄手將來必
掌刑名九月外祖顧隨庵公卒公歷任福建浦城陝西
蒲城等縣政績詳載志乘

乾隆三十三年戊子十一歲

與伯兄暨畢簡庵秋澗補垣陸如山周春帆蔣揀沙毛

綸邦陳稽亭施會傳張杏陶楊蘊和陳沛蒼姪孫學裘

虎文結文社於月聲菴七月初二日六弟巖生

乾隆三十四年己丑十二歲

初學作文專事小品譜華伯父暢授以

國初諸大家文並令摺摭經史縱筆爲之從此文思漸進
乃得行文之樂

乾隆三十五年庚寅十三歲

始應縣府試從梅坡兄敏肄書

乾隆三十六年辛卯十四歲

元和邑侯林公宏德縣試拔取第十先大夫自己丑

春應涪陵周文恭公煌之聘赴浙分校兼赴京兆試家

居日少伯父香麓公鍵恐余兄弟荒嬉督責講畫不少

問

乾隆三十七年壬辰十五歲

受業於無錫張錫谷師利見其教為文必熟五經三傳

充以韓柳歐蘇及前明

國初諸名家之有典有則者偶見習為時調必痛加刪抹

自此作文始知端所趨向

乾隆三十八年癸巳十六歲

錫谷師養痾家居暫撤講席從崑山杜澹廬師彥學師

於制藝務尙華贍謂必千人皆見始能命中是年五月
縣試元邑侯靈武常聖基先生養蒙賞余文四覆皆冠

軍正案名列第二後爲余試卷作序有四百卷中英英

露爽及抑置第二以養其全鋒之語九月院試受知於

南昌相國彭文勤公元瑞四書題父作之經題厥木維

喬詩題平仲君遷以第三名補元庠博士弟子員

乾隆三十九年甲午十七歲

應舅氏澳門司馬香洲蔣公耀宗之聘在百花里家塾

課女孫仍從錫谷師學時伯兄與同學吳山賓紹曾俱

館金閶門外周曼亭同學雋亦館百花里彼此過從談

藝甚樂光州胡文敏公

季堂

秉蘇臬月課紫陽書院拔

置前列秋八月鄉試報罷

乾隆四十年乙未十八歲

學使嘉善謝金圃少宰

壩

觀風紫陽書院拔補內課肄

業蔣氏歲脩僅六金院中膏火歲得三十六金月米三

斗時 先大夫家業日落一身衣履之資藉少自給焉

乾隆四十一年丙申十九歲

畢寄亭姑丈

楚玉

延至家為九表弟

啟

授經歲脩倍於

前與青浦胡怡亭

鴻文

訂交始九月赴玉峯應科試是

年蘇松常三屬預舉丁酉拔貢之典科試題為是聞也

至慮以下人策題史學詩題人澹如菊古學題秋報賦
詩題成連海上船案發俱第一覆試將課卷傳觀極蒙
擊賞有老師宿儒未易到此地位之評十月初二日考
貢正場題義之與比合下一章次題子未學禮乎詩題
賓出奏陔初三日二場策三道經學吏治勾股時因
先大夫擇吉於初六日爲余授室初五日驗看畢卽夜
泛歸初六日更餘甫行親迎禮而報喜人到忝膺拔萃
卽晚迅赴玉峯謁座主謝金圃師同學中有以新娶告
者師戲謂新婦好腳氣也

乾隆四十二年丁酉二十歲

秋七月漢軍高相國制軍晉楊中丞魁與學使會考拔

貢生於江寧試院試前補本學廩膳生榜發始作貢生

八月鄉試報罷

乾隆四十三年戊戌二十一歲

上元日與同年徐蘅香賦吳藕塘人傑結伴入都先一

日四弟崑驟病歿拜別堂下大難為情五月二十二日

朝考

欽命四書題仲尼亟稱於水曰水哉水哉論題主善為師詩題

詩書敦夙好讀卷官為武進相國程文恭公景伊大宗

伯滿洲鍾公英總憲涪州周文恭公取中江南一等第

七名榜發後

欽派額駙福公

隆安

少宗伯後文華殿大學士贈太傅富陽董

文恪公

誥

少司寇後直隸總督光州胡文敏公挑取一

等翼日吏部帶領引

見

上謂福公曰今科汝等所挑拔貢甚好將來有可大用者旋奉特旨福囊等十五人皆以部屬用欽此時吏部以貢生驟得六部主事未免太優議照

國初年間六部觀政例以七品京官分部學習三年堂官甄別去畱畱者再試三年准補主事隨籤掣得刑部七

月謁本部堂官總理為協辦大學士漢軍英公廉尚書

滿洲德公福長清袁公守侍郎滿洲喀公寧阿穆公

克精阿嘉興錢公汝誠及胡文敏公也德公一見謂曰

君年最小器宇不凡吾所屬望者甚大今派君以雲南

最簡司尙可從事舉業錢胡兩公亦深相器重謂堂屬

即同師弟如讀律有未能通曉處不妨請益無畏難也

同司郎中王公士榮員外郎琅公玕郎公若伊劉公鳳

翔主事李公靜淵曾公廷樞祝公雲棟遇案必相咨度

頗承契賞

乾隆四十四年己亥二十二歲

先大夫恐余留京無內助議送眷入都顧夫人出奩
具及析產百畝盡數變售始得成行入都後僦居粉坊
琉璃街 先大夫以 祖慈年高留數日卽南返
乾隆四十五年庚子二十三歲

時姜杜薊師晟由江西臬司內擢少司寇遇要獄每令
審辦屬稿常以生死出入在一字寬嚴爲誡八月應

恩科鄉試報罷是歲恭遇

萬壽覃恩以本身應得七品京官加一級封典

馳贈 祖父補瓢公爲儒林郎

馳贈 祖妣氏王氏願爲安人

馳封 祖妣氏陳為安人

勅封贈 父母如例

乾隆四十六年辛丑二十四歲

六月學習期滿例得奏留英夢堂協揆總部務余名未

與奏留之列時雲南司掌印文公祿相知最深揣協揆

有見擯意再四啟請謂同司若無韓某失一指臂之助

則掌印亦當交替協揆鑒其誠因允所請乃得保留九

月為 祖母陳太夫人稱八十觴未幾而凶問至

乾隆四十七年壬寅二十五歲

時滇撫劉中丞秉恬以盜犯五人殺死一家兩命案具

奏到部同司俱經畫諾余獨以兩盜手刃兩人律應抵償梟示餘三人未經入室情有可原似宜分別減等擬稿說堂反覆辨論英協揆謂此案已成定讞恐一經駁飭中丞未必順從惟君既有好生之心姑如所議指駁既而劉果復持前說入奏奉

旨交軍機會議竟照所駁定案三人遂得免死此余官秋曹初次平反事嗣後在部數十年遇有一線可矜者無不悉心致慎焉

乾隆四十八年癸卯二十六歲

六月補刑部貴州司主事八月鄉試報罷九月得伯兄

本省鄉試中式信時粉坊琉璃街寓房賃值頗昂適劉

金門鳳詒譚及余同年萬和圃承風鸞慶衡術舊寓月

值祇二金遂移居焉

乾隆四十九年甲辰二十七歲

春正月伯兄偕顧蓼生表姪鴻飛至都應禮部試卸裝

余寓一見後詳問二親康健歡喜無量時余兄弟漸有

知交如仁和蔡小霞廷衡寧化伊墨卿秉綬潤州馮艾

圃錫宸張石農秉銳五峯廷詠正定何周溪夢蓮諸君

過從尤密文讌數舉顧夫人主中饋頗有拔釵沽酒之

風

乾隆五十年乙巳二十八歲

前歲 先大夫在家服闋伯兄報罷畱都因謀團聚邸寓爲侍奉二親地遂移居東內城長安街屋宇稍寬敞是春 先大夫畱五弟在家守祠墓同 先太夫人挈

繼嫂陳夫人暨六弟姪質姪女輩由水程抵都聚順一

堂極天倫之樂事未幾 先大夫應松超然觀察之聘

爲其子今尙書那竹汀清安課讀旋又爲禮邸蘭亭主

人延課世子余每退直輒詣西城禮邸館舍省侍是歲

國慶覃恩以貴州司主事加一級

誥封 先大夫爲奉直大夫

誥贈 聘母氏蔣爲宜人

誥封 先妣氏顧爲宜人並以本身妻室封典

貤贈 祖父母如例

乾隆五十一年丙午二十九歲

六月陞河南司員外郎時有驍騎校祿福鰥居無子將以車夫之子三兒爲嗣三兒時至其室一日祿福被殺身死由坊報部卽拘鄰里及車夫父子到案日夕研鞫未得端倪堂司僉謂車夫父子謀殺屬實余獨疑祿福旣欲以三兒爲嗣則車夫父子必不致起意謀害遂悉心檢查祿福所存衣服什物見馬褂上隱有血痕質問

三兒據供稱祿福胞姪某所常服者卽拘某訊問知某素無賴因三兒立嗣事挾忿手刃其叔遂一鞫定案五月扈

蹕熱河十一月隨杜薌師往山西審辦代州命犯孟木成秋審鳴冤一案詳細推鞫竟得昭雪師常言余於爰書中心領神會意見所到之處與桂船無不心心契合後師自訂年譜猶載及之

乾隆五十二年丁未三十歲

時有旗員和某攜僕赴山東通判任於途次收乞食幼孩爲厮養命名慶兒行至臺兒庄和暴卒旅館僕從輩

以病歿具報成殮運匱至京將謀葬慶兒密告其家以家主之死係家奴某等謀斃遂具控到部堂司僉謂幼孩所供既無確證何足定讞余以慶兒確供不移須行文提質店主始可明晰迨東省解送店主到部詳加鞫訊竟係其家奴賭負竊財惟恐事發因起意致死如律定擬寃始申雪

乾隆五十三年戊申三十一歲

陞福建司郎中冬隨杜薌師往直隸河間府審辦交河令保泰來訛詐漏稅銀兩一案

乾隆五十四年己酉三十二歲

京察一等引

見記名以道府用隨杜薌師赴直隸宣化府審理山西監生常
懷恒控告姚金玉等姦拐伊妾一案旋隨往山西審辦
祁縣民段如珪被毆成廢一案復隨往河南一帶迎提
湖北臬司李天培訊取灑帶木植各犯供詞一案回抵
保定隨審束鹿縣民人張玉樹控告戶書私借庫銀誣
扳一案十月截取引

見記名以繁缺知府用選授河南彰德府知府旋奉
特旨陞授廣東高廉兵備道請

訓時蒙

垂詢家世甚悉十一月奉 兩大人南發六弟隨行兄嫂仍留

京歲杪抵里

乾隆五十五年庚戌三十三歲

萬壽覃恩以福建司郎中

誥封 先大夫爲奉政大夫

誥贈 聘母氏蔣爲宜人

誥封 先妣氏顧爲宜人並以本身妻室封典

贈 祖父母如例春正月六弟授室顧夫人稟命堂上爲余

納窆室包氏正月杪奉 兩大人挈六弟夫婦就道五

弟仍在家守祠墓道經西江謁譜華伯父於泰和官署

途次

先大夫偕顧墨林

翰宗

蔣香杜

棠

卽景唱和余

亦得詩數十首

先大夫命余存稿故自編還讀齋詩

自己酉冬始三月抵省是時粵東海氛不靖制府福郡

王籌備勦捕事宜謁見時卽諭令沿途偵緝海盜情形

遂於舟次將盜踪出沒及應如何防禦督捕之處一一

繕稟陳覆謬邀許可抵任後知各屬解庫兵餉向有平

餘余悉歸之公旋奉福郡王檄余至省權攝臬篆六月

迎 兩大人至省二十四日夜舟泊廣州城外海珠寺

下昏黑中失足墮海已歿頂矣兩手若有所持爲家人

朱元滕興福力救得免舉家慶更生焉伯父香麓公於

五月卒於家七月訃至時從兄麗庭濤在粵先大夫

命其星奔回里并諭五弟爲之經紀其喪時有崖州錢
叅將被盜支解合營兵弁設備緝兇日久未獲余奉福
郡王命渡海緝捕行抵崖州憫屯兵防禦勞苦且過事
張皇盜魁遠竄老師糜餉于事無益因撤兵令各歸伍
親歷海疆密加偵察并行文安南國思勒潘土司飭令
協緝兇盜果潛竄該處經土司盤獲解送是役也遠涉
重洋往來瓊雷邊界越二載而罪人斯得

乾隆五十六年辛亥三十四歲

六月奉制府檄赴安南犒賞夷人七月發欽州自埴穹

嶺度九曲嶺過天南橋抵思勒行館土官率夷民男婦
萬餘羅拜馬前余宣揚

聖德頒賞宴幣勞獎再三皆踴躍歡頌而散九月旋省十月捕

盜竣事奉 兩大人挈眷回高廉任時周東屏學使

代

按臨高郡試竣遇于陽江道中譚及高郡文童某以

懷挾枷示發交提調囑余訪問曾否省釋抵署訪聞郡
署司閹圖賄畱難尙未疎枷卽傳閹人同本童到案訊
供屬實遂釋本童而枷郡閹六弟以明年應京兆試由
粵北上十二月兼攝高州府篆

乾隆五十七年壬子三十五歲

是春仍兼攝高州府篆郡中敷文書院將圮捐廉修葺

延香杜主講席諸生如蘇成賢父子梁應元昆仲吳徽

等尤爲翹楚按月校課講藝不輟刊刻先大父補

瓢公文稿時太夫人嗽疾時發入秋目力昏眊九月

間顧夫人夢兩月連落頭頂方謂兩目重明之兆未幾

得外母宋太夫人訃十一月朔爲太夫人誕辰病益

加劇余同顧夫人籲天祈年延至十二月六日丑時棄

養時余以失察屬邑吳川鹽案部議鑄級

乾隆五十八年癸丑三十六歲

是春扶太夫人靈匱到省停東門外斗姆閣道房

先大夫卽居旁舍囊橐蕭然賴各僚友賙助至秋始得
成行接譜華伯父訃道出臨江於天寧寺撫棺一慟十
月抵里時伯兄亦自京奔喪南返安葬 太夫人於香
山壽山灣並爲 先大夫築生壙焉

乾隆五十九年甲寅三十七歲

余以家食維艱會陝西中丞秦芝軒先生 承恩 湖南中

丞姜杜薌師知余家居讀禮書來招之乃于是春挈龔

甥 夢奎 先赴關中於節署盤桓匝月攬函關華嶽之勝

得詩百首中秋由秦適楚九月行次荆門龔甥病卒於
沙洋舟次余賦五古哭之迨抵星沙杜薌師館余於節

署之又一村十年師弟別久重逢遂畱度歲推解之誼
至足感也

乾隆六十年乙卯三十八歲

是春自楚還吳時 先大夫主講宜興蜀山院席繞道

省侍 先大夫諭及蘇臬熊鉛山先生 枚 寓書來待汝

佐辦秋讞汝盍遄歸遂還蘇赴臬署適浙江張穆庵都

轉 映璣 來晤以余將次服闋敦促入都時福郡王督勦

苗匪遣使致幣訂赴苗疆襄理軍務會總理刑部大學

士公阿文成公 桂 先有書來以刑部需才有將余奏畱

之意余先在部時受公知遇最深決計北上挈眷同顧

執齋表姪 珩 於六月抵都僦居青廠奏留摺上得

旨仍留刑部以主事用因憶己酉歲

簡授高廉道時蒙公拳拳話別問部中作稿尙有絲絲入扣如
君者乎至是奏留本部皆公保薦力也冬伯兄挈眷并

余撫女 兆荃 入都

嘉慶元年丙辰三十九歲

慶逢

高宗純皇帝授受禮成

仁宗睿皇帝紀元登極

恩詔頒給封典余以前在部時業已贈封 祖父母 父母此

次未經請封九月補授江西司主事是歲伯兄應阿雨

窗都轉 林保 之聘館津門

嘉慶二年丁巳四十歲

正月陞廣西司員外郎夏隨少司寇桐城張公 若溥 往

天津審范重榮控告楊秉鉞鹽案五月接奉 先大夫

郵諭述及四月中潘青橋丈 文起 於衛道觀前住宅旁

舍土中掘得葆真子所繪 九世祖愛松公遺像石刻

送歸余家供奉並述是月十七日五房又得一孫命名

曰 範 字曰洪九聞之不勝欣忭八月為余四十初度作

述懷詩九章時適總辦秋審故有手錄蟣蝨囚心作兒

孫看之句

嘉慶三年戊午四十一歲

春迎養 先大夫到都百菊溪少京兆

齡延

先大夫

主金臺講席夏扈

躡熱河漢員隨扈者二十六人頗得唱和之樂六弟六試鄉闈

屢薦不售稟知 先大夫爲援例捐納從九品

嘉慶四年己未四十二歲

正月

高宗純皇帝龍馭上賓哀痛倍常

仁宗睿皇帝親政四月恭上

高宗純皇帝尊謚廟號覃恩以本身應得員外郎加級封典

馳贈外祖顧隨庵公為奉政大夫外祖母何氏為宜人充律例

館提調六弟選安徽長楓司巡檢八月陞河南司郎中

升祔覃恩以本身應得郎中封典

馳贈伯父香麓公為奉政大夫伯母顧氏繼伯母邵氏為宜人

十二月廿四日七弟崇生於京邸為庶母林太孺人出

嘉慶五年庚申四十三歲

夏移寓魏染衙衙時有族寡嫂朱挈其二女自楚至京

相投畱之邸寓嗣為二女擇壻遣嫁一適江西早禾司

巡檢倪象謙一適山東陽信令孫少迂銓子庠生兆蘭

又前有族姪杲在京授徒聘松江趙氏女貧不能娶余

曾為出資完聚杲旋卒至是以族姪孫文翊為之嗣後

文翊又卒於京再為立嗣子惇今已領乙酉鄉薦矣

嘉慶六年辛酉四十四歲

二月京察一等引

見交軍機記名四月

特簡湖南岳常澧道 先大夫年近七旬不欲遠赴迎養命余

挈婦之官而自同兄嫂弟姪於秋杪旋里八月充文闈

外監試是冬 先大夫以余艱於得子命以五弟子範

為余子時甫五齡鳴麗庭兄灌泉族弟承志顧梧亭內

三音

二

弟晉芳

件送至湘奉巡撫馬公慧裕

檄委清查本任各

屬倉穀盤出營借民欠及各縣虧數核實稟覆并勒限
嚴飭上緊買補時民間因奉本地採買之禁把持挾制
莫肯急公且歷任州縣視採買爲利藪勒折浮收胥役
需索弊端百出卒之有買無貯民困未甦而倉儲亦匱
緩急難恃因稟請中丞不必拘泥禁買舊例按照例價
隨時買補并懇將楚南實在情形必須及時採買緣由
據實陳奏余卽一面出示曉諭將官吏病民各弊嚴行
飭禁剴切勸諭紳民踴躍急公毋許藉詞觀望以期有
備無患十一月中丞摺上得

旨如所請行是秋伯兄病目失明

嘉慶七年壬戌四十五歲

二月奏署湖南按察使五月卸篆畱省奉

特旨隨同巡撫高公

杞

臬司李公

亨特

承審犯官朱舜愷踢斃

書識劉占鰲秋審二次翻供一案訊明朱舜愷賄囑家

人王昇頂兇捏架原問官慾索各情屬實請

旨卽行正法九月奉

旨補授湖南按察使於謝

恩請

覲摺內奉到

硃批汝係刑名熟手但勿恃才任性須平心靜氣公平審斷勿以已之喜怒定人之出入總以一平字一寬字處之至於請覲一節二年後再奏欽此抵任後遇招解案犯到司隨到隨審以免延累并嚴飭所屬隨案訊結不得私設班所淹禁濫押拖斃無辜及任聽禁卒私刑凌虐等情省監地苦卑溼雨久則圍屏滲漏晴多則狴犴薰蒸疵癘爲災犯多痠斃製辟瘟清寧各丹丸散給幸多痊效是月取眷至省

嘉慶八年癸亥四十六歲

八月兼署布政使稟請酌籌乘時採買倉穀按縣確查

詳辦并詳定穀價及碾運兵米限期各事宜清查南省
各屬倉庫銀穀將虧缺賠變各數及分限已未完繳數
目分別造冊詳院核咨十一月奉

上諭閩省刑名案件繁多按察使員缺緊要韓封係刑部司員
出身素爲諳練着調補福建按察使等因欽此具摺謝

恩請

覲副奉

硃批准汝來見欽此時以湘臬兼攝藩篆會督撫不和事多棘
手尋被制府以違例調署湘潭縣令及遲運綏靖鎮兵
米暨耒陽命犯委檢遲延三事劾叅

詔少司寇賡公 音布 太常卿邵公 自昌 勘奏部議鑄級

恩旨畱任迨明年二月始得替北行

嘉慶九年甲子四十七歲

二月 先大夫七十壽余以北上不得歸祝四月入

覲蒙

召對四次并蒙

聖諭汝為謝師傅所拔士知汝名久矣以汝熟諳刑名閩省案件繁多故有此命等諭乞假順道里門省親得

旨允准五月抵里旬日即行有明禮部侍郎七世從祖敬堂公

世能 賜塋在吳邑長岐山隙地久為墳丁盜賣僅畱墓

穴時善化唐陶山先生

仲冕

宰吳

先大夫呈請弔查

各姓契據如價贖歸並

命置元邑沙河塘田畝以充

祭掃焉為

範兒

締婚陸氏布政司理問香雪公

芮

女撫

女許字吳

毓鈞

為庚申舉人太常博士鑑庵公

廷瓚

子

六月抵任受事恭報到任日期摺上奉到

硃批勉力實心辦事毋存迴護屬員之見欽此閩省民俗獷悍

械鬪頂克沿習日久因痛加勸諭嚴立科條有犯者平

心審斷盡法創懲鬪氛少息並嚴禁會匪結盟棍徒設

立花會隨時訪察懲辦十月署布政使恭報署任日期

摺上奉到

殊批實心察吏綜核維謹不可怠忽因循欽此

嘉慶十年乙丑四十八歲

夏卸藩篆回臬司任適閩省洋匪巨逆蔡牽攻擾臺灣
土盜朱瀆等蔓延洋面到處劫掠隨同督撫兩院籌備
勦捕事宜嚴禁奸民接濟盜船水米火藥等物審辦捕
獲匪黨及訪獲天地會匪又糾眾械鬪傷斃多人各案
聽斷殆無虛日時護理金門鎮總兵許松年統領兵船
赴臺督勦經督撫兩院查得許護鎮遷延觀望坐失事
機以致盜魁蔡牽竄逸會摺叅奏余隨同兩院審明許
護鎮追逐艇匪風水所阻又因所統兵船三號遇礁擊

碎打撈弁兵砲械以致行走遲延實非恇怯失機各情

覆奏許得免重議十一月陞湖南布政使起程北上是

歲先大夫始得曾孫文禾爲五房鶴銜姪籌所出

嘉慶十一年丙寅四十九歲

正月上元過里門省親舟泊葑溪者兩日遂北行二月
抵都時

駕謁

東陵回鑾入

覲於盤山

行在遂扈

五言
三
譯旋京旬日間蒙

召見八次奏對每移數晷凡有敷陳悉蒙

嘉獎疊奉

聖諭汝於度支非所諳習毋畏難毋喜事好自爲之行當召汝

並荷

乖詢先文懿公文章政績及先大夫年老健否此去當迎養

官舍以全忠孝

聖恩高厚感激殊難言喻三月

陸辭出都四月抵湘任事以前署閩藩時經管寶福局務未及
將額缺銅劬隨時籌補年終率行結報照例議處於現

任內降一級畱任時直隸湖北兩省司庫收兌錢糧有
司書銀匠勾串侵欺之事奉

旨飭查各省有無似此弊竇因將湖南各屬解支一切銀兩酌
議支放稽察章程通行遵照前自閩北上時眷口畱吳
至是顧梧亭送眷來湘五月奉

旨護理巡撫印務南省毘連黔粵民苗雜處撫綏匪易以及催
償銅鉛清釐積案疏引緝私在在均關緊要自念受

恩至深初膺重寄惟有仰遵

聖訓實心任事不敢因暫時護篆稍存五日京兆之見八月卸
篆回本任十月奉

上諭刑部左侍郎員缺著周廷棟轉補所遺右侍郎員缺著韓
封補授欽此余以刑部司員洊陞藩司方以錢糧事件非所
素習不克勝任爲憂抵任後嚴絕苞苴直廉潔自矢兢兢
業業夙夜恐懼茲復仰奉

特恩破格擢用遭際之盛夢想難期隨具摺謝

恩卽將酌議司庫支放稽察章程詳細移交新任藩司史公

積

容照辦於十一月杪北行

嘉慶十二年丁卯五十歲

正月行次涿州奉

上諭韓封著轉補刑部左侍郎欽此接奉 先大夫郵諭汝服

官秋曹幾三十年刻刻以求其生三字作主便無有心之孽向來猶爲隨辦之員今則儼爲白雲之長生死出入不寬不縱難乎其難凡遇審辦大案仍宜細心研鞫切勿以道路傳聞之語鍛鍊成獄余恪守弗敢忘二月奉

命偕玉研農少宰

麟

謝壽州獄行抵臨淮旋奉

詔命改道之荊州審勘駐防荊州將軍積公

拉堪

被控一案審

明被誣覆奏復候研農少宰會勘武昌駁案又奉

命便道清江浦勘視南河因去歲有徙河改道之議幾至橫決

遂勘明修築減壩仍由雲梯關入海五月事竣還京覆

手普

三

命

召見時蒙

詢問親年及子息瑣事時梧亭已護眷自湘入都遂移居井兒
衙衙杜薌師舊寓吏部議處湖南省積案以曾任湘臬
議應革任蒙

恩改爲革畱註冊八月

派鄉試搜檢大臣十二月奉

旨署理戶部右侍郎兼管錢法堂事務遞摺謝

恩入對

上垂諭曰刑名錢穀爲政之大者汝刑名固好錢穀非所長要

汝練習爲他日地非念汝貧也但現今刑部中惟汝實掌柁
之人仍責成於汝毋稍懈忽等諭跪聆

聖訓感愧交縈嗣又以在湘藩任時失察書吏旨領庫銀一案
部議降調因有革畱之案應行革任蒙

恩改爲革畱仍註冊

嘉慶十三年戊辰五十一歲

正月奉

恩賜

御製明慎用刑說墨刻三月

欽派會試稽查接談換卷大臣六月奉

命偕鄒曉屏冢宰

炳素

赴河間審辦生員夏允中起意翻控唆

訟內有誣及

欽使劉德兩尚書語審明定擬又接審民人田聲遠續控浮收

科派一案接奉

廷寄以刑部會同宗人府審奏宗室敏學醉鬧一案有心開脫
韓對雖經出差在部會同審擬部議革職着加恩降補廣東
按察使着於河間審案竣事後卽速起程前赴新任三年後
再請陞見等諭繕摺謝

恩後卽由河間取道赴粵行抵獻縣奉到

硃批實心任事明慎用刑勿徇流俗閒逸因循勉之欽此跪讀

訓諭不特寬其既往猶復勗以將來感激慚惶益思自奮祇以
獲咎滋重遵陸遄行不敢請假順道省親瞻望白雲倍
增依戀七月杪道出潛山六弟自長楓官舍來晤聯床
兩夕至宿松之楓香驛而別八月抵省任事恭報到任
日期摺上奉

硃批粵省械鬪之習必應先除頂兒之惡俗尤宜嚴戒竭力挽
回辦理毋忽勉之又

批若能除此惡俗誠爲莫大陰功汝必得子矣欽此後附片奏
謝續奉

硃批積德當積德之遠大者勉之欽此十月奉

上諭永保着調補廣東巡撫孫玉庭着調補貴州巡撫奉旨後
卽赴新任韓封曾任侍郎廣東巡撫印務永保未到任以前
着韓封暫行護理欽此具摺奏謝奉

硃批實力實心用副委任欽此先是外夷嘆咭喇國見大西洋

運貨至澳祇徵船料不納貨稅垂涎已久見西洋微弱

卽陽借保護之名陰圖佔據西洋畏其強盛不敢抗阻

竟帶兵擅入澳門經吳槐江制軍熊光前任孫寄圃中

丞玉庭飭諭回國并將貨船封禁不准開艙起貨並議

封禁進澳水路絕其糧食使之不能久畱而該夷人仍

以保護西洋爲詞遷延不去

聖意以督撫不卽迅速驅逐辦理軟弱疊奉

嚴旨切責余接篆後卽會同制軍遴派幹員赴澳嚴加詰責剴切曉諭并飭令水陸官兵嚴密佈置示以剋期勦殄夷人懾服不敢抗違將兵船全數退出澳門夷商亦悔悟哀懇仍通貿易卽知會粵海關監督常公顯准其開船起貨民夷仍安堵如故會奏拿獲海洋疊次劫擄拒捕之盜匪范寬有等及內地疊次行劫土匪譚四等各犯審明分別凌遲斬梟十二月奉

旨補授廣東巡撫梧亭送眷至粵並挈吳壻來署就婚

嘉慶十四年己巳五十一歲

正月慶逢

仁宗睿皇帝五旬萬壽

覃恩以本身應得廣東巡撫封典

賜贈 曾祖父聲谷公為資政大夫 曾祖妣氏呂為夫人及

晉贈封 祖父母 父母各如例前任制軍吳公因部議奪職

陞任永公 保 中途病故新任百公 齡 到粵需時奉

旨兼署兩廣總督印務具摺奏謝奉

硃批有百齡佐治汝又刑名練習似可漸有起色但不可染外

省因循疲玩惡習耳勉之欽此時閩匪朱瀆盜船竄至粵省

長山尾洋面前經制府吳公檄飭碣石鎮總兵黃 飛鵬

酌分舟師截擊具摺奏

間適土盜張保仔幫船在中路佛堂門洋面游奕亟須堵剿黃

鎮未能東上余卽飛飭南澳鎮總兵胡于鉉及黃鎮分

路剿捕並飭催閩省金門鎮總兵許松年迅速赴粵不

分疆域合力兜擒嗣經各鎮奮勇攻擊殲擒無數餘匪

東竄隨飭令各鎮趕緊分頭截捕并在閩粵交界處所

嚴密堵截先將合剿情形入奏并咨會閩督檄飭舟師

上下兜捕朱潰力竭勢窮遂爲許鎮跟踪圍剿用砲擊

斃檄飭各鎮搜捕餘黨奉

旨研訊殺賊投首之楊作興等遵

旨分別獎賞二月奉

恩賜

御製慎刑論墨刻親赴澳門查閱夷民情形並酌籌控制事宜
廿九日抵宿於離澳里許之新廟當有西洋夷目味喙
噉噉喏嚙三人到廟求見傳進面諭以上年噉喏噉夷
兵到澳爾等不行阻止登岸本有應得之罪

大皇帝憫念爾國向來恭順未加深究益當感戴

聖恩加意防守毋自取戾該夷目俱免冠叩頭三十日進澳該
夷等鼓吹焚香祇迎道左當卽犒賞綢疋牛羊油麪等
物無不頌祝

皇仁歡聲雷動隨查看澳門形勢自伽思蘭砲臺迤南一帶應加築石女牆二百餘丈以資防堵並於前山寨添設專營蓮花莖加築關牆石垣以控制澳夷三月初三日旋省初七日復赴虎門等處查勘於新涌山口添建砲臺一座蕉門填堵海口使匪船不得逕渡各項工費係夷民洋商及香山東莞兩縣令捐辦俱得

旨准行片奏盜首張保仔乘潮竄入獅子洋游奕檄飭左翼鎮

總兵孫全謀順德協副將王國寶探踪追捕密陳粵東

洋面實在情形畧曰粵洋舊設緝匪米艇一百三十五隻現在巡洋弁兵六千餘名沿海砲臺一百餘座布置

不爲不周經費不爲不廣而盜氛終未消滅臣自上年秋間抵粵檢查據報擄劫之案不一而足迨蒙

恩擢任巡撫兼署督篆每於沿海文武員弁進見時反覆訪詢且博採輿論並於提訊洋盜時細心推鞠粵東海道自東至西幾及四千里外接夷洋近連閩省其大股賊目現有烏石二總兵寶郭婆帶東海霸鄭一嫂張保仔香山二等每股匪船自數十隻至三百隻不等乘潮乘風分幫肆劫商漁船戶畏其劫擄或竟私與買路名曰打單蓋不如是則海道不能行地方官無從禁遏且沿海各村落處處可達外洋易生窺伺一聞舟師掩捕則遠

竄外洋在各舟師分守口岸其勢亦不能舍口岸而專事剿捕尤恐別股賊匪乘虛竄入往往前去後空顧此失彼且合通省之舟師不及賊船之半又常年涉歷波濤易於霉壞甚或遭風飄失撞礁擊碎事所時有多一船修造卽少一船緝捕此昔日治海疆者所以有海防而無海戰之說也前督臣那彥成見戰不足恃專一主撫購求線目誘令來投厚給賞銀使之歆動當時如鄭流唐黃正嵩等大幫匪盜相率歸降岸上來一投首之人卽海中去一助惡之賊且使其黨羽自相疑貳不至始終固結此法斟酌行之未嘗不可漸收實效惟於積

年巨盜並未殺賊立功輒予頂戴從行夥黨不過跟隨
投首亦給多金獎勵過隆則民心不服賞給太濫則經
費難支其弊實在於此厥後矯枉過正或又以撫爲必
不可行於是賊中被擄逼脅之徒聞知投首之路絕則
一經逼脅只得安心服從夥黨日益滋多又有誅不勝
誅之慮臣愚以爲勦者
國家不易之大法撫者

聖朝格外之深仁二者並行其效易致而固守口岸嚴立海防
尤爲目前第一要務蓋先固內而後禦外兵家制勝之
常法未有防守不固而能制賊之死命者粵省各路砲

臺碁布星羅似已整齊周備惟虎門最爲中路扼要乃
省會咽喉并附近有蕉門爲番順東香四縣商漁船隻
出入總口海水寬深賊船往往不由虎門從此徑入亦
關緊要乃虎門向有砲臺蕉門則無砲臺設守且凡屬
扼要砲臺必須重兵嚴守方資捍禦蓋賊船伺隙猝至
多寡靡定設賊勢過衆砲臺兵力單弱則勢不能敵總
宜多撥弁兵嚴固防守其沿海村落則令地方衿耆董
率丁壯互相捍護各守段落自衛身家較爲得力查省
廠現有存修米艇三十五隻臣自正月以來親督承修
各員晝夜趕修因賊船近日多在中路游奕當卽先將

修竣之十三隻令署香山協副將許廷桂管帶前赴虎門巡防現又催竣十四隻臣擬日內親赴虎門一帶查勘卽順便押交左翼鎮總兵孫全謀統帶巡緝尙有未竣八隻亦卽嚴催速修并交配帶該處如有應行添兵增建之處容臣親勘後相度形勢俟臣百齡到日卽與熟商妥辦另行具奏所有現在洋面盜踪及籌捕一切情形謹恭摺具奏奉

上諭據密奏粵東洋面實在情形一摺韓封所稱粵東沿海數千里道路綿延處處可達外洋防守稍疎賊匪等易生窺伺所以有海防而無海戰等語朕與廷臣皆時時論及若專責

令舟師出洋追剿卽伊等衝風破浪不憚艱苦屢屢攻克賊
匪亦總非探本窮源之道爲今之計欲靖海洋莫如先固口
岸而欲固守口岸則全在地方官經理得當如果各州縣平
日畱心綏緝俾良民安居樂業自不致出洋爲匪再如清理
保甲等事實力奉行奸民尙何所藏匿此外如水米火藥接
濟之物嚴行查禁各處扼要砲臺添兵實力防守則賊勢自
當日見衰弱何難漸就肅清又摺內稱沿海村落則令地方
衿耆董率互相捍護等語從來以兵衛民不如使民自衛然
亦總須地方官妥爲勸諭隨宜經理使之人人踴躍不致紛
擾凡此良法美意全在治人此時百齡將次到粵着該督撫

一切詳細會商期於事事妥協盡善得收實效勉副委任將此諭令知之欽此又片奏海洋盜船內食米火藥半由陸路奸民接濟而奸民每在番攤賭館鴉片煙館等處招集勾結者爲多嚴禁訪拿懲辦以絕勾結接濟之路叅劾都司私藏餘剩火藥審明按律定擬時盜匪朱瀆之弟朱渥匪幫竄回銅山洋面飛飭南澳胡鎮于鉉會合閩省舟師兜擒以除遺孽又沙灣沿海一帶突有匪艇游奕卽飭文武員弁帶兵加意防堵並飛檄順德王協及署香山協副將許廷柱督領兵船並添撥紅單船二十隻分路剿截嗣經陸續在潭州龍穴等處洋面擊沉盜

船拿獲盜匪二十餘名匪艇大幫聞拿嚴緊俱向伶仃外洋竄逸續據紅單船委員司事等稟報在墩白外洋擊燬盜船生擒賊目劉亞一等四十餘名隨將盜匪提省審辦並飭鎮將等跟探盜踪痛加追剿將獲盜緝捕及設法守禦情形入奏奉

硃批總以斷接濟爲本修船次之勉力辦理欽此四月百菊溪制軍到粵交卸督篆偕制軍會奏平糶倉穀以濟民食得

旨准行會奏酌籌華夷交易章程澳門爲西洋人納稅租住自明嘉靖時迄今二百餘載貿易交通歷來議定防範規

條日久弊滋因將今昔情形不同有應隨時增易者核
議六條入奏

命交軍機會議

准行者五事五月叅劾捏敘誑報之守臺備弁革審擬罪以肅

戎行時匪幫在內洋游奕余偕制軍先後親詣虎門激

勵將弁選備師船面囑護提督孫總兵

全謀

及護左翼

鎮許

廷柱

等統帶出洋迎剿探得張保仔等大小匪船

一百餘隻在荷包灣洋面肆聚卽督率兵船駛往剿捕

殲斃賊眾無數割取首級耳辮生擒賊目馬阿九等男

婦九十八名口提省審明分別如律定擬張保仔幫在

洋匪中尤爲獷悍此次官兵以少勝衆一振水師恇怯
舊習奏入得

旨將出力員弁分別獎賞有差先是粵省出洋捕盜船隻向資
米艇嗣經前任制府以米艇不能遠出奏准改造燈花
戰艦二十號一切柁杆桅棹需用外番所產伽蘭膩等
木植購料維艱待其成造必悞緝捕要需隨悉心籌議
仍請改造米艇以期節浮糜而便駕駛奏入

准行會奏盜首張保仔等因各路嚴禁接濟口食缺乏由厓門
等處竄入內港至南海等縣近海之九江甘竹各村墟
搶掠米糧牲畜當撥官兵勦捕擒獲賊目簡朝富等依

律斬梟又片奏盜匪烏石二等亦因乏食乘潮駛入赤
水港砲臺賊衆千餘登岸環攻經守臺外委周國勳於
臺外編設竹簽設備該匪墊平竹簽用雲梯數十架蜂
擁直上周弁奮勇擊退斃賊多名奏入周弁等得

旨陞用六月拜紫金錠之

賜自後歲以爲常不再恭紀時護總兵許廷桂督帶兵船巡緝

於梳甲門外磨刀洋面遇見盜首總兵寶匪船奮勇攻
擊鎗砲齊施將總兵寶轟斃會東南風陡作匪船佔踞
上風乘勢縱火師船又爲風浪吹散不能聯絡相顧許
鎮力戰被戕奏

聞得

旨優卹并奉

硃批披閱此摺爲之墮淚皆由平時疎懈今見新任督撫提鎮認真辦事遂奮不顧身未免輕賊致有此敗此時以防堵爲要不可再催之使勦若再有敗難振作矣此爲最要慎之欽此又將東路舟師擊退朱渥匪幫大船及西路舟師擊斃賊匪擒獲賊目砲械情形附片入奏籌議添用兵船及各海口巡堵章程畧曰粵東洋面設有米艇一百三十五隻分中東西三路勦防又各營額設外海營船拖風等船五十一隻分巡各營汛口嗣經奏請將燈花船

改造米艇四十隻爲巡防東海及策應中西兩路之用
惟三路米艇除風損撞礁更番修葺及在洋飄失外每
路現存二十餘隻一遇大幫匪船勦捕不能得力須一
面添造米艇一百隻一面擇高大完固之紅單鹽船四
十餘號又雇覓拖風大船五十餘號配足砲械調選官
兵與原船舵水人等分間管駕交提鎮等管帶出洋搜
勦俟米艇趕緊造成將所雇各船陸續換撤再將小號
紅單船籌給雇價配撥壯勇砲械分赴南海等縣內河
協緝此外尙有運鹽之紅綠頭船及白艚等項大船亦
一體給價雇用配撥砲械派令員弁管帶於中路要隘

各海口堵禦並就近稽查接濟再海岸奸民每於積沙窮島搭蓋草寮托名捕魚通盜濟匪卽查明飭令拆毀移居附近村墟編立保甲使奸徒無從託足卽內洋捕魚船隻亦令分立澳甲隨處稽查使內河外海水陸勦防一律準備森嚴奏入得

旨如所請行七月粵洋匪幫因巡防嚴密接濟路窮勢頗窮蹙除總兵寶一股渠魁已滅其餘如中路有張保仔郭婆帶鄭一嫂香山二等幫在厓門梳甲門磨刀門一帶洋面游奕伺間劫掠西路有烏石大烏石二等幫在蓬頭激沙興平確州一帶洋面出沒以圖內竄登岸雖經各

路官弁時有斬獲而船多賊衆未能急切剿除因與制軍籌度飭委將弁幹員分帶兵船於中路之海口要隘分兵堵防緊要村岸按段巡緝其西路飭令高廉鎮道督同府縣會營於各港口巡防守禦移會孫軍門

全謀

在虎門要口督防以絕外盜覬覦內奸勾結一面催雇船隻鑄造砲械配交軍門管帶出洋窮賊所向爲一鼓蕩平之計時東路朱渥匪幫因剿捕嚴緊駛回閩洋碣石黃鎮飛鵬帶兵趕赴中路會合協剿隨將籌備情形入奏會秋雨兼旬南風競作潮水汎漲突有大小盜船三百餘隻乘勢竄入海口連夜至香山等縣海面毗連

之古鎮小纜紫泥陳村北街外海沙灣市橋等處支河
汶港數十里內各村莊冒死撲岸搶掠米糧卽飛調陸
路官兵一千餘名添雇壯勇四百餘名馳往各該要隘
分頭堵剿焚獲賊船砲械擊斃賊匪二百餘名生擒盜
犯九十餘名餘匪向外洋竄逸並飭水陸官兵分路追
剿委員分往被擾各村莊撫戢會摺入奏並附片奏西
路匪幫爲署春江協副將何英轟退內港已無匪船存
匿檄調何協趕赴中路協剿以期迅速殲除奉

恩賜

御製耕織圖詩勤政箴義利辨墨刻時余蒙

恩派赴京叩祝

萬壽卸撫篆起程計自正月至七月檄飭文武員弁先後拿獲
海洋劫擄拒捕及內河行劫各匪犯審明分別凌遲斬
梟發遣摺凡十數上內有實係被擄押禁之難民均確

訊請

旨省釋者數十人九月十九日抵京恭上祝

嘏百韻詩冊自二十日至初九日蒙

賞同樂園

寧壽宮聽戲

正大光明殿

賜譙屢蒙

恩賞鑲玉如意等件每日卽於

便殿

召見余先北上時與菊溪制軍約欲滅洋匪必先斷接濟而接濟莫甚於官鹽船鹽運必須暫由陸路一年庶克有濟
惟事多格礙阻撓者衆余面

聖時密陳此事而制軍之摺適至蒙

恩不下部議速准施行並面乞順道旋蘇省親亦蒙

俞允初十日

陞辭出都十一月抵家時先大夫年已七十五歲意興猶昔

而氣體漸衰定省經旬喜懼交集備述

恩意稟請迎養又以粵東地土卑溼不樂遠行并諭以渥受

主知當此緝捕緊要之時宜速起程赴粵勿戀私情而曠職守

遂叩辭南發具摺奏報到籍及親年病體暨起程日期

奉

硃批汝能盡心王事實力辦公必邀

天鑒汝父延壽無涯矣勉之欽此並蒙

恩賜

御書福字及鹿肉山雞等件

嘉慶十五年庚午五十三歲

正月抵省奉

恩賜

御製傲怠詩憫忠詩墨刻具摺奏謝奉

殊批勉力辦事永沐國恩欽此時粵洋盜匪自上年嚴斷接濟
勢日窮蹙海口要隘防守緊嚴三路兵船合力圍剿既
不能登岸撲掠又不能恣肆滄波苟延殘喘互爲黨援
其中有意欲投誠者又恐到官治罪不敢來投自去冬
郭學顯卽郭婆帶等幫呈繳船一百餘隻投出人五千
餘名制軍奏乞

聖恩免罪遣送回籍安插至是有線民稟報張保仔各幫亦願

率衆來投以制軍前奉

諭旨張保仔或窮蹙來投斷不可准欽此卽嚴行飭駁嗣據按

察司經歷劉大魁稟據線人稟稱張保仔自知罪大情

願立功自贖并代遞哀懇稟詞內有先將船砲呈繳散
遣夥黨懇乞酌留船數十隻隨同師船出洋掃滅餘匪
以贖死罪等語經制軍以該匪連次被剿雖挫克鋒尙
未窮蹙恐所稟僅屬狡譎緩兵之計復行飭駁又據劉
經歷稟稱張保仔遣令頭目鄭從富等賫具哀稟並開
單呈出大小船二百七十餘號大小砲一千餘門頭目
一百五十餘名夥衆一萬四千餘人懇乞投首已駛赴

虎門外之龍穴洋面灣泊候信隨與制軍密籌粵洋盜
匪向有六大幫之名內總兵寶先被兵船擊斃現在郭
學顯等幫均經懇乞投首卽張保仔幫夥內殺賊來投
者有譚亞瑞等三百餘名該匪黨散勢孤以畏死之心
遂作乞生之計粵省二十年來沿海商漁受害已久近
年復擾及內港民不安枕今聞張保仔有投誠之信莫
不望其來歸以此一幫巨盜解散餘匪悉易殲除從此
粵洋可期肅靖倘該匪等求生不得拚死披猖沿海居
民必致復遭蹂躪卽令攻擒殲獲而東擊西竄亦未免
勞師糜餉遷延歲時因商定嚴飭內河各要隘防兵練

勇仍晝夜巡堵並札知署提軍黃公飛鵬帶領兵船駐

守虎門以備不虞制軍卽帶同署臬司溫公承志馳赴

虎門查看情形相機辦理余與署藩司陳公若霖在省

籌辦一切先將現在情形據實入奏奉

上諭百齡韓封奏各路洋匪悔罪投誠分別辦理又海洋巨寇張保仔稟懇投誠各摺覽奏俱悉盜匪張保仔兩次具稟開呈大小船二百七十餘號大小砲一千餘門頭目夥衆共一萬四千餘人懇乞投首此事尙未可信如果該匪真心來投自應將船隻器械全數呈繳何必仍懇畱匪船至數十號之多若因隨同官兵出洋剿捕贖罪立功投首後豈無師船派

撥又安用該匪預爲籌計自係該匪以近日各口岸嚴禁接濟無以爲生勢窮力絀假意投誠冀作緩兵之術該匪等素性狡獪反側靡常倘情形稍涉可疑仍當乘勢攻勦以期淨絕根株切勿輕信疎防致蹈賊人鬼蜮伎倆所謂受降如受敵不可不慎之又慎卽使該匪真心畏罪率衆來投亦須分別安插使之散而不聚聲勢無由聯絡再飭各地方官密加鈐束庶不致有疎虞若祇圖一時苟且將就不顧將來流弊滋多非萬全之策也所有此次奏明散遣歸籍之各股投誠賊匪亦須一律妥爲經理不可稍有疎忽欽此又陸續據電白等縣令稟報張保仔等幫頭目李士典等七起呈繳

船隻砲械率衆一千五百餘名投誠乞命分別遣歸原籍管束安置內有殺賊投首二起照例獎賞時盜首朱渥已在閩投誠其幫內頭目沈忠陳粟率衆六十餘名赴澄海縣呈繳船砲懇乞投首亦卽分別遣送咨移閩省查照收管安置會摺入奏時制軍已馳抵虎門張保仔等迎伏哀叩卽諭令將船砲全行呈繳散遣夥黨先遣眷屬人等上岸連日有頭目溫添壽鍾阿有等二百五十餘名陸續投首呈繳船隻器械驗明遣歸原籍惟張保仔心懷疑懼不卽將全幫船砲家口遣送到岸時適有暎咭喇貨船十餘號回國駛出虎門揚帆開砲該

匪驚疑指揮幫船乘夜潛遁外洋之浪白濤一帶游奕
觀望制軍與余往返札商設法先行解散賊勢一面將
造竣新船配撥兵械加意準備會摺奏

聞二月奉

恩賜

御製讀尚書詩詠二十四氣詩墨刻叅劾捏報平糶之縣令及
庇護蠹役之州牧審明定擬時張保仔自驚竄後復哀
懇線人代稟乞投會有匪船偷進海口至長沙村撲掠
兵勇抵禦未退張保仔聞知前往將滋事夥匪殺斃隨
令幫首鄭一嫂卽鄭石氏來省請罪乞命余會同制軍

傳令進見該氏哀泣稟求誠心向化情詞懇切願先將張保仔香山二等眷口五十七名送省查驗旋據劉經歷等呈報張保仔幫船二百七十八號頭目夥衆一萬五六千人已全行駛赴香山屬之芙蓉沙海口聽候驗收並稟情願將烏石二東海霸大小各股餘匪招同投首如不速投懇隨兵船前往擒捕以功贖罪等情隨與制軍察看前後情形似係真心悔罪因商定制軍親赴香山相機查辦余飭令水陸兵勇嚴密防範籌辦一切應用夫役口糧事宜先將現在辦理緣由由四百里馳奏奏入

聖意以人數既衆不忍概予駢誅但頭目夥衆有二萬餘人之
多如何安置之處

諭令悉心經理據實奏聞會奏偷運火藥出洋濟匪陳北盛各
匪犯審明分別如律定擬又將東路洋面安靜西路舟
師殲斃賊目拏獲盜匪劉亞揚等多名呈繳船砲悔罪
投誠之郭學顯餘夥譚仕順等一百二十餘名鄭一幫
內頭目李福盛等三百三十餘名各情形附片入奏上
年辦理廣東秋讞失出各案部議降二級調用因有革
留之案應革任奏奉

諭旨韓崧免其革任仍註冊欽此具摺奏謝奉

殊批實心辦事勿徇姑息之見勿過於嚴刻總以公正爲主問
獄必須心平氣和勿以己之喜怒爲據欽此時張保仔卽張
保等已將大幫船夥袍械呈繳派員逐一驗收將夥衆
查明姓名籍貫給發口糧委員分頭押歸各原籍檄行
該地方官妥爲安插內有攜帶貲蓄及有親故可依者
俱令各圖營趁安分守法其漁蠶貧民酌量給賞俾資
復業至前被擄之幼孩婦女有親屬者俱查明給還所
發口糧等項於官民捐存捕盜經費內動支概不開銷
正欵會摺入奏並附片奏西路舟師擊沉盜船拏獲盜
匪陳元正等多名及據陽江等縣陸續稟報盜匪陳亞

蟾等八起呈繳船砲率衆一千三百餘名投誠乞命分別遣歸原籍安置內有殺賊投首及導引官兵勦賊二起俱照例獎賞四月張保等共呈繳大小船二百二十六號大小砲一千三百十五門鎗械二千七百九十八件投出夥衆一萬七千三百十八名口全行查收陸續遣送安靜散歸粵省商民皆相告有喜色時張保隨制軍進省傳令進見宣布

恩威並賞以綢緞荷包銀牌等件面詢中東西三路形勢張保指陳詳悉何處利於搜捕何處利於堵截及外洋島嶼何處可以窩藏接濟一一稟出有在洋日久巡緝官兵

所不能知者且稟懇賞畱船隻建功自効情詞激切因與制軍通盤籌算此時中東兩路二千餘里洋面業已肅清惟西路匪幫未盡勦滅卽將呈繳之船砲修整與舊存新造之米艇官船配撥兵勇乘勢兜擒并從投首夥衆內挑選精壯配入水師一體訓練以資勦捕復諭張保不許擅畱船砲自行出洋俟奏明後隨同舟師緝捕立功因將查辦情形會摺入奏得

旨如所請辦理又

諭曰該督等辦理降匪至二萬餘人之多目前海氛可冀漸次肅清但此次降匪皆係伊等自行來投非出兵威震懾所致

卽該督等原摺亦稱其並未窮蹙是以此時不加恩獎若能
乘此大股解散之時將烏石二東海霸股匪悉數殲除彼時
自當立沛殊恩用獎勤勞等因欽此時西路烏石二東海霸
等股仍在洋面游奕肆劫又有烏石大等小股飢竄渴
奔乘間圖掠因嚴檄西路文武員弁上緊攻捕據陸續
稟報經署雷州同知羅含章署叅將謝廷可等帶領舟
師兵役會合擒剿將烏石大等幫匪船擊沉十餘隻殲
斃盜匪三百餘名生擒匪犯八十九名提省審辦卽派
撥大幫舟師西下乘機擒剿會摺入奏又將遇賊先逃
棄船不顧以致米艇被劫之犯弁奏請卽行正法制軍

隨親赴西路勦辦各匪連獲勝仗將奮勇殺賊之張保
奏請

賞給千總銜五月奉

恩賜

欽定授衣廣訓

御製爲臣不易論六月制軍督率大幫舟師痛勦西路洋匪所

有積年巨盜烏石大烏石二等爲前革提督孫全謀首

民張保奮力生擒各鎮將等將首夥各犯全行弋獲餘

匪皆乞降隨將烏石二等一百二十六名押赴海口地

方分別凌遲斬梟時東海羈全幫亦皆畏勦乞降繳船

散夥俱照前次首民之例辦理粵洋盜匪逞兇肆劫已
非一日商民擾害

宵旰殷憂自上年嚴斷接濟勦撫兼施計著名大股除投首外
至是始悉數殲除全省洋面遂得一律蕩平奏捷摺上
奉

上諭韓對著賞戴花翎交部議敘并賞給瑪瑙鼻烟壺一個黃
辦大荷包一對小荷包二個欽此是役也皆制軍上乘

睿謨預操勝算將士用命克奏膚功余在省調度未及身歷行
間謬膺

上賞感慚榮幸莫可名言隨具摺奏謝又奉

殊批實心勉力紓朕之憂錫福南疆永臻寧謐勉之欽此先是

制軍於報捷時致余手札中有云今日幸不僨事而議者又因降匪之多追咎勦賊之少事之未成局外者畏難而觀其敗及事甫成局外者又懷忌而抵其隙從古皆然吾兩人惟有誓守初心慎益加慎以期上酬恩遇而已又云張保自投首後其出力報効之心愈切真是行伍中大得力之人前次勝仗摺內已爲請

恩賞于總銜尙未奉

旨此次未便爲之瀆請

聖鑒昭然當必逾格獎勵也至是張保亦得

旨以守備超陞是時中東兩路洋面已無大股匪幫而船多人
衆必有竄匿零匪若不早除恐小股又成大幫嚴飭各
路兵船分段勦捕以淨根株其東路潮州及閩粵交界
一帶責成南澳鎮胡于鉉中路虎門一帶責成左翼鎮
會文華各統師船巡緝並飭沿海營縣周密偵捕陸續
據報拿獲零匪五十餘名又據陸豐澄海兩縣具報畏
罪投誠之餘匪黃崇記等三起共九百七十八名均檄
飭提省審明分別遞籍安置并將內河土盜駱沙侯得
等夥衆二百餘名先後拿獲解省嚴辦具奏並有首民
陳李保等情願前導幫捕殲斃賊匪擒獲盜匪龐貫清

等二十餘名及被擄押禁男婦多名提省審明定擬將首民陳李保獎賞等情入奏七月將查拏內河陸路土匪八百餘名逐案審擬分別正法其監候各犯人數衆多且續獲解省及命盜案犯計一千五百餘名省監擁擠恐有疎虞奏請於定案後先行分解發遣必由之各縣勻禁以清囹圄奏入

准行時制軍回省與余悉心籌議將粵洋區分五路定以統巡總巡分巡會哨名目飭令各鎮將等率帶各路兵丁定界分班實力巡哨搜捕以均勞逸而專責成仍令提督以時督查校閱巡洋兵丁以船之大小配兵之多寡均

寬給口糧以示體恤又西路斜陽山一處係海中孤島
有無業流民搭寮居住私墾荒地易於藏奸因卽給貲
遣歸各原籍編入戶甲所存寮舍林箐悉行焚燒永遠
封禁仍令巡船按月巡查并將洋面安靜商旅通行居
民安堵各情形會摺入奏奉

硃批所辦實屬可嘉欣慰覽之欽此八月入闈監臨文闈鄉試
粵省舊有越秀粵華端溪三書院余莅粵後甄別月課
必親定甲乙是秋決科前列者俱中式一榜七十二人
半皆三書院肄業生九月奉

恩賜

御製清寧合撰全函十月主武闈鄉試取中武生張良驥等四
十四人十一月會奏籌定巡防內河及各村岸章程奉
硃批緝匪安良常行勿懈總在得人則治勉力辦理欽此刊刻
先大夫聽鐘樓詩稿八卷工竣十二月制軍因病請
假奏明暫護督篆是歲將拏獲洋匪土盜數千人督同
司道逐一審明分別斬梟發遣內有被擄押禁研訊屬
實奏請省釋者數百人平心研鞫幸無枉縱奉

恩賜

御書福字及鹿肉等件

嘉慶十六年辛未五十四歲

正月制軍奏准開缺調治新任松公筠到粵需時奉

旨兼署兩廣總督印務具摺奏謝奉

硃批實心勉力聽訟尤要欽此奏電白營擒獲在洋劫掠餘匪

林亞瑞等提省審明定擬并將拏獲怙惡不悛之首民
劉亞內等各犯加等治罪及嚴定約束首民章程附片
入奏三月奏請將畱緝員弁釋回原籍以示矜恤得

旨准行粵省向有關鹽盈餘銀十四萬兩係奏准畱充捕盜經
費及津貼米艇砲械歲修茲查巡洋師船弁兵口糧已
准令局運各商捐辦津貼無須多撥因奏請每年酌畱
銀六萬兩以備支應其餘八萬兩報撥充餉松湘浦制

軍到粵交卸督篆前粵省鹽飭因海氛不靖奏准暫由陸運嗣經百制軍奏明洋面漸次廓清請由海陸兼行至是與制軍籌商請復海運舊章並飭巡洋師船防護督查以杜偷漏會摺入奏奉

硃批依議辦理欽此查粵東內河陸路土匪結盟夥劫拒捕之風甚於他省疊經擒捕懲辦其風終未盡戢因嚴立科條除夥衆無多行劫止一二次照例審擬具題外其夥衆四十人以上行劫三次並拜會拒捕脫逃復獲者均先行正法加擬梟示再各屬獲盜訊供時同夥數目姓名案犯不能一一指出每就犯供詳報迨審辦後弋獲

本案正犯過於原報之數各州縣恐干處分意存迴護
爲地方官歷來通病因議嗣後無論本管官及鄰境續
獲案犯訊明時准其隨案聲明免其議處會摺入奏閏
三月奉

恩賜

御製全史詩

御筆息訟安民論弼教申謨墨刻粵東濱海環山土三水七產
米無多每資商販接濟商販少則米價日昂貧民無食
流爲攘竊是以土匪屢懲不息查粵東毗連湖南爲產
米之鄉而楚販至東沿途關口徵稅商民未甚踴躍因

奏請免其納稅以通商販而裕民食六月會奏通省積年民欠實在拮据情形懇

恩分年帶徵以紓民力得旨

准行又查民間水衝沙壓田畝沿海業戶未及隨時報豁其新墾各田又復爭耕強佔訐訟不休亟應澈查確丈覈實清釐以息訟端而裕

國課附片入奏會奏酌改雷瓊營制釐定西路洋巡各事宜八月訪聞東莞地方有私販出沒檄飭嚴密查拏隨拏獲輿販重載私鹽陳達行等匪犯多名審明加等擬流將各員弁懇

恩甄敘十月奉

上諭松筠著補授吏部尚書來京供職兩廣總督員缺著蔣攸銛補授蔣攸銛未到任之前著韓封暫行兼署欽此先是有

揭陽縣民鄭黃兩姓積年互毆致斃多命嗣經檄飭糧

道温

承志

嚴密查拏先後緝獲兇犯五十餘名提省審

辦查械鬪之風潮屬爲甚民皆聚族而居小忿輒相讐殺捕役畏其丁衆恇怯不前而營員又以命案無協緝之責必稟候批准始撥兵同捕兇犯早已聞風遠颺是以械鬪兇犯每多經年未獲再潮郡距省寫遠弋獲解省道路崎嶇而械鬪正幫各兇或百餘人或數十人不

等既慮疎虞又艱跋涉是以潮郡承緝兇犯往往畏難延玩因酌定章程奏請嗣後械鬪逞兇斃命之案文員卽會營協拏營員一面具稟一面督兵幫捕至幫兇各犯罪止軍流者由該府縣訊明就近解赴巡道覆核其擬抵正克仍解省確訊懲辦奏入奉

殊批依議辦理欽此叅劾擅動兵役越境拘拏糧戶致被拒捕傷擄兵差之縣令游擊奏請革審十二月奉

恩賜

御製喜雨賦墨刻又奉

恩賜

御書福字及鹿肉山雞等件是歲檄飭文武員弁先後拏獲土盜會匪不下二十餘起以及命案各犯案牘山積余日夕聽斷覆訊明確分別定擬具奏不敢稍自暇逸二十日接尺五從弟來潮自皖來信得六弟卒於貴池丞署凶問憶自戊秋於楓香驛分手後竟成永訣且念堂上春秋高雖有伯兄兩弟朝夕承歡而聞信之下不知若何驚悼因賦長古一首哭之爲之悲慟減餐者累月嘉慶十七年壬申五十五歲

正月有閩匪在澄海之放雞外洋肆劫斃命檄飭營縣舟師先後拏獲盜犯崔明等審明依律定擬具奏並嚴

飭西路鎮將等實力巡緝以防閩洋餘匪竄入其西下
路之瓊州龍門一帶逼近越南恐逸匪逃避夷洋及乘
間竄回飭令舟師加緊防堵入奏奉

硃批所辦甚是欽此二月蔣礪堂制軍到粵交卸督篆具摺奏
請入

覲奉

硃批汝應俟今冬或明春得暇時再行奏請此時尙早欽此四
月奉

恩賜

御製嗣統述

聖詩全函會奏特叅年老才庸廢弛公事之海陽靈山鶴山樂

昌四令分別勒休革職奉

殊批依議另

批能如此察吏方不愧督撫之職任欽此拏獲順德縣三合會
匪嚴貴邱等一百五十一名並有聞拏畏罪赴縣投首
各從犯提省如律定擬因查聚眾結拜首從各犯定例
綦嚴惟被脅結盟及畏累出錢者例無治罪明文因會
議酌定嗣後良民被脅勉從結拜者減等杖徒其畏累
出錢並未隨同結拜者照違

制律杖一百如聞拏投首之犯仍照律例於各本罪上分

別減等免罪若減免之後復犯結拜不准再首獲解到官訊無別項不法重情照初犯應擬本罪上加等定擬其自首免罪者由縣造具姓名住址清冊責成保甲族長保領約束如有再犯保人予杖示儆並申明奏定條例出示曉諭各章程會摺具奏六月奉

恩賜

御製守成論喜雪賦墨刻七月接閩省咨會洋匪紅日茂等幫船尙未撲滅亟應會同勦捕卽飛檄東路南澳鎮總兵黃耀武等迎截夾攻旋據稟報於閩屬之坪嶼洋面追近賊船奮勇攻擊轟斃賊匪多名匪船俱向黑水深洋

駛逃隨飛咨童提軍

鎮陞

酌帶舟師迅速東上督率各

鎮將趕緊巡緝并咨閩省撥兵會勦會摺具奏奉

硃批雖係鄰封毋分畛域奮勉殲擒勿令勾結欽此八月會奏

陸路清遠從化一帶著名積匪經調派文武員弁先後
拏獲五百餘名分別審擬將出力員弁懇請鼓勵得

旨分別陞用鎮平縣屬白馬等鄉被水歉收懇請緩徵奉

恩賜

御製全史詩注解四函余以定省久疎并將爲

範兒

授室囑顧

夫人挈子暨吳壻夫婦外孫輩於十月杪旋吳余自莅
任粵東親族來者踵相接或量酬館穀或酌送歸資有

宣城胡錦堂罷官畱粵吾鄉顧二雅幕粵流寓與余均
 關戚誼胡有女顧有孫女皆因貧未字為之擇配遣嫁
 胡適記室楊君顧適表姪蔣錫祉即於余署中成嘉禮
 至是挈之同歸

嘉慶十八年癸酉五十六歲

正月奉

恩賜

御書福字及鹿肉等件密奏粵省倉庫二項虧短銀兩彌補依
 限全完歸欵貯庫奉

上諭蔣攸銛等奏彌補倉庫銀兩依限全完歸欵據實密陳一

摺該省倉庫二項從前查明共虧缺銀七十六萬五千餘兩
分年陸續提補現已全數解司共收銀七十六萬五千餘兩
歸還各款該督等確切覆查據實密奏前曾有旨各省彌補
全數完竣奏報後派員前往確核茲該省倉庫舊缺依限彌
補全完蔣攸銛韓對二人平日尙屬可信諒伊等斷不至虛
詞奏報朕亦不復派員前往覆查該督等自此次彌補完善
之後所有實存司庫款項當隨時親往盤察毋致再有虧短
其州縣內如續有虧短倉庫者查出一案卽叅劾一案不可
稍存姑息等因欽此四月會奏內河陸路疊經獲辦積匪請
將出力文武員弁量予鼓勵

上諭蔣攸銛韓對俱著加恩交部議敘其緝捕出力之文武著照所請加恩以示鼓勵欽此具摺奏謝奉

硃批除莠安良固爲善政妄拏邀功翻成虐政惟求一是爾勉之欽此時眷屬俱旋里先大夫以子姓繁衍舞綵堂舊宅

不能容命卜新宅於附近新橋巷中二月爲範兒成

婚媳陸氏卽顧夫人女甥四月七弟亦成嘉禮弟婦顧氏爲外舅瀛齋公季女五月廣肇兩府屬之南海等八縣先後稟報入夏大雨經旬山水漲發衝沒沿河基圍民居田畝內開建一縣獨當山水之衝城內水深丈餘廬舍倉穀水浸者一晝夜淹斃人口數百名卽飛飭幹

員分賚銀兩米石馳往撫卹查勘並會摺奏請分別賞借修理基圍銀兩俾令以次修築培墾補種其被水較重各戶新舊錢糧懇請分年帶徵得

旨准行六月會議粵省舊缺常平倉穀一百三十萬九千餘石將原提正價支用及沙坦花息儘數津貼尙不敷銀七十餘萬兩承買人員旣難獨力捐辦又以虧非本任未免觀望及上司督催嚴緊非挪移補苴卽流攤後任積久又成新虧流弊無己因商定照前議彌補倉庫之法分作十年每年提補銀七萬餘兩按缺捐解無論正署人員均核其在任月日難捐提貯解繳逾期者撤任勒

追其應買缺穀爲數甚多若同時採買恐妨民食定以限制分年買補如遇水旱災區准詳明暫緩俟豐稔時照數補足將籌備章程據實密奏得

旨如所請行春間奏請入

覲奉

上諭韓封自十四年入覲後已逾三載著准其來京陛見俟將本年秋審及奏銷次第辦竣即將巡撫印務移交蔣攸銛兼署於六月內起程來京可也將此諭令知之欽此時以勘恤災民之役奏改行期於七月中北上梧亭內弟偕行至西江卽分道歸省旋得家書知外舅瀛齋公於九月棄

世梧亭抵家已捐館十日矣公愛余如子聞之悲慟不勝幸顧夫人在家親視含殮稍慰歎忱九月行次銅山縣境奉到

恩賜

御製詩二集喜雨山房記墨刻傳聞曹州所屬各縣有教匪戕官劫庫所在戒嚴行抵兗州知教匪先由直隸長垣拒捕起事擾及豫省滑濬二縣竄入東省焚劫勢頗猖獗二十四日至河間駭聞逆匪林清突犯

禁城之變光天化日之中有此梟獍聞之不禁髮指十月朔抵京入

覲蒙

召見三次

垂問粵東民情政務甚詳奏對屢蒙

嘉許初三日奉

上諭祖之望所遺刑部尙書員缺著韓封補授欽此具摺奏謝

後卽赴部辦事時逆匪重案人犯衆多餘偕同部堂司

會同軍機日夕研鞫逐一訊錄供詞進呈

御覽將從逆案犯分別情罪尤重次重又次重之不同開單請
旨定以凌遲斬絞其應畱質之犯仍行監禁十一月奉

旨此次審辦逆案之堂司各官晝夜研鞫不辭勞瘁能將緊要

逆情逐一究出甚爲出力刑部尙書崇祿韓對著各賞給貂皮褂一件侍郎穆克登額成格著各賞給狐肱褂一件以示鼓勵等因欽此其餘各司官俱蒙

恩賞有差時從逆犯官曹綸及首逆馮克善牛亮臣等陸續解到熬審明確恭候

廷訊寸磔示衆以彰

國法並將供出各犯逐一覈對請

旨勅下各直省查拏到部研訊按律定擬內有無辜株累良民奉

命清理得訊明省釋者八十餘人三月以來奏決各犯爰書九

上囿囿為之一清奉

恩賜

御製遇變罪已詔酌減令節禮儀諭盡心竭力仰報

天恩諭報

天恩肅吏治修武備諭致變之源說行實政論原教墨刻七分十

二月條奏會教各匪分別治罪一摺內左道異端為首

絞候一條奉

旨改為絞決二十七日進

乾清宮

恩賜

御書福字及麕鹿等件時余部務倥傯寓中一切賴李芝畦甥

沅
爲經理焉

嘉慶十九年甲戌五十七歲

正月初二日

命坤寧宮饗胙肉 先大夫於二月二十七日八十壽辰十三

日

召對勤政殿奏公事畢陳乞歸祝親壽私忱奉

上諭刑部尙書韓封之父韓是升年屆八旬著加恩給假三個月回籍俾申洗腆之忱并頒賜御書扁額及各賞件著於十七日祇領親賚至家韓封於假期內卽行來京供職欽此十

七日奉到

恩賜

御書恩錫耆齡四字扁一件嵌玉如意一枝佛一尊銅玉陳設
九件寧綢九卷綾九卷伏念身受

聖恩畀以刑名重寄辦理要案甫就清釐荷蒙

曠典推仁

俯俞歸祝榮幸感激不可言宣隨於十八日先行具摺奏謝卽
陛辭出都二月二十一日抵里恭捧

御書扁額及

恩賞各件步行至家 先大夫出郊跪迎接至堂中供奉率子

孫曾望

闕叩謝一一祇領觀者填塞咸嘖嘖稱盛先大夫以受
恩深重愈踖踏不自安誕日余兄弟率兒孫行叩祝禮宴親朋
者數日稱觴甫畢先大夫諭曰吾以韋布寒儒得邀

寵錫報

恩惟在子孫汝宜遄往供職勉矢靖共以答

高厚余雖老清溫有汝昆季在勿戀戀也舞綵堂西偏有老屋

數椽近隔一垣為曾伯祖恕齋公櫛舊宅時已易主拓

之為奉親地先大夫顏其堂曰養志閏二月入山展

墓畢叩辭堂上啓行陸銘人偉堂偕行途中多唱和之

作三月抵都卸裝老牆根寓翼日代先大夫回進貢

品蒙

賞收十件仍赴部辦事時各省續解逆犯到部逐案研訊按律定擬內有被誣悞獲及別案株連者均質問明確奏請省釋五月拜荷包香囊之

賜六月顧夫人率兒媳等到京條奏嚴定長隨胥役訐告本官條例奉

恩賜

御製化民成俗論墨刻又奉

上諭兵部尙書員缺著初彭齡補授未到任之前著韓封兼署

欽此赴兵部辦事條議東豫二省因變逸出監犯分別減等蒙

恩賞鮮荔支又奉

恩賜

御製天人交感說墨刻議奏武童考試章程七月兵部帶領引見武職十四員內廣東連陽營游擊張仁係余撫粵時保薦者茲以獲盜保舉奉

旨交軍機記名八月酌定已革花戶隱名身後辦事加等治罪專條十月初四等日進

同樂園侍班聽戲蒙

賜克食并屢蒙

恩賞玉翎管等件會同內務府議奏私自淨身條例十一月奉

恩賜

御製平定教匪文又蒙

恩賞韻學集成全部清署小草全部讀易口訣義全部學易集

全部核議條例內應纂冒襲世職及死罪人犯監候待

質二款十二月訊明東省拏獲曲阜居住之劉第五實

非指拏要犯奏明得

旨賞給盤費釋回奉

恩賜

御書福字及鹿肉等件歲杪以頭風請假蒙

賞假五日調治未愈復請展假十日得

旨好生調理并蒙

恩賞緝絲大荷包一對金線中荷包一對顧繡平安小荷包一

枚

嘉慶二十年乙亥五十八歲

正月初二日崇大司寇於

召對時

上詢韓對病體如何奏以尙未輕減卽奉

旨韓對再賞假十日毋庸自行具摺請假欽此二十一日病起

銷假辦事黃香涇孝廉成卒於邸寓香涇品學純粹自

粵東節署延為範兒課讀南北與偕閱五六載至是作

古不勝惋惜二月初三日

命坤寧宮饗胙肉四月為範兒遵豫東例報捐光祿寺署正兵

部會同軍機議奏

巡幸木蘭翊衛章程十二條五月奉

恩賜

欽定平定廓爾喀紀畧平定臺灣紀畧各一部兵部會同工部

議奏中小米艇裁改撈繪船章程六月遵

旨會議窩竊回民到配脫逃加等治罪條款移寓內城太平街

八月長孫文和生十月初一日

命坤寧宮饗胙肉連日進

同樂園侍班聽戲蒙

賜克食並疊蒙

恩賞玉洗等件春間初大司馬因事奪職以吳菘圃河督職陞

任至是旋京余交卸兵部事十一月酌定軍流以下逃
回呈遞封章條例復遵

旨酌議邪教犯軍流等罪遞籍復逃加等治罪條款十二月以
刑部堂司積壓本章部議奪職奉

上諭韓封係刑部司員出身常川在署辦事其咎較重著拔去

花翎降爲二品頂戴仍革職畱任欽此議奏邪教爲從人犯
改發回城爲奴條例先是八月間蔣姑母卒於家姑母
少先大夫四歲老年兄妹情誼最篤竊恐傷堂上心
懸念弗能釋嗣奉先大夫郵諭云我白粲兩餐黑甜
一枕此中尙得佳趣汝勿以我爲念寸心藉得少紓
嘉慶二十一年丙子五十九歲

二月連日審辦假官撞騙妄供逆情之護軍阿年保及
邪術治病之道士雙陽等案并提訊監禁待質之逆犯
董帽太密問劉第五支進才等六首逆下落經直隸省
將供出之要犯劉玉濫拏獲解部日夕熬審得實每至

二鼓歸寓爲風寒所侵寒熱交作適本部有應奏核議各件及呈遞劉玉滢覆供以疾不能趨值蒙

上垂問崇大司寇代爲陳奏隨具摺請假四五日得

旨著好生調養毋庸限以日期欽此仍在寓核判一切稿件逾日病起卽銷假進署辦事條議忤逆遣犯聞喪哀痛得釋回定例三月因前在閩藩任內濫給借支養廉部議降調以任內有革畱等案無級可降應革任奉

上諭著改爲降二級畱任欽此奉

恩賜

御製文二集六月條議創墳鑿竊分別首從次數增修定例將

現審發塚之趙十一犯照新例發邊遠軍九月奉

上諭本年刑部辦理秋審所擬改緩改實各起均各允協卽如

浙江省

一起該省原擬緩決經刑部改爲情實乃係

必實之案並非有意從苛是以卽予勾決此外九卿科道會議時亦無籤出或枉或縱之案該堂官勘議尙屬盡心上年因該部積壓本章且屢次錯悞將該堂官等分別降罰韓封著加恩開復頭品頂戴仍賞還花翎等因欽此十月初一日命坤寧宮饗胙肉初四等日進

同樂園侍班聽戲蒙

賜克食并疊蒙

恩賞白玉壽桃等件十一月二十二日捷足賫到南中凶問

先大夫於是月初四日痰喘忽發初八日病劇痰湧不止於午刻閉目趺坐而逝聞信摧裂不知所措二十三日遣家屬呈報丁憂二十四日同堂諸公具摺代奏

上召見章桐門協揆煦及同部尙書侍郎等

乖詢一切

上深憐憫並以家寒

軫念治喪乏資傳

諭另有賞恤午刻寓中設位成服軍機章京吳榮光賫到

上諭刑部尙書韓封辦理刑名尙屬精細伊現丁父憂著加恩

賞給廣儲司銀三百兩卽令回籍治喪欽此跪讀

恩綸感痛涕泣隨率 範兒 星奔南返眷屬隨後行

嘉慶二十二年丁丑六十歲

正月初二日抵里匍匐入門五內崩裂舉家環繞而哭
自念竊祿京師遠離膝下生不獲侍湯藥死不獲親含
殮抱恨終天曷其有極卽擇日治喪二月朔眷屬到家
三月親詣胡果泉中丞 克家 署呈請代奏謝

恩卽入山營葬事初九日奉 先大夫靈匱安葬於壽山灣乞

王惕甫學博 芑孫 志墓四月修葺先侍郎敬堂公祠同

彭梧岡 蘊琨 諸君修理長元學宮八月赴武林昭慶寺

爲先大夫禮懺時蔡小霞方伯廷衡家居過訪閒話

余三十年前舊雨也九月自杭歸是歲三月長孫女永

壽生續刊先大夫聽鐘樓詩稿二卷

嘉慶二十三年戊寅六十一歲

里居無事先五世族祖君望公洽所著篆學測解三十

卷朱竹垞謂訓釋考源足證說文長箋之譌君望公當

鼎革之際抗志高蹈隱於陽山以終是書先大夫從

書肆購歸先大夫欲付梓而未果爰屬夏君學禮繕

寫刊行以成先志於是秋開雕至庚辰夏告竣我家三

代祖塋在香山下場村嗣後伯父香麓公葬與福山從

兄麗庭公葬小宴嶺伯兄元配嫂氏繆夫人葬荷花濱
 五弟卜生壙於仙人橋俱在壽山灣新阡左右 先大
 夫嘗自作生壙記云泉臺聚順可以教孝余以宦轍東
 西無暇為買山計乙亥歲五弟於香山左近為余卜吉
 福田濱地十畝遂購得之是秋弟復入山為余築生壙
 焉

嘉慶二十四年己卯六十二歲

二月服闋入山辭墓繪風木圖藏行篋中以當歲時展
 禮遂挈眷北上顧梧亭內弟顧蔚堂 克寬 侍萱 翔雲 兩

表姪顧味梅 朝鼎 鐵香 樑 兩內姪吳悅庭姪壻 文杰 同

行侍萱卽於是秋舉京兆試悅庭旋需次保陽景州途次奉

上諭韓封現已服闋將次到京著以一品銜署理刑部右侍郎
欽此三月二十八日抵黃新莊接

駕卽於

行在

召見隨扈至京赴部辦事太平街舊寓前丙子奔喪回籍時適

表弟顧南雅侍讀蒨自滇還京移居是屋嗣南雅假歸

族姪孫蘭塘祠部俊杰居之蘭塘聞余挈眷入都掃徑

以待卸裝遂同寓者六載閏四月吳菘圃大司寇引疾

奏請開缺奉

上諭刑部尙書員缺著韓封補授欽此條議免死軍流人犯逃
後爲匪例五月拜香佩囊之

賜吏部議處本部查辦黑龍江吉林官犯將不應列入之門領
李德潤等未經扣除一案堂司各官分別降調奉

旨加恩俱改爲畱任欽此條議誣告加等擅遞封章並口稱欲
求面

聖申訴事件治罪條款六月奏定辦理情重條款章程七月蒙
恩賞鮮荔支榆次瓜十月顧味梅在寓病卒味梅佐余二十餘
年始終勤慎病經兩月不起甚爲惋惜八月因疎防在

監官犯自縊一案部議降調以前有革留之案應革任
奉

旨係屬公過加恩改爲革職留任欽此九月有

旨文武一二品大臣任內有降革留任處分者查明量予開復

余得蒙

恩開復降一級留任處分共四案十月慶逢

六旬萬壽會同大學士九卿恭進

萬壽錦屏并九雅九篇詩冊進

寧壽宮聽戲六日奉

恩賞大小荷包二對鑲玉如意二枝玉烟壺一枚瑪瑙朝珠一

挂牙盒一個劉海戲蟾一匣鼻烟二瓶初八日復蒙

恩賞大卷八絲緞一疋五絲緞一疋小卷八絲緞一疋小卷寧

綢一疋線縐一疋十九日二鼓聞文穎館失火趨赴內

西華門有

旨禁不得入翌日

命速提文穎館供事等嚴審嗣訊明失火厨役李海元定擬覆

奏十一月奉

旨尙書韓封著加恩在紫禁城騎馬欽此未逾月散直後在

景運門外馬驚墜跌左膀脫離七分經蒙古松山祿福二

醫官揉搓逾時骨旋鬪合痛不可忍卽舉歸邸寓昏迷

不知廉少司寇善為草請假摺稿期以旬日翌日具奏
上曰此傷筋動骨豈十日所能愈乃

賞假一月是日

命穆少宗伯彭阿來寓傳

諭云不可亂服他藥只用阿爾湛酒及青鹽二味煎水薰洗必
效卽告知醫官如法洗治旬日傷痕盡現醫云此可保無內
損之慮矣然不可輕動嗣復因傷引動肝疝舊疾益形
疲憊十二月十六日

上親書福字

命乾清門侍衛博克順

帶同蒙古醫官巴

彥多靈阿

賚至寓中

諭以安心調養無庸性急

聖恩優渥感浹髓肌隨具摺謝

恩並聲明展假一月仰邀

俞允並

諭召對同列諸公云韓對此一病非百日不爲功歲除病少差

自此得保餘生皆

主上賜也是年恭遇

萬壽覃恩以刑部尙書

誥贈 曾祖父 祖父 父爲光祿大夫 曾祖妣 祖妣

妣爲一品夫人並以本身妻室應得封典

馳封伯兄聽秋先生爲光祿大夫

馳贈先嫂繆氏

馳封繼嫂陳氏爲一品夫人又遵例

馳贈外父顧瀛齋公爲光祿大夫外母氏朱爲一品夫人猶憶

庚午三月恭懸二品封典

誥命於舞綵堂有白鶴翔集堂前

先大夫顏祠樓日來鶴以

紀瑞迄今十載果得以一品服

誥贈三代而先大夫棄養已四年不及親見

命下之日涕泗交零是歲螺峯從姪

榘

選廣東平海司巡檢

嘉慶二十五年庚辰六十三歲

正月左足僅能履地跬步需人時假期將滿又具摺奏
請再展限一月復蒙

溫旨俞准並

諭軍機大臣曰韓封得免殘疾幸矣二月三個月假滿於二十

五日銷假蒙

召見勤政殿奏對良久隨進署辦事三月初一日

命交泰殿饗胙肉第二孫 文穎 生時

聖駕謁

陵兵部奏遺失行印一案奉

旨交畱京王大臣會同刑部嚴行審訊卽逐一提集解送領催

書役人等日夕研鞫未得端緒疊奉

嚴旨切責并以審辦遲延殊屬懈玩將王大臣及堂司各官分別罰俸旋將犯供叅錯及遲延緣由會奏並自請議處奉

旨韓封著拔去花翎降爲二品頂戴王大臣及堂司各員俱降革頂戴有差嗣經設法提問兵部解送之堂書鮑幹等究出捷報處書吏俞輝庭等因行印備匣遺失捏爲燒燬等情繕供覆奏定讞奉

命賞還花翎頂戴承審之王大臣俱蒙

恩旨開復五月拜香囊荷包之

賜奏定稽查書役條禁六月以本部議駁

盛京刑部審題已革驍騎校溫程等共毆宗室喜受身死

一案原擬錯悞審明更正奉

旨刑部堂官著加恩開復罰俸二年等因欽此奉

恩賜三希堂法帖七月

上幸熱河二十七日畱京王大臣傳知二十五日戌刻

龍馭上賓驚痛罔措隨同在京百官舉哀成服在署齋宿八月

二十日至西卡倫門外恭迎

聖駕卽蒙

召對出復詣東卡倫門外跪接

梓宮據地悲號幾不能起二十二日

靈駕入宮隨班舉哀行三奠禮復回署齋宿者二十餘日九月
奏陳欽奉

恩詔循照舊章將斬絞人犯分別應否准免條欵酌擬軍流
人犯釋免章程並附片奏請新疆等處人犯及到配未
滿三年軍流各犯應一體查辦又會同軍機議覆御史
袁銑條陳刑罰宜平等欵奏入俱得

旨依議十一月初九日

命坤寧宮饗胙肉七弟率嘉春姪雲第抵京七弟報捐批驗

大使嘉春報捐州吏日均候掣大籤十二月蒙

恩賞金線大小荷包及鹿麀等件是年恭遇

登極覃恩

晉贈三代外以本身妻室應得封典

馳贈伯父香麓公伯母顧氏邵氏

晉正一品階長孫 文和蒙

恩得從一品廕生冬恭上

仁宗睿皇帝尊諡廟號覃恩

晉贈三代外以本身妻室應得封典

馳贈外祖顧隨菴公外祖母何氏

晉正一品階恭上

皇太后徽號覃恩

晉贈三代外本身妻室得請一品

誥封

道光元年辛巳六十四歲

正月初二日

命坤寧宮饗胙肉奉

恩賜新修明鑑全部二月顧夫人領到

皇太后恩賞大紅緞兩端江綢三端半梅內弟春芳來京謁選

旋得雲南阿迷州牧秋間赴任時七弟報捐分發籤得

山東引

三

三

見後卽赴省需次嘉春初發山西因告近改掣東省旋丁內
艱返里三月

派護送

梓宮本部奏請佩帶行印奉

旨卽著韓封佩帶欽此十六日扈

蹕恭謁

昌陵恭上

孝淑睿皇后尊諡禮成二十三日敬視奉安

梓宮禮畢隨扈還都

恩賞加級四月奉

恩賜

仁宗睿皇帝御製詩三集全部五月奉

派督修崇文門大樓箭樓堆撥等工得蒙君姪凶耗作詩哭
之六月吳壻前以長蘆鹽大使捐陞知縣籤掣廣東至
是自京赴粵需次七月奉

派盤查三庫九月奉

恩賜

仁宗睿皇帝御製詩文餘集全部十月初一日

命坤寧宮饗胙肉蒙

恩賞繡蟒一襲為和孫締姻潘功甫中翰曾沂長女長孫女

許字金養田比部 宗培 第三子 益鏘 十一月叅奏本部

直隸司掌印司員承審傳大命案不公並代案犯賄囑
書吏奏請革審奉

旨交軍機會同嚴審并奉

旨刑部堂官於未經定案之先查明據實叅奏不稍徇庇甚
屬可嘉俱著先行交部議敘欽此嗣經會訊得實將關說
得賄各員分別奏明定罪十二月蒙

恩賞磁餅等件又蒙

恩賞荷囊麇鹿等件是年夏恭遇

升祔覃恩得請

誥命四軸

道光二年壬午六十五歲

正月奏酌修刃傷事主條例三月

欽派會試搜檢大臣時表妹畢氏卒於京寓表妹壻熊酉山

太守之書罷職遠遊命範兒經紀其喪閏三月奏酌改

犯婦實發定例四條

命交大學士軍機會議

准行者二事又條奏械鬪頂寬請究主謀賄買之人並附片

奏廣東省咨到頂寬三十七案恐將械鬪之案分案辦

理駁令各該督撫確切查明詳議具奏又將應入秋審

全言
情近械鬪一百餘案恐有分案辦理賄買頂克各情開
單奏請暫行扣除俟各省覆審奏到時再行核辦嗣經
各省籌議陸續入奏卽遵

旨會同三法司核議懲辦章程請著爲令得

旨依議四月奉

恩賜

欽定新疆識畧二函五月遵

旨議奏盜砍青椿內外樹木治罪章程因病請假十日

上命侍衛容

照

帶同御醫趙

汝梅

來寓診視嗣因病未痊屢

請展假均蒙

恩准六月又請假五日並以

御門誤班請交部議奉

上諭韓對奏請給假調理並因御門臨期曠誤自請交議韓對著賞假五日加恩免其議處欽此旋卽具摺謝

恩銷假條議查辦煤窑鍋伙章程又酌修誣竊斃命條例八月酌改蒙古偷竊牲畜及強劫什物秋審實緩章程九月第三孫文桂生十二月二十六日進

乾清宮

恩賜

御書福字及佩囊麕鹿等件恭逢

冊立

皇后覃恩以三代俱已請封不復呈請是歲七弟補雒口批
驗所大使

道光三年癸未六十六歲

正月初二日

命坤寧宮饗胙肉十五日

賜宴正大光明殿十六日

小宴廷臣十六人 對得與焉恭和

御製詩七律一首蒙

恩賞八絲大緞二卷蓮頭香一盒白銅手爐一個茶膏一匣

玉齋戒牌一個玉鼻煙壺一個檀香油一瓶二月初一

日

命坤寧宮饗胙肉十三日

駕幸太學行釋奠禮陪祀畢

上御辟雍宣講得與觀聽三月蒙

恩賞臨雍御論五月拜香囊荷包之

賜六月因病請假十日嗣以假滿力疾進

內蒙

召見面諭再展假十日安心靜養七月病起銷假十月初一

日

命坤寧宮饗胙肉十一月

恩賜

欽定會典六十函遵

旨籌議募充件作章程酌增捉人勒贖條例時舊患肝疾間

一發作十八日趨值奏事中途疾復作請假五日得

旨俞准又請假五日戴相國

均元 傳述

聖諭天寒體弱准再賞假十日安心調養十二月病起銷假

二十六日進

乾清宮

恩賜

御書福字及荷包等件並

御製養正書屋詩文集全部是年福田濱生擴告竣五弟一
手經理并命舒宣姪簡任鳩督之役俱極辛勞工竣賦
詩寄頌余次韻酬之有更煩償足平生願添種寒梅繞
墓花之句嘉春姪服闋赴原發山西省需次

道光四年甲申六十七歲

正月十五日

賜宴正大光明殿十六日

小宴廷臣十六人對復與焉恭和

御製詩七律一首蒙

恩賞洋啤伎一板金珀朝珠一盤煙壺一個湖鏡一面回子
刀一把洋金火鐮一個花露油一瓶月杪疾復作遞摺
請假十日得

旨俞准嗣以左頤突起瘰癧痛連頭頂觸動肝疾急治未痊
再請展假逾月始得漸瘳力疾銷假進署辦事遵

旨酌議粵省打單匪犯治罪專條又酌議因瘋殺死二三命
以上分別治罪條例三月奉

恩賜

欽定春秋左傳讀本二函四月

仁宗睿皇帝實錄

聖訓告成除在館臣工分別議敘外其餘文武大臣蒙

恩概予紀錄一次五月拜荷包香囊扇套之

賜時御史梁

中靖

叅奏山西榆次縣民閆思虎強姦釀命承

審各官以和定擬一摺奉

旨將人証卷宗提解刑部嚴審嗣經隔別研訊是強非和証
供確鑿及官吏得賄舞弊各情據實平反按律定擬并
將猝遭強暴捐軀明志之趙二姑請

旌以慰貞魂奏入得

旨趙二姑貞烈可嘉著禮部照例旌表將承審各官分別發
遣降革并奉

上諭刑部堂官及承審此案司員秉公研鞫伸雪沉寃使兇徒不致漏網辦理尙屬認真俱著加恩交部議敘餘依議等因欽此北城移送黃泳泰呈控山西介休縣官犯侯際清欠銀逃匿一案訊出道光元年擬流官犯侯際清贖罪時承辦書吏有撞騙得贓等情余因前經畫稿據實檢舉自請議處并奏請迴避嗣經那大司寇清安訊出說合賄囑各犯有牽涉本部堂司等情亦奏請迴避續經

欽派大臣會同軍機提鞫案內人證訊出司員中有爲余上年保畱者誑騙得贓二千兩供認不諱并有誣余受贓

五百兩及會向

兒子範

提及之供因卽將

範兒

奏交審

辦禡職嚴訊

範兒

不甘誣認余以事關名節遵

旨明白回奏并請開缺聽候傳訊奉

旨韓對著暫行開缺欽此嗣奉軍機片傳赴

園聽審隨具親供大略言世受

國恩家傳清白歷官中外將五十年從不敢絲毫苟且豈年
近七十遽焉改節惟力疾辦公多有疎漏昏憤之咎實
所難辭若如所供聽囑受賄各重情關係一生名節惟
求立提伊等質對始可剖明等語執事者以一品大員
不能與人犯面質禁勿許翌日軍機呈進親供奉

旨韓對著暫行革職提同盛思道董椿三面質對欽此卽奉
片傳對簿盛思道一見呼冤謂前供實係被刑誣指於
是撥雲見日豁然一清惟老病昏憤失察官吏舞弊得
贓及獲咎司員又係濫列保薦之人辜

恩溺職罪無可追懇請從重治罪并遵例將長孫文和從一

品廕照呈繳執事者始議戍新疆繼議發軍台獄定入
奏

上以訊明實無聽囑受賄情事從寬免其發遣加

恩在

萬年吉地工程處効力贖罪自念供職無狀身蹈愆尤荷

蒙

皇上聖明不加嚴譴

派往要工俾令自効間

命之下感悔悚懼交集五中呈請代奏謝

恩後卽馳赴工次外姪孫倪仲林培隨行寓居馬蘭峪之真

武廟東院攬翠軒面山枕城屋宇幽敞一庭秋色相對

怡情早晚赴工閱視一周歸寓後輒拈題吟咏竊謂生

平不可得之閒曠繼蓮龕總戎昌時鎮馬蘭每於公暇

過從餽問不絕九月查花儂林顧侍萱同範兒自京至

花儂侍萱畱數日卽行範兒畱侍十一月地凍停工經

總理大臣飭令暫行回京度歲左頤舊患復作痛不可忍腮瘰穿破流膿盃許內外兼治至月餘始得少痊編所作詩數十首爲蘭關小草

道光五年乙酉六十八歲

正月赴工挈

範兒

仲林同行早晚仍詣工周歷查閱吳

悅亭姪壻以榆關驛丞奉派送馬差來工問候畱兩日卽去二月詣隆福寺

行宮跪接

聖駕謁

陵禮畢復趨赴工段

龍鳳門右跪接候

上閱視吉工仍隨班祇送五月都中家問來知第四孫文挺

生入夏以來舊疾間一發作山泉凜冽飲輒腹痛體益
不適蘭關苦無良醫遂強不服藥幸無官守藉得偷半
日閒靜以調攝故病體尙可勉支編所作詩爲蘭關續
草八月奉

旨韓封著賞給三品頂戴署理刑部右侍郎欽此隨俶裝起
程行次馬神橋登車失足左膀閃挫舊傷復作酸痛需
人扶掖而行十二日抵都托相國津來寓云今早

召見時蒙

上垂詢韓封會否到京隨代奏已到現擬明日遞摺惟因途

次閃腿深恐

召對失儀

上諭云俟摺上當賞假令其好生調理也十三日具摺謝

恩並陳患疾各情奉

旨韓封現患足疾著賞假一月調理欽此歸寓後痛益加劇

夜不成寐亟延醫內外調治未見奏功九月力疾銷假

卽蒙

召對退出赴部辦事十月初十日慶逢

皇太后五旬萬萬壽以三品銜遵

旨於

午門前隨班行禮十一月奏核議八旗逃人章程條欵又會同軍機核議私入紅椿偷牲失火治罪條例十二月奉

上諭署刑部右侍郎韓封著加恩賞給二品頂戴欽此具摺奏謝余自入都後疾病糾結秋來加以氣虛脾泄迨交冬令寒氣乘虛內攻觸引肝胃舊疾寢食俱廢乞假十日仰蒙

俞允數日後邪熱外發自顛頂至兩脇搐痛劇甚醫者復投以清解之劑以藥治藥元氣大虧竟不能興假期將滿

心益焦灼不得已復請展限蒙

恩准再展假二十日自維愆尤未補

恩寵頻加復以衰病淹纏屢瀆

天聽中心皇皇夙夜不能自安矣

道光六年丙戌六十九歲

正月仍臥病日易數醫病未少間惴惴焉惟曠職悞公

是懼隨繕摺懇請開缺調理奉

旨韓崱著准其開缺調養欽此杜門養痾加緊調治以冀速

痊入夏後心神振蕩衰憊日甚自揣病根已深難以供

職隨於五月具摺籲請乞歸就醫命

範兒

赴

園恭遞奉

旨韓對著准其回籍調理欽此衰老病軀仰邀

矜恤舉家忻感以天暑暫緩起程六月初梧亭偶患腹瀉日
益加劇至十六日卒於寓梧亭自甲戌至今閱十餘年
往來南北無不與偕休戚相關誼同手足詎歸期已卜
遽爾作古悲悼曷已爰爲之作傳先期運匱至通屆時
同發時蔣礪堂相國賦詩贈行有一舸秋風仙眷屬之
句張詩船舍人祥河取詩意繪秋帆仙眷圖爲贈一時
題咏者甚多七月挈眷至潞河登舟中秋前二日舟次
渡口驛七弟同晚香族弟瀾刺舟來迎蓬窗晤語三日

而別扶病緩程以行至十月始抵里十一月為艇孫締

姻彭詠莪中翰蘊章第四女歲暮疾作臥牀

道光七年丁亥七十歲

正月病少差二月恭詣先塋祭掃撫茲風木倍覺愴然

時親屬尊行存者惟蔣竹浦曾煥顧竹坡增光兩舅氏

時往候問陶雲汀中丞謝偕梁芷鄰方伯章鉅陳芝楣

太守鑾重修滄浪亭並建祠於亭側將顧湘舟表姪沅

所繪吳中名賢像五百餘幀勒石嵌壁余往致祭尤春

樊表甥興詩邀入問梅詩會時諸孫漸長新橋巷宅復

偈仄爰卜宅於北街華陽里宅尙寬敞畧一修葺不敢

求盡美也其中爲九福堂余官中外拜
仁廟恩賜福字者七拜

今上恩賜福字者二因名其堂以志

恩榮後爲聽雨樓余年四十時伯兄自津門寫聽雨圖爲壽
忽忽三十載兄失明已久喜踐前約於盲暗中作一筆
書榜此樓五弟跋數語於後以爲兄弟聯牀聽雨之地
其下卽還讀齋余寢息其中閉戶養痾日與藥爐詩卷
作伴而已是歲余年七十賦述懷五古四章吳壻宰嶺
南書來索余還讀齋詩稿二十卷欲登之梨棗以介壽
余不忍拂其意從之爲穎孫締姻貝柳郊內甥倩仲圻

次女十二月蘇文忠公誕辰懸像還讀齋招同人致祭
飲福潘榕臯丈奕雋詩先成疊韻和之次孫女華壽生
道光八年戊子七十一歲

正月十六日酉刻顧夫人辭世夫人歸余五十年孝事
尊嫜和睦妯娌待子婦侍妾下逮臧獲皆恩義有加性
敏而慮遠治家事井井有條俾余一意趨公使無內顧
憂平居自奉儉約節廉俸所入以贍宗族歲時祭饋必
躬必親不敢稍自暇逸茲以積勞成疾遽爾溘逝傷哉
余時亦臥病不能起勉草行畧以示子孫并賦悼亡詩
一百一十韻以哭之憶自戊秋歸田後兄弟娣姒月必

會食伯兄命菊坪族姪孫英璨繪四百五齡圖甫一載

而夫人歿五月五弟婦陳宜人又亡此會不長良可慨

已八月修葺高祖貞文公祠九月葬顧夫人於福田

濱新阡董琴涵國華銘其墓是歲五弟得曾孫章富為

姪孫文禾所出

道光九年己丑七十二歲

雲汀中丞繪五老圖榕臯丈暨吳玉松雲石竹堂韞玉

與余及中丞也為桂孫締姻趙鄴夫表甥學泌第六女

聘孫媳旋病歿迎其匱歸三月至滄浪亭謁前明襄毅

公雍祠見殿宇傾頽鞠為茂草爰請於當事募捐修葺

命範兒鳩工庀材匝月而工竣因記修建顛末以勒石

舅氏顧曦庭公何昌歿已四十餘載卜兆未葬余出貲

助春溪表弟思立執齋表姪俾營葬事兼葺丙舍

道光十年庚寅七十三歲

去秋陶中丞於楓橋鐵鈴關重建文星閣三月落成偕

同人瞻拜同湘舟清理劉漸于先生羽儀墓重修劉方

伯殿衡祠同蔣林一希賢顧默庵震濤修復李延年先

生侗祠韓將軍說廟余官嶺南日繪有種梅圖小影是

春範兒於宅之東偏築屋三楹種梅數十本為余棲息

地閏四月詩會百集同人於種梅書屋釀飲賦詩余詩

先成和者頗夥八月和孫補府庠博士弟子員十一月

第五孫文馥生伯兄得會孫章侯為姪孫文積所出伯

兄命為冢孫文穉後是歲伯兄水明樓詩稿刻竣

道光十一年辛卯七十四歲

前年春偕顧侍萱湘舟謁蘄王墓於靈巖山麓地廣數

百畝而碑蝕亭頽煙荒草蔓蓬穎蔽冢感慨係之爰與

當事及郡紳士謀捐建始自庚寅夏至是年春季竣工

呈請大府復春秋致祭儀復以墓祭非禮思度地為饗

堂願阻於力議遂寢至明年墓左寶藏庵僧永如願捐

祠基又藉眾力捐資創建囑袁笏山貳尹縉及張君心

源戴君文榮董其事越半載而告成佳城峩峩新廟奕

奕觀瞻為之一肅余撰文勒石并囑湘舟輯志付刊蔣

篆香表弟賡燠出示吾家寒松錄是書為先大夫編

刊板久燼於火爰重付梓余先高祖貞文公與篆香

五世祖公藩公垣於明季同遊庠勵名節篆香復作頌

林錄一篇附刻卷內是歲八月恭逢

皇上五旬萬壽當入都祝

嘏先期北上於四月命範兒穎孫隨侍五月抵荏平雲溪族

姪孫三泰宰是邑逗畱半日七弟自雒口迎至汶上遂

偕行抵署因病體羸弱不敢冒暑北行在署度夏得攬

鵲華及歷下亭大明湖之勝以補從前足跡所未經與
七弟對榻聯吟者兩月遂起程七弟送至齊河而別八
月抵京初十日隨班舞蹈恭祝

萬壽旋遞摺

陛辭由潞河買舟南發舟次津門歸延陵姪女扶悅庭姪壻
纓將旋南挈之偕行先是在雒口時庶母擬旋吳遣嫁
長姪女至德州命範兒往迓之庶母率姪女於東昌登
舟十一月抵里知遶室包氏於八月十九日卒氏事余
四十三載謹慎和婉人皆稱之體弱而多病自顧夫人
歿而病日甚竟至不起余賦五古一章悼之先是顧夫

人以穎孫為氏所愛撫命範兒以穎孫理問加級封典

馳封宜人旋祔葬於福田濱編夏秋所作詩百餘首為岫雲

草

道光十二年壬辰七十五歲

四月為和孫授室閏九月長孫女于歸彭城十一月七

弟亦引疾歸自此風雨對床益遂天倫之樂矣續刊還

讀齋詩稿五卷是年春姪孫文程外孫吳潮生彌甥蔣

涑俱遊庠

道光十三年癸巳七十六歲

春和孫餼於庠七月十六日長孫媳潘氏以媿難卒孫

媳于歸一載恪守閨訓孝事重闈賢淑之行族黨交稱

余以望八之年失此賢孫婦老懷不無凄惋八月重游

穎宮同遊者闔郡四人府學徐鱸香祖裕常熟言臬雲

朝標吳縣石竹堂韞玉元和爲余賦七律四章屬同人

和之吳中連歲荒歉秋復薦饑民不聊生道殣相望林

少穆中丞則徐奏請緩徵勸捐賑濟並慮查核貧戶假

手吏胥多有不實十二月集諸生於學親爲揀派每畝

一人查明戶口人數先付執照以憑領賑各造所查戶

口清冊呈閱蓋以諸生近在里閭耳目易周事歸覈實

誠善政也余恐其事創舉諸生或不樂從因命和孫領

查正二本畧逐戶清查者三日查出極貧一百五十餘
戶造冊繳轅

道光十四年甲午七十七歲

府君自訂年譜一卷半草於案牘之暇信手劄記散置
笥篋告歸後復陸續補成者起乾隆二十三年戊寅一
歲訖道光十三年癸巳冬十二月嗚呼竟絕筆於斯矣
府君自丙戌秋

予告歸里養痾多暇恆以賦詩作字自娛雖終歲強半臥牀
醫藥罔間而身無職守得以隨時葆衛意與尙佳間與
親戚故舊談讌倡酬爲樂卯秋入都祝

嘏舞蹈歡忻扶疾緩行雖跋涉長途尙可搢拄南旋後偕

諸父怡怡聚順樂意更融 不孝朝夕問視竊幸愛日正

長期頤可致詎意今年正月十六日體忽不豫寒熱交

作延醫診候僉謂高年感冒牽引舊疾脾疝交攻肢節
作楚病根沉痼氣血久虧疎補皆恐難任二十日後脈
象虛弱精神益形委頓加以痰壅氣喘百治無效至二
十五日丑時竟棄不孝而長逝春秋七十有七嗚呼痛
哉此皆不孝侍奉無狀罹此鞠凶罪孽深叢百身莫贖
尚何言哉易箒時猶神明不替伏枕親撰遺疏自以渥
受

三朝高厚之恩涓埃未報嗚咽不能自已并論不孝曰吾稟承

嚴命曾置義祭田五百畝祭掃而外兼以贍族惟欲
效范氏義莊之舉有志未逮耿耿至今汝其勉成吾志

不孝 謹受遺命勿敢忘伏念 府君服官中外四十九年其立

朝行已出處大節詳具譜中 不孝 愚魯無文於 府君經

濟事功未能仰窺萬一卽定省時習見 府君之孝於

事親友於兄弟交友以誠信御下以慈愛以及周恤宗


黨汲引人材數大端 不孝 苦由迷惑亦不敢妄贊一辭

以致望一漏萬獲罪滋甚且詮次行述亦萬不及 府

君自訂年譜之確實周詳爰敬謹錄付梓人以備

國史省志之採擇並乞

當代立言君子錫之銘誄以光九京則 不孝 世世子孫



全言

感且不朽

不孝孤哀子韓範泣血稽顙謹述

文挺

齊衰期服孫韓

文穎

文和 杖淚稽首

文陸

文馥

賜進士及第

誥授通議大夫前山東按察使翰林院編修石韞玉填諱

姑蘇毛上珍局刻